

MESYUARAT PERTAMA, PENGGAL KELIMA
PARLIMEN KEEMPAT BELAS
2022

HARI RABU : 9 MAC 2022

**JAWAPAN-JAWAPAN BAGI PERTANYAAN-PERTANYAAN JAWAB
LISAN YANG TIDAK DIJAWAB DI DALAM DEWAN
(SOALAN NO. 7, 8, 12 HINGGA NO. 83)**

NOTA: [RUJUK PENYATA RASMI HARIAN (HANSARD)]

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA
PARLIMEN KEEMPAT BELAS**

**PERTANYAAN : JAWAB LISAN
DARIPADA : YB TUAN AHMAD JOHNNIE BIN ZAWAWI [IGAN]
TARIKH : 09 MAC 2022 (RABU)**

SOALAN

Tuan Ahmad Johnnie bin Zawawi [Igan] minta **MENTERI KANAN PENDIDIKAN** menyatakan susulan lawatan YAB Perdana Menteri ke Sarawak pada 4 Disember 2021, beliau telah mengumumkan sebanyak 1,022 sekolah daif di Sarawak sudah dikenal pasti untuk di baik pulih pada kadar segera. Susulan itu, apakah perkembangan setakat ini dan berapa jumlah dana yang diperuntukkan bagi tujuan menyelesaikan masalah sekolah daif termasuk rumah guru di Sarawak.

JAWAPAN

Tuan Yang di-Pertua,

Kementerian Pendidikan Malaysia (KPM) komited dalam menyediakan infrastruktur pendidikan yang selamat dan kondusif untuk kegunaan murid dan warga sekolah di seluruh negara termasuk Sarawak.

Khusus untuk negeri Sarawak, sebanyak 361 projek menaik taraf dan membangunkan semula bangunan daif di sekolah, termasuk rumah guru telah diluluskan bagi tempoh tahun 2016 sehingga 2022. Ini melibatkan kos projek sebanyak RM2.373 bilion. Daripada 361 projek tersebut, 198 projek telah siap, 73 projek dalam pembinaan dan 90 projek dalam peringkat prabina.

Untuk makluman Ahli Yang Berhormat, penetapan projek pembangunan semula atau menaik taraf bangunan sekolah yang daif adalah berdasarkan analisis skor gred impak yang menentukan tahap keadaan komponen fizikal atau fasiliti bangunan di sekolah. Skor ini mempunyai tujuh tahap skala. Skala satu hingga skala empat merujuk kepada keadaan bangunan yang masih berfungsi dan selamat digunakan. Manakala skala lima adalah bangunan yang dilaporkan oleh pihak sekolah sebagai tidak selamat dan memerlukan penyelenggaraan. Skala enam pula merujuk kepada bangunan yang tidak selamat dengan pengesahan daripada pihak teknikal Pejabat Pendidikan Daerah (PPD) atau Jabatan Pendidikan Negeri (JPN). Sementara skala tujuh merujuk kepada bangunan yang tidak selamat dengan pengesahan syor roboh dari Jabatan Kerja Raya.

NO SOALAN: 7

Bilangan sekolah yang mempunyai bangunan daif adalah bersifat dinamik dan akan berubah berdasarkan kondisi bangunan dari semasa ke semasa. Keutamaan KPM adalah kepada bangunan yang berada pada skala enam dan tujuh untuk dibina bangunan gantian mengikut keperluan. Pembinaan bangunan gantian ini dilaksanakan secara berfasa melalui peruntukan yang diluluskan oleh agensi pusat bagi setiap *Rolling Plan* Rancangan Malaysia lima tahun, tertakluk kepada kedudukan kewangan semasa Kerajaan.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA,
PARLIMEN KEEMPAT BELAS**

PERTANYAAN : JAWAB LISAN
DARIPADA : YB DR. ONG KIAN MING [BANGI]
TARIKH : 09 MAC 2022 (RABU)

SOALAN

Dr. Ong Kian Ming [Bangi] minta **MENTERI KOMUNIKASI DAN MULTIMEDIA** menyatakan pencapaian pelaksanaan program “menaik taraf stesen pemancar dan menyediakan capaian gentian optik ke premis-premis berkaitan” yang diperuntukkan RM3.2 bilion untuk tahun 2021 di bawah Kumpulan Wang Pemberian Perkhidmatan Sejagat dan diumumkan dalam Pakej Stimulus Ekonomi PEMERKASA, dan menyenaraikan Kawasan-kawasan yang mendapat manfaat daripada program tersebut.

JAWAPAN

Tuan Yang di-Pertua,

Pengumuman oleh Yang Berhormat Mantan Perdana Menteri pada 17 Mac 2021 mengenai Program Strategik Memperkasa Rakyat dan Ekonomi (PEMERKASA) yang melibatkan peruntukan sebanyak RM3.2 bilion daripada Kumpulan Wang Pemberian Perkhidmatan Sejagat (USP) melalui Pelan Jalinan Digital Negara (JENDELA) adalah untuk projek penaiktarafan stesen pemancar sedia ada kepada 4G dan penyambungan rangkaian gentian optik ke premis.

Setakat suku keempat 2021, sebanyak 3,500 daripada 5,394 stesen pemancar yang dirancang telah dinaiktaraf kepada 4G dan sebanyak 201,978 daripada 557,374 premis yang dirancang telah dilaksanakan dengan capaian gentian optik. Kesemua inisiatif ini sedang dilaksanakan di seluruh negara dan akan siap secara berperingkat menjelang penghujung tahun 2022.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA,
PARLIMEN KEEMPAT BELAS**

PERTANYAAN : JAWAB LISAN

**DARIPADA : YB PUAN JUNE LEOW HSIAD HUI
[HULU SELANGOR]**

TARIKH : 9 MAC 2022 (RABU)

SOALAN

PUAN JUNE LEOW HSIAD HUI [HULU SELANGOR] minta **MENTERI KEWANGAN** menyatakan kesediaan Kerajaan dalam mengiktiraf mata wang kripto dan NFT yang sedang melonjak naik secara global dan apakah persediaan Kerajaan untuk mengaplikasikannya di Malaysia.

JAWAPAN

Tan Sri Yang Di Pertua,

Mata wang kripto (*cryptocurrencies*) yang juga dikenali sebagai aset digital (*digital asset*) tidak diiktiraf sebagai mata wang yang sah diperlakukan (*legal tender*) di Malaysia dan bukan merupakan instrumen pembayaran yang dikawal selia oleh Bank Negara Malaysia (BNM). Aset digital seperti Bitcoin dan Ethereum tidak sesuai digunakan sebagai instrumen pembayaran disebabkan aset-aset ini tidak menunjukkan ciri-ciri universal wang. Secara umumnya, aset digital bukan penyimpan nilai dan medium pertukaran yang baik. Ini disebabkan keadaan aset digital yang terdedah kepada turun naik harga yang tidak menentu akibat pelaburan spekulatif, risiko kecurian akibat ancaman siber dan kekurangan daripada segi boleh skala (*scalability*).

Memandangkan teknologi pembayaran dan landskap aset digital yang semakin berkembang ini, pihak BNM sedang menilai secara aktif potensi mata wang digital bank pusat (*central bank digital currency, CBDC*) termasuk teknologi lejar teragih (*distributed ledger technology, DLT*) untuk mencapai objektif dasar awam. Untuk tujuan ini, BNM telah memulakan kajian CBDC berbilang tahun melalui pembuktian konsep (*proof-of-concept, POC*). Sebagai contoh, BNM sedang bekerjasama dengan Bank for International Settlements Innovation Hub dan bank-bank pusat di Australia, Singapura dan Afrika Selatan menerusi Projek Dunbar untuk mengkaji potensi CBDC bagi menambah baik pembayaran rentas sempadan.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA
PARLIMEN KEEMPAT BELAS**

**PERTANYAAN : JAWAB LISAN
DARIPADA : YB TUAN LUKANISMAN BIN AWANG SAUNI
[SIBUTI]
TARIKH : 9 MAC 2022 (RABU)**

SOALAN

TUAN LUKANISMAN BIN AWANG SAUNI [SIBUTI] minta **MENTERI KANAN PENDIDIKAN** menyatakan adakah pihak Kementerian memberi perhatian kepada pemasalahan ketagihan mobile game dan ketagihan peranti digital di kalangan pelajar berusia 18 tahun ke bawah yang memberi kesan terhadap kesihatan mental pelajar.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa memberi perhatian dan berusaha untuk memastikan tempoh penggunaan peranti digital oleh murid bagi tujuan sesi pengajaran dan pembelajaran (PdP) adalah terkawal. Namun demikian, masih terdapat sebahagian murid menggunakan peranti digital selain untuk PdP dalam satu tempoh yang terlalu lama sehingga menyebabkan ketagihan.

Dalam konteks kawalan penggunaan peranti digital oleh murid seperti telefon bimbit, KPM telah menetapkan larangan membawa telefon bimbit di kawasan sekolah termasuk asrama melalui Surat Pekeliling Ikhtisas Bil. 2/2009 Penguatkuasaan Larangan Membawa Dan Mengguna Telefon Bimbit Oleh Murid Di Sekolah. KPM juga telah mengeluarkan Surat Pekeliling Ikhtisas Bil. 2/2018 Garis Panduan Pelaksanaan Dasar Murid Membawa Peranti Peribadi Ke Sekolah Kementerian Pendidikan Malaysia sebagai panduan kepada murid apabila menggunakan peranti peribadi semasa melaksanakan PdP di sekolah.

Selain tu, KPM juga melaksanakan intervensi bersesuaian di peringkat sekolah bagi menangani tingkah laku berisiko dalam kalangan murid termasuk ketagihan *mobile game* dan peranti digital. Bagi tujuan ini, Guru Bimbingan dan Kaunseling di sekolah melaksanakan Program Kaunseling Berfokus sebagai langkah intervensi kepada murid yang terlibat. Pendekatan seperti

bimbingan, kaunseling dan intervensi berterusan akan dapat membantu murid terlibat ke arah perubahan tingkah laku yang positif.

Pihak sekolah turut melaksanakan pelbagai program dan aktiviti menggalakkan gaya hidup sihat merangkumi aktiviti sukan dan kokurikulum. Antara aktiviti yang dilaksanakan adalah seperti kursus kepimpinan, jati diri, sukan, permainan dan aktiviti kesenian. Pelibatan murid dalam aktiviti ini dapat mengelakkan mereka daripada terlibat dalam aktiviti tidak sihat termasuk ketagihan *mobile game* dan peranti digital.

Untuk makluman Ahli Yang Berhormat, peranan ibu bapa dan penjaga juga sangat penting bagi menangani perkara ini kerana sebahagian besar daripada masa murid adalah di luar waktu persekolahan dan mereka berada bersama-sama keluarga. Dalam hal ini, kerjasama ibu bapa dan penjaga amat diperlukan untuk mendidik, mengawal dan memantau anak-anak mereka, termasuk penggunaan peranti digital secara bertanggungjawab. Di samping itu, KPM juga menggalakkan permuafakatan dan kerjasama antara pihak sekolah dengan Persatuan Ibu bapa dan Guru (PIBG) serta komuniti dalam merancang dan melaksanakan program yang bersesuaian untuk menangani permasalahan tersebut.

Selain itu, Program Ekspresi Anak Remaja Lestari (PEARL) turut dilaksanakan bagi tujuan pengesanan awal, tindakan intervensi bersesuaian dan pemantauan secara bersepadu untuk menangani tingkah laku berisiko dalam kalangan murid termasuk ketagihan *mobile game* dan peranti digital. Program ini melibatkan kerjasama dengan Kementerian Kesihatan Malaysia, Suruhanjaya Komunikasi Media Malaysia, Lembaga Perancangan Penduduk dan Keluarga Negara, Polis Diraja Malaysia, Jabatan Kemajuan Islam Malaysia, CyberSecurity serta agensi lain yang berkaitan.

KPM yakin usaha berterusan daripada pelbagai pihak yang dilaksanakan ini dapat meningkat kesedaran dan daya tahan murid dalam menangani cabaran dunia digital serta menggunakan peranti digital secara bertanggungjawab.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA
PARLIMEN KEEMPAT BELAS**

PERTANYAAN : JAWAB LISAN
DARIPADA : YB PUAN NOR AZRINA BINTI SURIP
[MERBOK]
TARIKH : 09 MAC 2022 (RABU)

SOALAN

PUAN NOR AZRINA BINTI SURIP [MERBOK] minta **MENTERI PERTANIAN DAN INDUSTRI MAKANAN** menyatakan apakah status rancangan Kementerian untuk mewujudkan subsidi makanan ternakan bersumberkan PKE (*Palm Kernel Expeller*) seperti yang dibentangkan di dalam Bajet 2022 lalu.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian ini telah diluluskan peruntukan sebanyak RM10 juta pada tahun 2022 bagi melaksanakan Program Bantuan Insentif Makanan Ternakan Ruminan Melalui Skim Harga Bersubsidi Dedak Isirung Sawit (PKC/PKE). Program ini bertujuan untuk meringankan beban kewangan penternak kecil ruminan yang terkesan akibat peningkatan harga makanan ternakan berasaskan PKC/PKE di pasaran.

Melalui program ini, ia dianggarkan memberi manfaat kepada seramai 30,000 orang penternak kecil ruminan iaitu penternak yang mempunyai 50 ekor ternakan atau kurang. Mereka dijangka akan menerima bantuan berbentuk wang RM300 yang dikreditkan kepada akaun penternak melalui Agrobank.

Penternak boleh mengemukakan permohonan melalui borang yang boleh didapati di Jabatan Perkhidmatan Veterinar (DVS), Pejabat Veterinar Daerah atau melalui laman web *www.dvs.gov.my*.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KE-EMPAT BELAS**

PERTANYAAN : JAWAB LISAN

**DARIPADA : YB TUAN CHAN MING KAI
[ALOR SETAR]**

TARIKH : 09 MAC 2022 (RABU)

SOALAN NO. 15

TUAN CHAN MING KAI [ALOR SETAR] Minta **MENTERI PENGANGKUTAN** menyatakan berapa jumlah pemilik kenderaan individu yang mempunyai daftar kenderaan melebihi satu kenderaan dan seterusnya setiap tambahan satu kenderaan sehingga pemilik yang mempunyai lebih daripada 20 daftar kenderaan.

JAWAPAN

Tuan Yang di-Pertua,

1. Jumlah individu yang mempunyai daftar kenderaan aktif melebihi satu kenderaan adalah 4,029,357 manakala yang melebihi 20 kenderaan pula adalah sebanyak 1,075.
2. Maklumat terperinci bagi pemilik yang mempunyai 1 sehigga 20 kenderaan sehingga 21 Februari 2022 adalah seperti berikut:

Bilangan Kenderaan	Jumlah Pemilik
1	6,300,673
2	2,562,306
3	920,576
4	319,174
5	113,016
6	43,545
7	18,526
8	8,873
9	16,817
10	9,846
11	5,938
12	3,805
13	2,572
14	1,833
15	425

NO. SOALAN: 15

16	298
17	256
18	190
19	154
20	132
Lebih >20	1075
JUMLAH	10,330,030

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA,
PARLIMEN KEEMPAT BELAS**

PERTANYAAN : JAWAB LISAN
DARIPADA : YB DATUK MOHD. AZIS BIN JAMMAN
[SEPANGGAR]
TARIKH : 09 MAC 2022 (RABU)

SOALAN

Datuk Mohd. Azis bin Jamman [Sepanggar] minta **MENTERI KOMUNIKASI DAN MULTIMEDIA** menyatakan adakah kajian berkenaan kos, kualiti capaian internet dan fleksibiliti telah dibuat berkenaan perkhidmatan Internet Starlink khususnya bagi kawasan-kawasan luar bandar dan pedalaman di Sabah dan Sarawak berbanding pembangunan infrastruktur internet di bawah Pelan Jalinan Digital Negara (JENDELA).

JAWAPAN

Tuan Yang di-Pertua,

Untuk makluman Ahli Yang Berhormat, permohonan Starlink untuk mendapatkan lesen di bawah Akta Komunikasi dan Multimedia 1998 (AKM98) masih di dalam peringkat penilaian Suruhanjaya Komunikasi dan Multimedia Malaysia (SKMM).

Dalam permohonan yang dikemukakan oleh Starlink, syarikat bercadang untuk menawarkan perkhidmatan internet melalui satelit terus kepada pengguna dengan kadar rata semasa iaitu RM415 atau USD\$99 sebulan serta kos pemasangan kit Starlink pada kadar RM2,091 atau USD\$499 (*one-time installation*).

Pelanggan pakej Starlink ini dijangka akan merasai pengalaman perkhidmatan internet dengan kelajuan +100Mbps pautan ke bawah (*downlink*), +40Mbps pautan atas (*uplink*) dan kurang daripada 20ms *latency* sebaik sahaja rangkaian tempatan Starlink disediakan sepenuhnya. Starlink tidak merancang untuk melaksanakan had data pada masa ini. Perkhidmatan Starlink boleh didapati di 25 negara dengan 145,000 pelanggan.

Perbandingan kelajuan perkhidmatan internet melalui satelit yang disediakan oleh Starlink di negara lain adalah seperti berikut:

- (i) Amerika Syarikat - 87.25Mbps (*Download*) 18.03Mbps (*Upload*)
- (ii) Canada - 84.55Mbps (*Download*) 13.87Mbps (*Upload*)
- (iii) United Kingdom - 111.66Mbps (*Download*) 16.02Mbps (*Upload*)
- (iv) Perancis - 102.15Mbps (*Download*) 19.84Mbps (*Upload*)
- (v) German - 95.4 Mbps (*Download*) 17.63Mbps (*Upload*)
- (vi) Belgium - 127.46Mbps (*Download*) 16.63Mbps (*Upload*)
- (vii) Australia - 138.12Mbps (*Download*) 22.63Mbps (*Upload*)
- (viii) New Zealand - 120.1Mbps (*Download*) 16.87Mbps (*Upload*)

Ingin dijelaskan bahawa Kerajaan melalui SKMM sentiasa terbuka untuk mana-mana pemberi perkhidmatan satelit untuk memberikan perkhidmatan jalur lebar secara komersil dengan syarat mempunyai lesen yang sah di bawah AKM98. Untuk perbandingan, MEASAT Satellite Systems Sdn Bhd, sebuah syarikat tempatan juga menawarkan pakej jalur lebar satelit menerusi produk ConnectMe pada kadar RM198 sebulan untuk kuota 60 GB dan RM298 sebulan bagi kuota 100GB pada kelajuan 25Mbps.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA,
PARLIMEN KEEMPAT BELAS**

PERTANYAAN : JAWAB LISAN
DARIPADA : YB DATUK SERI PANGLIMA HAJAH AZIZAH
BINTI DATUK SERI PANGLIMA HAJI MOHD
DUN [BEAUFORT]
TARIKH : 09 MAC 2022 (RABU)

SOALAN

Datuk Seri Panglima Hajah Azizah Binti Datuk Seri Panglima Haji Mohd Dun [Beaufort] minta **MENTERI PEMBANGUNAN WANITA, KELUARGA DAN MASYARAKAT** menyatakan setakat ini berapa peratus penglibatan wanita sebagai pembuat keputusan di sektor Kerajaan dan swasta.

JAWAPAN

Tuan Yang di-Pertua,

Kementerian Pembangunan Wanita, Keluarga dan Masyarakat (KPWKM) sentiasa menyokong usaha meningkatkan penglibatan wanita sebagai pembuat keputusan di sektor Kerajaan dan swasta.

Berdasarkan statistik Jabatan Perkhidmatan Awam (JPA), peratus penjawat awam wanita di peringkat pembuat keputusan melalui pengisian Gred Utama C dan ke atas telah meningkat daripada 38.2% pada tahun 2020 ke 38.8% bagi tahun 2021.

Bagi sektor swasta, data daripada Suruhanjaya Syarikat Malaysia (SSM) yang merangkumi Syarikat Sendirian Berhad dan Syarikat Awam Berhad (Termasuk Syarikat Tersenarai Awam dan Syarikat Tidak Tersenarai Awam) di pelbagai sektor menunjukkan bilangan wanita sebagai Ahli Lembaga Pengarah telah meningkat daripada 26% pada tahun 2020 kepada 27% pada tahun 2021.

Usaha Kerajaan untuk meningkat penglibatan wanita sebagai pembuat keputusan di sektor swasta diteruskan dengan pengumuman Bajet 2022 yang mewajibkan pelantikan sekurang-kurangnya seorang pengarah wanita bagi semua syarikat tersenarai awam yang akan berkuat kuasa pada 1 September 2022 untuk syarikat bermodal besar, dan 1 Jun 2023 untuk syarikat tersenarai yang lain. Inisiatif ini akan diselaraskan oleh Suruhanjaya Sekuriti.

NO SOALAN: 17

KPWKM sentiasa bersedia untuk bekerjasama dengan pelbagai pihak dalam menyokong penglibatan wanita secara produktif agar lebih ramai wanita terlibat sebagai pembuat keputusan.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA,
PARLIMEN KEEMPAT BELAS**

PERTANYAAN : JAWAB LISAN

DARIPADA : YB TUAN NOOR AMIN BIN AHMAD (KANGAR)

TARIKH : 9 MAC 2022 (RABU)

SOALAN

TUAN NOOR AMIN BIN AHMAD (KANGAR) minta **MENTERI
PENGAJIAN TINGGI** menyatakan apakah rasional penggabungan fakulti
dan kolej kediaman yang sedang dilaksanakan di beberapa buah universiti
ketika ini.

JAWAPAN

Tan Sri Yang di-Pertua,

Untuk makluman Ahli Yang Berhormat, penggabungan fakulti dan juga kolej kediaman yang sedang dilaksanakan di beberapa buah universiti ketika ini telah mengambil kira pertimbangan pelbagai aspek termasuk keberhasilan, kewangan semasa universiti, dan sebagainya.

Dalam konteks fakulti, rasional penggabungannya termasuklah bagi:

- i. Mewujudkan sinergi positif antara fakulti dengan menggabungkan kekuatan dalam penawaran program serta penyelidikan dalam bidang *nic* (*niche area*) yang lebih kompetitif;
- ii. Membentuk simbiosis yang lebih berkesan antara staf akademik, pentadbiran, dan teknikal dalam memastikan keberhasilan aktiviti pengajaran dan pembelajaran, penyelidikan, dan inovasi yang impaknya merentas pelbagai disiplin ilmu;
- iii. Mengukuhkan inisiatif penjanaan pendapatan oleh universiti melalui penganjuran program eksekutif dan perkhidmatan perundingan;
- iv. Mengoptimumkan penggunaan atau perkongsian fasiliti dan peralatan makmal secara lebih efisien dan bersasar, sekaligus meningkatkan penghasilan penyelidikan yang berkualiti dan berimpak tinggi di peringkat prasiswazah dan pascasiswazah;
- v. Membolehkan penyelarasan penempatan tenaga akademik dibuat mengikut kelayakan bidang atau disiplin masing-masing bagi memastikan kepakaran dan sumber guna tenaga dioptimumkan, seterusnya menyediakan laluan kerjaya yang lebih berfokus kepada setiap staf yang berkenaan; dan
- vi. Mengurangkan kos pelbagai urusan, di samping menghasilkan impak yang lebih signifikan dalam melonjakkan keberkesanan pengurusan dan operasi, khususnya fakulti.

Manakala bagi penggabungan kolej kediaman pula, rasionalnya adalah bagi:

- i. Memantapkan penganjuran aktiviti oleh pelajar agar dapat lebih baik dan memberikan impak kepada kumpulan sasaran di samping mencapai objektif penganjuran;
- ii. Mempertingkatkan kualiti perkhidmatan setiap kolej kediaman melalui pengurusan pusat tanggungjawab yang lebih mampan dan berkesan;
- iii. Mewujudkan ruang komunikasi kerja yang kondusif dengan mengambil kira fungsi utama setiap kolej kediaman;
- iv. Menguruskan sumber manusia dengan lebih efisien agar dapat digunakan secara optimum serta mengurangkan pertindihan proses kerja dan perkhidmatan kepada pelajar; dan
- v. Memberikan penjimatan dari aspek kewangan yang melibatkan operasi kerja dan pengurusan pejabat di setiap kolej kediaman.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS**

PERTANYAAN : JAWAB LISAN

**DARIPADA : YB DATUK HAJI AHMAD JAZLAN BIN
YAAKUB (MACHANG)**

TARIKH : 9 MAC 2022 (RABU)

SOALAN NO.19

DATUK HAJI AHMAD JAZLAN BIN AHMAD [MACHANG] minta **MENTERI PENGANGKUTAN** menyatakan berkenaan isu Tuntutan Hak Penghantar Malaysia kepada Kerajaan bagi mewujudkan sebuah badan kawal selia yang mengkaji peraturan berkaitan penyedia perkhidmatan dan penghantar yang lebih adil dan realistik.

JAWAPAN

Tuan Yang di-Pertua,

1. Susulan pandemik COVID-19, Kementerian Pengangkutan mendapati sektor perkhidmatan penghantaran barangan ini mempunyai potensi yang besar untuk berkembang luas seterusnya membawa manfaat sosio-ekonomi kepada rakyat Malaysia, terutamanya melibatkan kumpulan B40. Sektor perkhidmatan ini akan menjadi satu norma baharu selepas pandemik COVID-19 berakhir dan menjadi satu punca pendapatan alternatif/baharu kepada mereka yang telah kehilangan pekerjaan. Di samping itu, kelestarian jangka masa panjang perkhidmatan penghantaran barangan menggunakan motokar dan motosikal (perkhidmatan p-hailing) akan turut menyumbang kepada usaha untuk menjana semula pembangunan ekonomi negara dengan melahirkan lebih banyak perniagaan dan usahawan tempatan baharu, berikutan sistem penghantaran barangan yang lebih mudah dan tersedia.

2. Justeru, perkhidmatan kenderaan barangan p-hailing perlu dikawal selia dan dilesenkan seperti mana ketetapan di dalam undang-undang sedia ada iaitu Akta 333, Akta 334 dan Akta 715. Pelesenan perkhidmatan ini juga akan membolehkan Kerajaan mengawal selia perkhidmatan p-hailing bagi memastikan industri ini adalah berdaya saing, adil, mempunyai tahap perkhidmatan yang terbaik, terkawal dan selamat untuk kebajikan dan manfaat semua pihak terlibat.

3. Walau bagaimanapun, Suruhanjaya Komunikasi dan Multimedia Malaysia (SKMM) turut melesenkan perniagaan syarikat yang menjalankan perkhidmatan pos di bawah Peraturan-Peraturan Perkhidmatan Pos (Pelesenan) 2015, Akta Perkhidmatan Pos 2012 [Akta 741] hanya melibatkan barang pos seperti surat, bungkus-ikat, bungkusan, pembalut atau kontena yang dikutip/diserahkan menerusi rangkaian pos. Barang pos tersebut adalah 2kg ke bawah sahaja.

4. Dalam masa yang sama, Kementerian Pengangkutan akan bekerjasama dengan Kementerian/Agensi yang terlibat bagi membangun dan memuktamadkan semua peraturan/syarat perkhidmatan dan pengoperasian perkhidmatan p-hailing dan memastikan segala proses-proses berjalan lancar dan memudahkan orang ramai.
5. Selain itu, mengikut maklumat daripada Kementerian Sumber Manusia (KSM), pihaknya buat masa ini sedang dalam fasa awal mengumpulkan maklumat berkaitan keperluan pekerja-pekerja dalam sektor gig terutamanya bagi pekerja e-hailing dan p-hailing.
6. Dalam hubungan ini, KSM mengadakan beberapa sesi libat urus bersama pihak-pihak berkepentingan termasuklah beberapa penyedia perkhidmatan dan penghantar bagi mendapatkan maklumat berhubung situasi sebenar sektor ini. KSM juga akan mengadakan kajian yang mendalam ke atas keperluan pekerja dalam sektor ini bagi mengenal pasti isu dan dasar yang berkesan untuk memberi perlindungan kepada golongan ini.
7. Hasil dapatan daripada sesi libat urus dan kajian ini juga kelak akan dapat digunakan dalam membantu Kementerian-Kementerian lain yang terlibat dalam merangka suatu peraturan atau kaedah berkaitan penyediaan perkhidmatan dan penghantar bagi memastikan keperluan yang lebih adil dan realistik dapat dibentuk.

Sekian, terima kasih

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA
PARLIMEN KEEMPAT BELAS**

**PERTANYAAN : JAWAB LISAN
DARIPADA : YB DATUK ROZMAN BIN ISLI [LABUAN]
TARIKH : 09 MAC 2022 (RABU)**

SOALAN

DATUK ROZMAN BIN ISLI [LABUAN] minta **MENTERI PERTANIAN DAN INDUSTRI MAKANAN** menyatakan apakah usaha dan langkah segera yang diambil bagi mewujudkan lebih ramai usahawan yang terlibat di dalam industri komponen makanan ternakan bagi mengurangkan kebergantungan kepada sumber import.

JAWAPAN

Tuan Yang di-Pertua,

Untuk makluman Ahli Yang Berhormat, pada masa ini negara masih bergantung kepada sumber bahan mentah yang diimport seperti jagung bijian dan *soybean meal* (SBM) untuk menghasilkan makanan ternakan. Namun demikian, MAFI melalui Jabatan Perkhidmatan Veterinar (DVS) sentiasa berusaha bagi mengurangkan kebergantungan import dengan mewujudkan lebih ramai usahawan dalam industri komponen makanan ternakan. Antara usaha-usaha yang telah dilaksanakan adalah:

- (i) Melaksanakan Projek Pembangunan Industri Jagung Bijian Negara dengan melibatkan pembabitin beberapa agensi di bawah MAFI seperti Jabatan Pertanian, Institut Penyelidikan dan Kemajuan Pertanian Malaysia (MARDI) dan Lembaga Pertubuhan Peladang dengan peruntukan keseluruhan berjumlah RM 30.63 juta. Inisiatif yang bermula pada tahun 2016 ini telah berjaya menarik penyertaan seramai 50 orang usahawan dengan sasaran pengeluaran jagung bijian tempatan sebanyak 1.44 juta metrik tan dengan keluasan tanaman sehingga 80,000 hektar menjelang tahun 2032. Melalui projek ini, diharap kebergantungan negara terhadap sumber jagung bijian import dapat dikurangkan sehingga 30%;
- (ii) Bekerjasama dengan MARDI, Malaysian Palm Oil Board (MPOB) dan SIME Darby Plantation dalam penyelidikan bagi menghasilkan bahan mentah gantian berasaskan isirung sawit (PKC) tempatan seperti "Purafex". Produk ini sesuai digunakan

sebagai komponen dalam formulasi makanan unggas dan boleh menggantikan jagung bijian dan SBM sebanyak 30% hingga 45%;

- (iii) Menyediakan kawasan untuk pengeluaran pastura kepada penternak-penternak di rizab padang ragut, Taman Kekal Pengeluaran Makanan (TKPM) dan Taman Kekal Pengeluaran Ruminan (TKPR);
- (iv) Menyediakan bantuan/geran berupa input pertanian seperti benih, mesin dan peralatan kecil khususnya kepada golongan muda melalui Program Agropreneur Muda; dan
- (v) Memberikan khidmat nasihat dan perundingan teknikal kepada penternak-penternak melalui ejen pengembangan DVS khususnya dalam aspek penanaman rumput dan penghasilan makanan ternakan.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA,
PARLIMEN KEEMPAT BELAS**

PERTANYAAN : JAWAB LISAN
DARIPADA : YB TUAN HASSAN BIN ABDUL KARIM
[PASIR GUDANG]
TARIKH : 09 MAC 2022 (RABU)

SOALAN

Tuan Hassan bin Abdul Karim [Pasir Gudang] minta **MENTERI KOMUNIKASI DAN MULTIMEDIA** menyatakan apakah usaha Kementerian untuk menaik taraf pencapaian internet di kawasan Parlimen Pasir Gudang yang terletak bersebelahan dengan Singapura yang begitu maju liputan internetnya sehingga mengganggu capaian internet rakyat Pasir Gudang.

JAWAPAN

Tuan Yang Dipertua,

Untuk makluman Ahli Yang Berhormat, isu limpahan isyarat biasanya terjadi disebabkan oleh ciri-ciri isyarat yang tidak terhad mengikut sempadan geografi. Isu limpahan isyarat ini bukan sahaja melibatkan sempadan Malaysia dan Singapura, malah ia juga berlaku di sempadan Malaysia dengan negara-negara lain seperti Thailand, Indonesia dan Brunei.

Setiap negara perlu memastikan tiada limpahan isyarat ke negara jiran. Oleh yang demikian, bagi mengatasi isu limpahan isyarat frekuensi dari Singapura yang berkemungkinan mengganggu capaian internet rakyat di Pasir Gudang, perkara ini dibincangkan di antara negara-negara yang terlibat secara berkala di dalam mesyuarat-mesyuarat koordinasi sempadan seperti berikut:

- (a) Mesyuarat Koordinasi Trilateral antara Indonesia, Malaysia dan Singapura;
- (b) Mesyuarat FACSMAB (*Frequency Assignment Committee, Singapore, Malaysia And Brunei Darussalam*) antara Malaysia, Brunei dan Singapura ;
- (c) Mesyuarat HSC-SWG (*Heterogeneous Network and Spillage Coordination Sub-Working Group*) antara pembekal-pembekal perkhidmatan dari Malaysia, Brunei dan Singapura.

Isu berkaitan limpahan frekuensi dan gangguan perayauan (*roaming*) dibincangkan secara berterusan dalam mesyuarat koordinasi sempadan dengan beberapa kaedah penyelesaian yang dipersetujui, termasuk:

- (a) Koordinasi dan penyelarasan penggunaan spektrum di kawasan sempadan negara untuk meminimumkan limpahan/gangguan ke negara jiran;
- (b) Beberapa kaedah pengurangan limpahan isyarat telah dibuat oleh pengendali perkhidmatan syarikat telekomunikasi di Malaysia dan Singapura; dan
- (c) Menekankan aspek kesedaran kepada pengguna seperti mendidik pengguna agar tidak mengaktifkan ciri perayauan antarabangsa dan membuat pemilihan perkhidmatan rangkaian pada telefon bimbit secara manual.

Untuk makluman, Suruhanjaya Komunikasi dan Multimedia Malaysia (SKMM) sentiasa menyemak isu limpahan isyarat sebagai salah satu aktiviti audit pengukuran isyarat bagi semua pembekal perkhidmatan. Sepanjang tahun 2022, sebanyak 3,000 lokasi telah dirancang di seluruh negara bagi aktiviti audit pengukuran isyarat ini yang mana memfokuskan semua lokasi yang pernah menerima aduan liputan dalam tahun 2021.

Terdapat dua aduan limpahan dalam tahun 2021 telah diterima dan diselesaikan oleh pihak penyedia perkhidmatan di kawasan Pasir Gudang iaitu di Kawasan Perindustrian Tanjung Langsung dan Kampong Senibong.

Selain itu, terdapat aduan limpahan lain telah diterima oleh pihak penyedia perkhidmatan dan telah diselesaikan iaitu di negeri Johor sebanyak tiga aduan limpahan, dua aduan di Sarawak dan satu aduan di Kelantan. Ini menunjukkan bahawa isu limpahan ini bukan sahaja berlaku di Pasir Gudang malah boleh berlaku di mana-mana kawasan yang berada berdekatan dengan sempadan antara dua buah negara Malaysia dan Singapura serta negara lain.

Ahli Yang Berhormat adalah dipohon untuk berkongsi maklumat lokasi terperinci yang mengalami isu limpahan isyarat ini agar SKMM boleh merancang audit pengukuran isyarat dengan lebih tepat. Pada masa yang sama, orang awam yang berada berdekatan dengan sempadan negara dinasihatkan memilih tetapan pembekal perkhidmatan tempatan secara manual dan tidak mengaktifkan mod data *roaming* yang sekarang sudah ada pada semua telefon pintar bagi mengelakkan caj penggunaan *roaming*. Untuk makluman lebih lanjut, orang awam boleh merujuk kepada pembekal perkhidmatan masing-masing untuk bantuan tetapan pada setiap telefon pintar.

Bagi menambah baik capaian internet, antara inisiatif untuk menambah baik infrastruktur di Johor dan Parlimen Pasir Gudang melalui Pelan Jalinan Digital Negara (JENDELA) Fasa 1 setakat suku keempat 2021 adalah seperti berikut:

Inisiatif	Tapak Menara Baharu		Naik Taraf Stesen Pemancar		Premis Tersedia Gentian Optik		Jalur Lebar Satelit	
	Perancangan	Siap	Perancangan	Siap	Perancangan	Siap	Siap	Pelaksanaan
Johor	222	109	3,587	3,700	413,494	246,901	8	3
Pasir Gudang	12	13	397	424	29,732	31,345	-	-

Peratusan liputan 4G di kawasan berpenduduk di Parlimen Pasir Gudang adalah 99.19% pada suku keempat 2021. Usaha penambahbaikan rangkaian sentiasa diteruskan untuk memberikan kualiti pengalaman yang lebih baik kepada pengguna.

Selain dari pembinaan menara-menara telekomunikasi, Pihak Kerajaan turut akan melaksanakan penyediaan infrastruktur jalur lebar menggunakan kaedah *Point of Presence* (PoP) hab gentian optik yang merupakan salah satu alternatif dalam memastikan jaringan dan liputan infrastruktur jalur lebar dapat diperluaskan ke kawasan sekitar sekolah dan berpenduduk dengan lebih baik.

Pelaksanaan ini akan menjadikan lokasi berhampiran sekolah luar bandar sebagai hub untuk menyediakan infrastruktur jalur lebar gentian optik untuk kegunaan sekolah, kawasan perindustrian, premis-premis kerajaan berhampiran dan masyarakat sekelilingnya. Fasa 1 akan melibatkan 630 lokasi berhampiran sekolah dan Fasa 2 pula akan melibatkan 3693 lokasi berhampiran sekolah di kawasan luar bandar di seluruh negara. Sekurang-kurangnya sebanyak 432,300 premis akan menerima perkhidmatan jalur lebar berkelajuan tinggi apabila projek ini siap kelak. Keseluruhan jumlah PoP di kawasan luar bandar di negeri Johor adalah sebanyak 618 dan daripada jumlah tersebut pula sebanyak 1 adalah di Parlimen Pasir Gudang.

Pelaksanaan JENDELA akan terus digiatkan bagi memastikan impak pelaksanaannya dapat diterima dengan cepat oleh Rakyat. Ini termasuklah mengkaji semula secara berkala sasaran-sasaran awal yang telah ditetapkan sebelum ini seperti bilangan menara baharu yang akan dibina, stesen pemancar yang dinaiktaraf serta premis-premis yang mendapat akses gentian optik bagi memastikan keperluan Rakyat sentiasa diutamakan.

Menerusi portal *JENDELA Map* (<https://jendela.my>) yang telah dilancarkan pada Julai lepas, maklumat yang diperoleh daripada pengguna secara terus secara sumber khalayak atau *crowdsourcing*, dapat digunakan sebagai maklumat bagi membuat perancangan penambahbaikan liputan dan kualiti perkhidmatan jalur lebar dari semasa ke semasa.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA
PARLIMEN KEEMPAT BELAS**

**PERTANYAAN : JAWAB LISAN
DARIPADA : YB DATO' HAJI AHMAD NAZLAN BIN IDRIS
[JERANTUT]
TARIKH : 09 MAC 2022 (RABU)**

SOALAN

DATO' HAJI AHMAD NAZLAN BIN IDRIS [JERANTUT] minta **MENTERI PERTANIAN DAN INDUSTRI MAKANAN** menyatakan peranan MAFI dalam membantu mangsa banjir yang terjejas daripada golongan petani, penternak dan nelayan serta setakat ini berapa ramai yang telah menerima bantuan dan jumlah peruntukan yang terlibat.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian sentiasa prihatin dalam menyantuni wira agro seperti pesawah, pekebun-pekebun kecil, penternak dan lain-lain terutama yang mengalami kerugian akibat ditimpa bencana, termasuklah bencana banjir yang melanda negara baru-baru ini. Dua (2) bentuk bantuan yang disediakan oleh MAFI kepada golongan sasaran yang terkesan akibat bencana ialah Program Pembangunan Semula Projek Agromakanan (PPSPA) dan Tabung Bencana Tanaman Padi (TBTP).

Pada tahun 2022, Kementerian telah menerima agihan peruntukan sejumlah RM50 juta di bawah PPSPA yang disasarkan kepada wira agro sektor agromakanan seperti petani, penternak, nelayan, pengusaha akuakultur, pengusaha agropelancongan dan industri agromakanan. Secara umumnya bantuan PPSPA ini bertujuan untuk meringankan beban kerugian dan membantu golongan sasaran Kementerian untuk membangunkan semula aktiviti-aktiviti agromakanan dan bukan bertujuan untuk membayar ganti rugi kerosakan akibat bencana.

Wira agro di bawah 11 sektor merangkumi tanaman buah-buahan, sayur-sayuran, fertigasi, tanaman komoditi tinggi, tanaman makanan ternakan, ternakan veterinar, akuakultur, nelayan, nelayan darat, industri asas tani (IAT) dan agropelancongan yang terkesan akibat bencana banjir baru-baru ini adalah layak untuk menerima bantuan ini.

Dalam hal ini, kadar bantuan adalah sehingga 50% daripada nilai kerugian wira agro tertakluk kepada keluasan maksimum yang telah ditetapkan dan penilaian kerugian di peringkat Jawatankuasa Teknikal PPSPA. Berdasarkan kelulusan Jawatankuasa Induk PPSPA pada Januari 2022, sejumlah RM20.84 juta peruntukan telah diluluskan melibatkan 1,821 wira agro. Bantuan akan diberikan dalam bentuk *in-kind* seperti input pertanian, peralatan, mesin atau mana-mana yang bersesuaian.

Bagi pesawah dan pengusaha padi dalam dan luar jelapang padi negara yang terjejas pengeluaran padi akibat faktor di luar kawalan yang berlaku dalam tempoh penanaman padi adalah layak untuk memohon bantuan melalui Tabung Bencana Tanaman Padi (TBTP). Kategori bencana tanaman padi adalah seperti berikut:

- i. Kejadian bencana alam seperti banjir, ribut taufan, gempa bumi, tsunami, *el-nino*, ombak besar, kemarau dan tanah runtuh;
- ii. Kejadian empangan/takungan air pecah;
- iii. Penyakit tanaman padi yang bukan disebabkan oleh kecuaiian manusia; dan
- iv. Lain-lain kejadian bencana yang akan diperaku dan diisytiharkan Jabatan Teknikal dan Jawatankuasa Teknikal (TBTP).

Permohonan ini dibuka sepanjang tahun di mana pesawah boleh membuat permohonan dalam tempoh 14 hari semasa kejadian bencana berlaku. Semua permohonan oleh pesawah perlu dikemukakan kepada Jabatan Pertanian (*Department of Agriculture* atau DOA) Negeri dan Daerah masing-masing sebelum disahkan oleh Jawatankuasa Teknikal TBTP di peringkat DOA Ibu Pejabat dan seterusnya diluluskan oleh Jawatankuasa Induk TBTP di peringkat Kementerian.

Sehingga 10 Disember 2021, seramai 9,082 orang pesawah dengan keluasan 10,846.82 hektar telah mendapat manfaat melalui TBTP yang melibatkan bantuan berjumlah RM13,637,896.65. Bagi tahun 2022, permohonan di peringkat negeri sedang diteliti dengan anggaran permohonan sebanyak RM2 juta.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA,
PARLIMEN KEEMPAT BELAS**

**PERTANYAAN : JAWAB LISAN
DARIPADA : YB TUAN MUHAMMAD BAKHTIAR BIN WAN
CHIK [BALIK PULAU]
TARIKH : 09 MAC 2022 (RABU)**

SOALAN

TUAN MUHAMMAD BAKHTIAR BIN WAN CHIK [BALIK PULAU] minta **MENTERI PELANCONGAN, SENI DAN BUDAYA** menyatakan kedudukan terkini pelabur asing di dalam industri ekopelancongan dalam negara dan sebarang jalinan kerjasama sektor awam dan swasta dalam meningkatkan lagi industri ekopelancongan.

JAWAPAN

Tuan Yang di-Pertua,

1. Kerajaan sentiasa mempromosi pelaburan dalam industri pelancongan termasuklah segmen ekopelancongan. Bagi tujuan tersebut, Kerajaan menawarkan insentif cukai bagi aktiviti yang digalakkan seperti projek-projek pelancongan termasuk hotel, taman tema, pusat konvensyen, taman rekreasi dan projek-projek pelancongan lain. Ini termasuklah insentif bagi pengembangan, pemodenan dan pembaharuan projek-projek pelancongan tersebut.
2. Berdasarkan maklumat yang diterima daripada Lembaga Pembangunan Pelaburan Malaysia (MIDA), sehingga 30 September 2021, sebanyak 12 projek pelancongan yang menerima pelaburan asing telah diluluskan oleh MIDA dengan nilai pelaburan sebanyak RM2.6bilion.
3. Seperti Ahli Yang Berhormat sedia maklum, penularan wabak COVID-19 dan Perintah Kawalan Pergerakan (PKP) secara berfasa yang dilaksanakan di seluruh negara pada tahun 2020 dan 2021 telah membawa cabaran yang besar kepada pelaksanaan program-program kerjasama yang dirancang sebelum ini. Walau bagaimanapun, Kementerian Pelancongan, Seni dan Budaya (MOTAC) tetap berusaha mengadakan sebanyak mungkin program bersama penggiat industri dalam membantu memulih dan merancakkan kembali industri pelancongan negara termasuk ekopelancongan dalam tempoh luar PKP.

4. Antara program kerjasama berkaitan ekopelancongan yang telah diadakan adalah:

(i) Kerjasama antara MOTAC dengan Kerajaan Negeri, Pihak Berkuasa Tempatan, agensi pelancongan negeri, persatuan pelancongan, dan pelajar-pelajar Institut Pengajian Awam/Swasta di Negeri Melaka seperti:

(a) Voluntourism Malaysia Bersih & Indah : Cintailah Sungai Melaka pada 21 Mac 2021 yang disertai oleh seramai 250 peserta daripada Majlis Bandaraya Melaka Bersejarah (MBMB), Perbadanan Pembangunan Sungai dan Pantai Melaka (PPSPM), SWCorp, dan Koperasi Kakitangan Istana Melaka Berhad (KOKAIM);

(b) Virtual Eco Experience @ Taman Eko-Rimba Bukit Batu Lebah pada 16 September 2021 yang melibatkan peserta daripada Jabatan Ketua Menteri Melaka, Jabatan Perhutanan Negeri Melaka, Persatuan Pemandu Pelancong Melaka Bandaraya Bersejarah (MHCTGA), Kolej Universiti Islam Melaka (KUIM), UiTM Melaka dan Politeknik Merlimau Melaka; dan

(c) Voluntourism Malaysia Bersih & Indah : Nature For Mental Health pada 23 Oktober 2021 yang disertai oleh 100 orang peserta daripada Majlis Perbandaran

NO SOALAN: 23

Hang Tuah Jaya (MPHTJ), Jabatan Perhutanan Negeri Melaka, Kolej Universiti Islam Melaka (KUIM), UiTM Melaka, APM Melaka Tengah dan Politeknik Muadzam.

- (ii) Kerjasama antara MOTAC dan Tourism Malaysia dengan Pihak Berkuasa Tempatan, persatuan pelancongan, persatuan nelayan dan pelajar-pelajar Institut Pengajian Swasta dalam menganjurkan program Voluntourism : Malaysia Bersih Indah @ Pulau Jerejak, Pulau Pinang pada 20 November 2021 melibatkan 80 orang peserta daripada Pejabat Daerah & Tanah Timur Laut, Majlis Bandaraya Pulau Pinang, Pemandu Pelancong dari Persatuan Pemandu Pelancong Pulau Pinang (PTGA), Pemandu Pelancong dari Persatuan Pemandu Pelancong Mutiara Pulau Pinang (PPPM), Pemandu Pelancong dari Persatuan Pemandu Pelancong Wanita Malaysia (Cawangan Pulau Pinang) (MWTGA), pelajar-pelajar Kolej Cosmopoint Pulau Pinang, pegawai dan kakitangan Jambatan Kedua Sdn.Bhd. dan Persatuan Nelayan Seri Jerejak;
- (iii) Kerjasama antara Tourism Malaysia dengan agensi pelancongan, syarikat penerbangan, pengusaha hotel, pengusaha inap desa serta syarikat elektronik dan komunikasi seperti:
 - (a) Pembangunan pakej pelancongan oleh 10 agensi pelancongan yang menawarkan pakej Destinasi

NO SOALAN: 23

Pengembaraan Lasak dan Alam Semulajadi. Antara aktiviti ekopelancongan yang dipakejkan termasuklah *houseboat, white water rafting, bamboo rafting, birdwatching, caving, rock climbing, wildlife watching, camping* dan *hiking*;

- (b) Pakej-pakej ini kemudiannya dipromosikan, antaranya menerusi kempen digital seperti pada laman sesawang Tourism Malaysia iaitu *www.malaysia.travel*; dan
- (c) Kerjasama dengan syarikat komunikasi dan elektronik seperti Oppo, Sharp dan GoPro bagi penyiaran video pelancongan, rakaman video pelancongan serta mengadakan pertandingan fotografi.

5. Pada masa yang sama, MOTAC turut bekerjasama dengan institusi perbankan seperti Bank Pembangunan Malaysia Berhad (BPMB) bagi penawaran insentif yang boleh dimanfaatkan oleh penggiat industri berkaitan ekopelancongan, antaranya Skim Infrastruktur Pelancongan (SIP).

6. Kerjasama juga turut dilaksanakan dengan MIDA bagi menggalakkan pelaburan dalam sektor pelancongan seperti pengecualian cukai untuk pelaksanaan projek-projek pelancongan di Malaysia. Insentif ini diberikan kepada pengusaha projek penginapan dan projek bukan penginapan yang diberi Sijil Pendaftaran Projek Pelancongan oleh MOTAC serta memenuhi kriteria-kriteria yang ditetapkan oleh MIDA.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA,
PARLIMEN KEEMPAT BELAS**

PERTANYAAN : JAWAB LISAN
DARIPADA : DATO' SYED ABU HUSSIN BIN HAFIZ SYED
ABDUL FASAL [BUKIT GANTANG]
TARIKH : 09 MAC 2022 (RABU)

SOALAN

DATO' SYED ABU HUSSIN BIN HAFIZ SYED ABDUL FASAL [BUKIT GANTANG] minta **MENTERI PERTANIAN DAN INDUSTRI MAKANAN** menyatakan usaha-usaha yang telah dibuat Kementerian bagi meningkatkan penglibatan anak muda dalam Industri Agropelancongan serta bentuk bantuan, latihan, bimbingan dan usahasama strategik bersama Kerajaan Negeri bagi membangunkan danewartakan kawasan Agropelancongan di kawasan Kampung Dew (habitat kelip-kelip) Kuala Sepetang (pokok paya bakau dan dolphin merah jambu), Kuala Trong (kaki pancing), Sungai Tiram (rumah rakit, dolphin merah jambu, ternakan kupang dan ikan sangkar) Sungai Kelubong (rumah rakit, restoran terapung dan pemandangan matahari terbenam) dalam Parlimen Bukit Gantang dan Bagan Panchor, Perak (ternakan kerang dan aktiviti kapal laut dalam).

JAWAPAN

Tuan Yang di-Pertua,

Untuk makluman ahli-ahli Yang Berhormat, Kementerian sememangnya turut memberi perhatian yang sewajarnya kepada sektor agropelancongan. Walau bagaimanapun, pewartaan kawasan sebagai pusat agropelancongan di lokasi yang dicadangkan oleh YB Parlimen Bukit Gantang adalah di bawah bidang kuasa Kerajaan Negeri.

Kementerian ini sememangnya sentiasa bersedia untuk bekerjasama dalam membangunkan pusat-pusat agropelancongan bersama Kementerian Pelancongan, Seni dan Budaya Malaysia (MOTAC) dan Kerajaan Negeri yang terlibat. Di antara inisiatif Kementerian untuk menarik minat pelbagai lapisan masyarakat termasuk golongan muda untuk melibatkan diri dalam industri agropelancongan adalah seperti berikut:

- i. **Geran membina dan menaiktaraf infrastruktur serta kualiti perkhidmatan di pusat agropelancongan.**

Setiap tahun, Kerajaan menyediakan peruntukan untuk program agropelancongan dengan memberi bantuan geran membina dan menaiktaraf infrastruktur kepada pusat-pusat agropelancongan yang diusahakan oleh golongan sasar. Objektif program ini adalah untuk memperkasakan aktiviti ekonomi dan keusahawanan masyarakat tani dengan mempelbagaikan sumber pendapatan mereka serta membuka peluang pekerjaan baru kepada penduduk setempat. Pada tahun 2021, sejumlah RM3.89 juta telah

disalurkan kepada 40 pusat agropelancongan manakala pada tahun 2020 sejumlah RM3.36 juta geran telah diberikan kepada 35 pusat agropelancongan. MAFI sentiasa terbuka untuk memberi bantuan kepada usahawan dalam bentuk mempertingkatkan kemudahan prasarana serta kemudahan di pusat agropelancongan tertakhluk kepada syarat dan kriteria kelayakan yang telah ditetapkan;

ii. Mempergiat aktiviti promosi dengan kerjasama pihak berkepentingan dalam industri pelancongan

Keadaan pandemik COVID-19 semasa dalam negara ini telah memberi impak yang besar kepada pengusaha-pengusaha pusat agropelancongan. Oleh yang demikian, aktiviti promosi berskala besar secara fizikal tidak dapat dilaksanakan sepenuhnya pada tahun 2020 sehingga 2021. Salah satu usaha Kementerian untuk mempergiatkan promosi pada tahun ini adalah dengan menjalin kerjasama bersama pihak-pihak berkepentingan dalam mempromosikan pusat-pusat agropelancongan di peringkat domestik serta antarabangsa seperti Kementerian Pelancongan, Seni dan Budaya Malaysia (MOTAC), Tourism Malaysia dan agensi pelancongan swasta; dan

iii. Khidmat nasihat dan bimbingan jabatan dan agensi, MAFI

Kementerian dengan jabatan dan agensi di bawahnya turut memberikan khidmat nasihat kepada pengusaha pusat agropelancongan yang berminat untuk memantapkan lagi industri agropelancongan melalui pelaksanaan program latihan yang lebih

komprehensif kepada pengusaha pusat agropelancongan termasuk memperkasakan elemen pemasaran produk dan perkhidmatan mereka secara digital. Tranformasi ke arah pengadaptasian teknologi mewujudkan persekitaran yang lebih berdaya saing dan menyumbang kepada peningkatan kualiti penyampaian yang lebih meluas, menjamin kelestarian ekosistem serta memperluaskan kebolehcapaian kepada produk serta perkhidmatan agropelancongan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KE-EMPAT BELAS**

PERTANYAAN : JAWAB LISAN

**DARIPADA : YB PUAN MARIA CHIN BINTI ABDULLAH
(PETALING JAYA)**

TARIKH : 9 MAC 2022 (RABU)

SOALAN NO. 25

PUAN MARIA CHIN BINTI ABDULLAH [PETALING JAYA] minta MENTERI PENGANGKUTAN menyatakan apakah punca program My30 digantikan dengan My50 di kala rakyat terkesan dengan kenaikan harga barang kerana menaikkan 67% dari harga asal menambahkan lagi beban rakyat yang bergantung kepada pengangkutan awam sebagai pengangkutan utama.

JAWAPAN

Tuan Yang di-Pertua,

1. Program pas perjalanan tanpa had My30 ini hanyalah merupakan satu program yang bersifat “sementara” diperkenalkan oleh Kerajaan bagi mengurangkan kesan kewangan kepada orang ramai susulan kepada penularan pandemik COVID-19 semenjak awal tahun 2020 yang lalu. Program pas perjalanan tanpa had My30 ini menggantikan secara sementara program pas perjalanan My50 dan My100 yang telah disediakan untuk kemudahan orang ramai semenjak awal tahun 2019 iaitu sebelum daripada negara dilanda dengan wabak penyakit tersebut. Ianya bukanlah bersifat satu program yang kekal, memandangkan penyediaan program tersebut telah melibatkan implikasi kewangan yang besar kepada Kerajaan bagi menampung subsidi kepada orang ramai bagi setiap pembelian pas berkenaan. Dalam hal ini, bagi setiap pembelian pas perjalanan My30 berjumlah RM30, Kerajaan perlu menampung subsidi berjumlah RM170 bagi setiap pembelian pas berkenaan.

2. Apabila semua sektor ekonomi telah pun dibuka dan dibenarkan beroperasi seperti sedia kala, maka Kerajaan melalui Belanjawan 2022 telah tetap meneruskan pelaksanaan subsidi pas perjalanan ini, namun kini dikenali sebagai program pas perjalanan tanpa had My50. Untuk tahun 2022, Kerajaan telah menyediakan peruntukan sejumlah RM115 juta, untuk menampung subsidi bagi setiap pembelian pas berkenaan. Untuk makluman ahli-ahli Yang Berhormat, bagi setiap pembelian pas My50 berjumlah RM50, Kerajaan menampung subsidi sebanyak RM150. Pengurangan subsidi sebanyak RM20 bagi setiap pembelian pas ini amatlah penting bagi membolehkan Kerajaan mengalihkan jumlah berkenaan bagi menampung lain-lain bantuan kewangan kepada orang ramai dalam fasa negara pulih semula susulan pandemik Covid-19. Antara program bantuan atau subsidi lain yang telah diperkenalkan oleh Kerajaan untuk tahun 2022 yang berkaitan terus dengan Kementerian kita.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA,
PARLIMEN KEEMPAT BELAS**

**PERTANYAAN : JAWAB LISAN
DARIPADA : YB TUAN CHE ALIAS BIN HAMID
[KEMAMAN]
TARIKH : 09 MAC 2022 (RABU)**

SOALAN

TUAN CHE ALIAS BIN HAMID (KEMAMAN) minta **MENTERI PERTANIAN DAN INDUSTRI MAKANAN** menyatakan peratus penggunaan baja organik oleh pekebun dan petani dalam sektor agromakanan dan komoditi memandangkan kenaikan harga baja dan racun kimia semakin meruncing

JAWAPAN

Tuan Yang di-Pertua,

Untuk makluman Ahli Yang Berhormat, Kementerian ini amat prihatin terhadap isu kenaikan harga baja dan racun dan penggunaan baja organik dalam aktiviti penanaman adalah digalakkan sebagai baja tambahan.

Penggunaan baja organik secara berterusan berupaya membantu meningkatkan tahap kesuburan tanah dan keupayaan tanah untuk memegang nutrien daripada larut lesap. Kementerian Pertanian Dan Industri Makanan (MAFI) telah membekalkan baja organik kepada setiap pesawah sebanyak 100 kg/ha bagi kawasan tanaman padi yang kurang subur menerusi pelaksanaan Skim Insentif Pengeluaran Padi (SIPP) sejak tahun 2007-2017. Berdasarkan bekalan baja subsidi padi bagi tempoh tersebut, peratus penggunaan baja organik bagi tanaman padi adalah 17.54% berbanding penggunaan baja kimia sebanyak 82.45%. Bagi menggalakkan penggunaan baja organik dalam tanaman padi, bermula tahun 2020-2021, Baja Mikrob Tempatan Bermanfaat (Baja Bio) telah digunakan sebagai salah satu input tanaman padi di bawah Skim Baja Bersubsidi Negara.

Dari aspek pensijilan myOrganic bagi tanaman padi pula, hanya 119.2 hektar (0.04%) daripada keseluruhan keluasan pabel tanaman padi (281,623 ha) yang mengamalkan penanaman secara organik sepenuhnya. Bagi tanaman agromakanan selain daripada padi, terdapat lebih kurang 2000 hektar (0.34%) daripada 589,045.46 hektar keluasan agromakanan yang telah dipersijilkan dengan pensijilan myOrganic.

Berdasarkan statistik import, eksport dan pengeluaran baja dalam negara tahun 2021 yang dikeluarkan oleh Jabatan Perangkaan Malaysia, anggaran penggunaan baja organik adalah kurang daripada 1% daripada 5.124 juta metrik tan penggunaan keseluruhan baja di Malaysia.

Secara umumnya, penggunaan baja organik dapat memperbaiki serta mengekalkan kesuburan tanah. Walau bagaimanapun, penggunaan baja organik sahaja tidak dapat memenuhi keperluan nutrien tanaman bagi pengeluaran hasil yang tinggi kerana kandungan nutriennya adalah rendah. Manakala penggunaan baja kimia sahaja pada kadar yang tinggi akan membabitkan peningkatan kos dan dalam jangka masa panjang menjejaskan kualiti tanah dan kelestarian alam sekitar. Justeru itu, bagi meningkatkan pengeluaran hasil dan dalam masa yang sama memelihara kesuburan tanah dan alam sekitar, pendekatan menggunakan kombinasi baja kimia dan baja organik merupakan pilihan yang terbaik.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA,
PARLIMEN KEEMPAT BELAS 2022**

PERTANYAAN : JAWAB LISAN

**DARIPADA : YB TUAN AHMAD FAHMI BIN MOHAMED
FADZIL [LEMBAH PANTAI]**

TARIKH : 09 MAC 2022 (RABU)

SOALAN

TUAN AHMAD FAHMI BIN MOHAMED FADZIL [LEMBAH PANTAI] minta **MENTERI KEWANGAN** menyatakan berapa jumlah dana secara langsung dan tidak langsung yang telah diberi Kerajaan kepada syarikat Digital Nasional Berhad (DNB) sejak ianya diwujudkan pada 2021, jumlah yang telah dibelanjakan DNB sehingga hari ini, serta jumlah menara telekomunikasi yang berjaya didirikan DNB.

JAWAPAN

Tan Sri Yang Di Pertua,

Untuk makluman ahli Yang Berhormat, pelbagai isu telah dibangkitkan mengenai Digital Nasional Berhad (DNB) dan rangkaian 5G. Pihak Kerajaan mengalu-alukan keprihatinan yang ditunjukkan oleh para Ahli Dewan ke atas pelaksanaan rangkaian 5G oleh DNB.

Pihak Kerajaan, seperti ahli-ahli Dewan, juga mengharapkan pelaksanaan 5G dapat dilakukan dengan cekap dan lancar, dan membawa manfaat kepada semua pihak berkepentingan. Ini adalah kerana 5G adalah pemboleh daya (*enabler*) untuk menambahbaik kesejahteraan rakyat dan mempertingkatkan daya saing negara. Pada masa yang sama, ia juga akan menggalakkan pelaburan berasaskan teknologi dari dalam dan luar negara ke negara ini.

Seperti yang pernah dijelaskan, kos pelaksanaan rangkaian 5G melalui DNB akan dibiayai melalui gabungan pembiayaan tertunda kepada vendor, pembiayaan perdagangan dan modal kerja, serta program Sukuk yang akan diterbitkan dalam pasaran modal negara.

Ia tidak akan melibatkan apa-apa jaminan atau pembiayaan daripada Kerajaan, terutamanya secara tidak langsung, atau dengan izin, *off-balance sheet*, seperti yang didakwa oleh sesetengah pihak.

DNB akan mendapatkan pembiayaan tersebut melalui perkhidmatan kewangan seperti bank-bank, dan ini akan dibayar semula melalui hasil jualan yang dijana daripada penjualan kapasiti secara borong.

Sehingga penghujung Januari 2022, **pembiayaan komersial yang diperolehi DNB berjumlah sebanyak RM 1.7 bilion**. Dan untuk tempoh yang sama, **jumlah yang telah dibelanjakan DNB adalah sebanyak RM544 juta**. Ini merangkumi perbelanjaan bagi infrastruktur rangkaian, perkakasan rangkaian dan juga modal kerja.

Pada 15 Disember 2021, rangkaian 5G telah tersedia di sekitar Kuala Lumpur, Putrajaya dan Cyberjaya. Sebanyak 500 tapak telah berjaya diintegrasikan setakat 9 Januari 2022 manakala sehingga penghujung 2022 sebanyak 3,500 tapak lagi disasarkan meliputi Pulau Pinang, Johor, Sabah, Sarawak, Selangor, Negeri Sembilan dan Melaka.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA,
PARLIMEN KEEMPAT BELAS**

**PERTANYAAN : JAWAB LISAN
DARIPADA : YB TUAN SU KEONG SIONG [KAMPAR]
TARIKH : 09 MAC 2022 (RABU)**

SOALAN

Tuan Su Keong Siong [Kampar] minta **MENTERI PEMBANGUNAN WANITA, KELUARGA DAN MASYARAKAT** menyatakan keberkesanan dan rasional pelaksanaan JKMPay untuk pembayaran elaun bulanan OKU (EPOKU). Apakah cadangan Kementerian untuk mengatasi masalah-masalah yang timbul akibat pelaksanaan JKMPay tersebut.

JAWAPAN

Tuan Yang di-Pertua,

Kementerian Pembangunan Wanita, Keluarga Dan Masyarakat (KPWKM) melalui Jabatan Kebajikan Masyarakat (JKM) sedang melaksanakan satu inisiatif baru iaitu **projek Bayaran Bantuan Kewangan Tanpa Tunai (*Cashless*)** atau dikenali sebagai **JKMPay**. Projek ini berstatus **PROJEK RINTIS** dilaksanakan ke atas **penerima bantuan kelulusan baharu sahaja dan tidak melibatkan penerima bantuan sedia ada**. Skim bantuan kewangan yang terlibat adalah semua skim bantuan bulanan Persekutuan.

Tuan Yang di-Pertua,

Projek ini dilaksanakan dengan tujuan berikut :

- i) **Memperluaskan mekanisme kaedah pembayaran** bantuan kewangan JKJ melalui kaedah bayaran ke bank dan juga kaedah tanpa tunai;
- ii) **Membantu penerima bantuan untuk mengurus dan mengawal perbelanjaan** wang bantuan secara berhemah dan bermanfaat;
- iii) **Memastikan penerima bantuan dapat memenuhi keperluan asas harian** khususnya melibatkan keperluan makan, minum, ubat-ubatan asas dan keperluan harian rumah;
- iv) **Memperkukuhkan kolaborasi di antara Kerajaan dan pihak swasta** dalam meningkatkan perkhidmatan agensi di bawah kementerian;

- v) Menyokong ke arah **mewujudkan masyarakat digital selaras dengan Rangka Tindakan (*Blueprint*) Ekonomi Digital Malaysia 2021** dan Memacu Transformasi Perkhidmatan Digital Sektor Awam melalui kerjasama Sektor Korporat :
- vi) **Memacu Transformasi Perkhidmatan Digital Sektor Awam** dalam menyediakan kaedah pembayaran tanpa tunai sebagai pilihan kaedah transaksi yang lebih berkesan dalam perkhidmatan yang di tawarkan; dan
- vii) **Menggalakkan penglibatan penerima bantuan dalam transaksi digital** agar tidak ketinggalan dalam era digital.

Di samping itu, projek ini juga sejajar dengan hala tuju baharu bantuan sosial di bawah Majlis Perlindungan Sosial Malaysia (MySPC) yang memfokuskan agar semua bantuan di masa hadapan hendaklah **bersyarat, mempunyai Dasar Pemisah (*Exit Policy*) yang jelas dan kesegeraan dalam pengagihan/pemprosesan bantuan.**

JKMPay telah dilaksanakan secara rintis mulai bulan Februari 2021. Setiap lokasi projek rintis dilaksanakan, Kementerian **telah melakukan kunjung hormat dan libat urus bersama Kerajaan Negeri** bagi menjelaskan mengenai projek rintis ini. **Peserta-peserta juga telah diberikan taklimat** bagi penggunaan kad dan aplikasi agar mereka memahami konsep tanpa tunai dan bagi membimbing mereka dalam penggunaan JKMPay. **Sehingga Februari 2022 sejumlah 4,752 peserta dari 6 negeri dan 23 daerah** terlibat iaitu Perlis (693 peserta), Kedah (2,661 peserta/semua daerah [12 daerah]), Melaka (924 peserta/semua daerah [3 daerah]), Terengganu (255 peserta [3 daerah]), Kelantan (180 peserta [2 daerah]) dan Selangor (39 peserta [2 daerah]).

Tuan Yang di-Pertua,

Sebagaimana yang telah dinyatakan sebelum ini, projek rintis ini hanya dilaksanakan kepada **PENERIMA BAHARU** bantuan bulanan JKM sahaja manakala 519,409 penerima bantuan bulanan sedia ada masih kekal menerima bantuan bulanan melalui bayaran ke akaun bank. **Penerima baharu juga kekal menerima kesemua jumlah keseluruhan bantuan yang diluluskan secara 100%.** Sebagai contoh, bagi seorang OKU penerima Elaun Pekerja OKU (EPOKU) yang melepasi syarat kelayakan bekerja dengan pendapatan di bawah RM1,500 sebulan, akan layak menerima bantuan EPOKU berjumlah RM450 sebulan. Sekiranya gaji penerima berjumlah RM1,300 dan ditambah EPOKU berjumlah RM450 yang dibayar 50% melalui bank atau RM225 dan 50% atau RM225 secara JKMPay, maka penerima masih mempunyai baki berjumlah RM1,525 secara tunai di bank dan masih boleh digunakan bagi tujuan kegunaan pelbagai seperti bayaran sewa rumah, tambang pengangkutan, pembelian secara atas talian dan lain-lain.

Manakala 50% (RM225) bayaran secara tanpa tunai di Kad JKMPay ini boleh digunakan oleh penerima untuk melaksanakan pelbagai transaksi seperti berikut:

1. Membuat transaksi tanpa tunai di mana-mana kedai runcit, kedai farmasi, kedai makan yang menyertai program tanpa tunai. Semua barangan di dalam kedai berkenaan boleh dibeli seperti:
 - i) Semua jenis keperluan bahan makan dan minuman seperti beras, gula, sayuran, minyak, ikan, ayam, sardin dan lain-lain;
 - ii) Barang keperluan kegunaan harian seperti lampin bayi, tuala wanita, bahan pencuci dan lain-lain; dan
 - iii) Keperluan ubat-ubatan dan alatan berkaitan ubatan.

2. Melaksanakan transaksi bagi pembayaran semua bil dan utiliti berkaitan;
3. Membuat pembelian tambah nilai (*top-up*) perkhidmatan telefon; dan
4. Hanya transaksi bagi pembelian rokok dan minuman beralkohol adalah dilarang bagi mengelakkan pengambilan barang yang tidak sihat menggunakan JKMPay.

Malahan baki atau lebih duit yang ada dalam akaun JKMPay juga **tidak akan luput**, dan akan dibawa ke bulan berikutnya. Bagi peserta program yang mahir menggunakan aplikasi telefon di **jkmpay.my**, pelbagai menu aplikasi secara atas talian boleh digunakan seperti memantau perbelanjaan harian, membuat semakan baki, membayar bil dan utiliti, membeli *top-up* tanpa perlu keluar ke kedai dan melihat senarai kedai berdekatan yang boleh diakses pandu arah melalui Maps. Kementerian amat sedar mengenai keperluan asas penerima khususnya golongan OKU untuk menggunakan duit bantuan yang diperolehi setiap bulan. JKMPay tidak bertujuan untuk menyekat mana-mana hak kebebasan OKU untuk berbelanja. Apa yang diwujudkan adalah **mekanisme atau kaedah berbelanja ditambah atau diperluaskan** lagi di mana selain daripada perbelanjaan tunai, penerima boleh melaksanakan perbelanjaan secara tanpa tunai. Malahan melalui kaedah tanpa tunai ini, **tiada caj tambahan atau fi transaksi dikenakan** berbanding sebagaimana caj RM1 boleh dikenakan jika mengeluarkan duit melalui mesin ATM.

Tuan Yang di-Pertua,

Sehingga **Februari 2022**, terdapat **sejumlah 397 kedai aktif** dalam projek ini manakala **250 kedai (baharu) lain** telah memohon dan berminat untuk terlibat dalam projek ini. Kementerian sedang berusaha memperbanyakkan kedai-kedai untuk memberi kemudahan kepada penerima bantuan. **Malahan penerima bantuan juga boleh mencadangkan kedai/premis bersesuaian bagi mengikuti program ini.** Cadangan ini boleh disalurkan oleh peserta melalui 4 kaedah iaitu Telegram *group* peserta, Call-Centre 1-300-88-7977, aplikasi telefon Me12Pay dan juga melalui e-mel info@me12pay.com.

Tuan Yang di-Pertua,

Kementerian mendapati bahawa melalui projek JKMPay ini, telah digunakan oleh penerima bantuan dengan sebaiknya bagi memenuhi keperluan asas mereka. Sehingga **Februari 2022**, **sebanyak RM4.18 juta** telah dibelanjakan oleh peserta bagi tujuan pembelian **keperluan makan/minum iaitu 80.8% atau RM3.37 juta; 16.2% atau RM678 ribu bagi pembelian keperluan rumah** seperti lampin bayi, tuala wanita, sabun pencuci dan lain-lain. **2.3% atau RM96 ribu bagi keperluan lain** seperti pembayaran bil & utiliti, *top-up* dan **0.7% atau RM29 ribu dibelanjakan bagi tujuan pembelian ubat-ubatan.** Ini menunjukkan bahawa program ini memberi impak yang baik dan manfaat kepada peserta dalam memenuhi keperluan asas mereka.

Projek ini bukan sahaja membantu penerima bantuan malahan ia dapat mewujudkan prasarana ekonomi yang baik di kalangan pekedai runcit dan kedai-kedai kecil di seluruh negara. Antara manfaat yang diperolehi adalah :

- 1) Membantu penerima bantuan mengurus dan mengawal perbelanjaan wang bantuan secara berhemah;
- 2) Menjamin peruntukan perbelanjaan keperluan makan minum dan keperluan asas penerima bantuan dan ahli isi rumah tersedia pada setiap bulan;
- 3) Kaedah perbelanjaan tanpa tunai lebih selamat berbanding perbelanjaan secara tunai dan sesuai dengan situasi semasa;
- 4) Lokasi kedai yang berdekatan dengan penerima bantuan.;
- 5) Baki bantuan tidak lupus dan boleh dibawa ke bulan seterusnya; dan
- 6) Program ini fleksibel dan boleh diubah dari masa ke semasa berdasarkan keperluan Jabatan dan penerima bantuan.

Usaha-usaha penambahbaikan juga telah mula dilaksanakan oleh Kementerian melalui pendekatan berikut:

- 1) **Sesi Libat Urus bersama Pertubuhan Sukarela Kebajikan (PSK) telah diadakan pada 24 dan 25 Februari 2022** di Dewan Perdana Nur, KPWKM bagi memberi maklumat yang lebih jelas mengenai JKMPay;
- 2) **Mempelbagaikan platform pembayaran digital** (pembelian secara *online*, pembayaran bil, tambah nilai kad prabayar);
- 3) **Menyediakan senarai Direktori Pekedai di setiap Daerah Rintis** dan dipaparkan di laman *web*, Sosial media KPWKM dan JKM serta di aplikasi ME12PAY; dan

- 4) **Menambah bilangan pekedai termasuk farmasi, klinik, kedai makan dan perkhidmatan penghantaran dari masa ke semasa.**

Memandangkan pendigitalan penyampaian perkhidmatan ini merupakan agenda masa depan negara, Kementerian akan memastikan usaha penambahbaikan projek rintis ini sentiasa dilaksanakan dari masa ke semasa. Satu kajian menyeluruh akan diadakan bagi memastikan suatu hala tuju dan dasar berkaitan projek ini dapat ditentukan. Dalam tempoh tersebut, projek ini **akan kekal berstatus projek rintis** di lokasi sedia ada dan belum diperluaskan ke negeri/daerah lain sehingga laporan kajian dinyatakan dibentangkan. Kementerian sentiasa mengalu-alukan dan membuka peluang kepada semua pihak untuk memberikan pandangan dan juga cadangan dalam menambahbaik pelaksanaan program ini.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA,
PARLIMEN KEEMPAT BELAS**

**PERTANYAAN : JAWAB LISAN
DARIPADA : YB TUAN CHA KEE CHIN [RASAH]
TARIKH : 09 MAC 2022**

SOALAN

TUAN CHA KEE CHIN [RASAH] minta **MENTERI KEWANGAN** menyatakan apakah moratorium pinjaman perumahan dan kenderaan akan diberikan oleh bank-bank pada tahun 2022, memandangkan masih ramai peminjam yang terjejas pendapatan mereka dan kadar pengangguran masih tinggi, yang mengakibatkan ramai peminjam gagal membayar ansuran bank.

JAWAPAN

Tan Sri Yang di-Pertua,

Untuk makluman, walaupun kegiatan ekonomi telah dibuka semula secara beransur-ansur mulai Ogos 2021, masih terdapat segelintir peminjam yang memerlukan tempoh masa yang lebih lama untuk memulihkan semula kedudukan kewangan mereka. Oleh itu, Agensi Kaunseling dan Pengurusan Kredit (atau AKPK) dan industri perbankan telah memperkenalkan Program Pengurusan dan Ketahanan Kewangan (atau URUS), khusus untuk peminjam dari golongan kumpulan pendapatan 50 peratus terbawah (atau B50 dengan isi rumah berpendapatan sehingga 5,880 ringgit sebulan) yang mungkin memerlukan bantuan selanjutnya selepas bantuan bayaran balik di bawah program PEMULIH berakhir.

Di bawah program ini, peminjam golongan B50 yang memenuhi syarat akan mendapat pengecualian faedah selama tiga bulan dan pengurangan ansuran pinjaman sehingga 24 bulan, termasuk nasihat pengurusan kewangan yang boleh meningkatkan daya tahan kewangan peminjam untuk jangka masa panjang.

PKS dan peminjam individu yang tidak layak untuk URUS, tetapi masih memerlukan bantuan bayaran balik pinjaman, boleh menghubungi bank masing-masing untuk menyusun semula bayaran balik pinjaman yang bersesuaian dengan keadaan kewangan mereka. Peminjam juga boleh memohon pelbagai program yang ditawarkan oleh AKPK seperti Program Pengurusan Hutang (atau *Debt Management Programme*, DMP), Skim Penyelesaian Pinjaman Kecil (atau *Small Debt Resolution*

Scheme, SDRS) dan Skim Sokongan Daya Tahan Kewangan (atau *Financial Resilience Support Scheme*, FIRST). Program-program ini dilaksanakan dengan kerjasama dan sokongan bank-bank, dan mempunyai ciri-ciri seperti pengurangan ansuran bulanan, pelanjutan tempoh bayaran balik dan program sokongan daya tahan kewangan.

Kerajaan menerusi institusi perbankan komited untuk membantu peminjam yang masih mengalami kekangan kewangan akibat pandemik COVID-19. Oleh itu, individu dan perusahaan kecil dan sederhana (atau PKS) yang memerlukan bantuan disarankan menghubungi bank masing-masing untuk membincangkan jenis bantuan yang sesuai dengan situasi kewangan mereka. Peminjam juga mempunyai alternatif untuk berhubung terus dengan AKPK untuk mendapat khidmat nasihat percuma dan mendaftar dalam mana-mana program bantuan bayaran balik pinjaman yang disediakan oleh AKPK.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA
PARLIMEN KEEMPAT BELAS**

PERTANYAAN : JAWAB LISAN
DARIPADA : YB DATO' SERI UTAMA HAJI MUKHRIZ BIN TUN
DR. MAHATHIR [JERLUN]
TARIKH : 09 MAC 2022 (RABU)

SOALAN

DATO' SERI UTAMA HAJI MUKHRIZ BIN TUN DR. MAHATHIR [JERLUN] minta **MENTERI KANAN PENDIDIKAN** menyatakan apakah yang dilakukan untuk penggunaan buku teks digital bagi mengganti buku teks biasa yang membebankan pelajar khususnya di peringkat sekolah rendah. Tidakkah boleh diambil kesempatan apabila sudah ramai ibu bapa yang memperoleh peranti digital semasa PDPR diamalkan untuk menambahkan gunakan alat ini di sekolah.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa berusaha untuk memanfaatkan teknologi dalam pengajaran dan pembelajaran (PdP). Salah satu pendekatan yang diambil adalah dengan penggunaan buku teks digital. Pendigitalan buku teks dibuat sebagai salah satu usaha dalam mengatasi isu beg berat murid selain memanfaatkan teknologi dalam penghasilan sumber pendidikan.

Pada masa ini, KPM telah menyediakan 692 judul Buku Teks Digital Asas (BTDA) melalui pelantar *Digital Educational Learning Initiative Malaysia* (DELIMa) yang boleh diakses secara percuma oleh murid. Semua murid telah dibekalkan dengan ID DELIMa yang membolehkan mereka mengakses BTDA. KPM juga sentiasa menambah BTDA bagi setiap penerbitan buku teks baharu secara berterusan.

Akses sumber pendidikan secara digital melalui pelantar DELIMa merupakan sebahagian daripada inisiatif Pendidikan Digital dalam usaha untuk melahirkan generasi fasih digital yang kreatif, inovatif dan beretika pada masa hadapan. Peranti yang dimiliki oleh murid masih dapat digunakan bagi tujuan pembelajaran termasuklah membaca, mencari maklumat dan menyiapkan tugas yang boleh dilaksanakan di luar waktu persekolahan.

Untuk makluman Ahli Yang Berhormat, KPM akan terus meneliti pendekatan terbaik berhubung penggunaan peranti murid di sekolah bagi tujuan PdP khususnya dari segi kesesuaian dan pemilikan peranti serta ketersediaan capaian internet. Walau bagaimanapun, perkara ini juga tertakluk kepada pertimbangan dan kelulusan agensi pusat dengan mengambil kira keutamaan dan kedudukan kewangan semasa kerajaan.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA
PARLIMEN KEEMPAT BELAS**

PERTANYAAN : JAWAB LISAN
DARIPADA : YB TUAN CHE ALIAS BIN HAMID [KEMAMAN]
TARIKH : 09 MAC 2022 (RABU)

SOALAN

TUAN CHE ALIAS BIN HAMID [KEMAMAN] minta **MENTERI KANAN PENDIDIKAN** menyatakan pengemaskinian berhubung dengan SOP keselamatan murid-murid di sekolah berikutan penularan kluster pendidikan.

JAWAPAN

Tuan Yang di-Pertua,

Kementerian Pendidikan Malaysia (KPM) komited dalam memastikan persekitaran sekolah adalah selamat bagi pelaksanaan pengajaran dan pembelajaran (PdP) secara bersemuka.

Bagi memastikan kelancaran pengoperasian sekolah, KPM telah menyediakan Garis Panduan Pengurusan dan Pengoperasian Sekolah 3.0 (GPPPS) 3.0 sebagai rujukan kepada jabatan pendidikan negeri (JPN), pejabat pendidikan daerah (PPD) dan pentadbir serta guru. Garis Panduan ini mengandungi panduan khusus mengenai prosedur pengurusan murid bergejala, murid disahkan positif COVID-19, murid yang dikenal pasti sebagai kontak rapat pesakit COVID-19 di sekolah dan penutupan sekolah.

Selari dengan situasi semasa berkenaan penularan wabak COVID-19, KPM sentiasa berbincang secara berkala bersama-sama Kementerian Kesihatan Malaysia (KKM) untuk meneliti dan menambah baik prosedur operasi standard (SOP) sedia ada bagi mengekang jangkitan COVID-19 di sekolah. Berdasarkan saranan daripada KKM, pihak KPM telah mengambil tindakan memperketatkan lagi pelaksanaan GPPPS 3.0 dengan menyediakan lampiran tambahan (*annexe*) kepada garis panduan ini yang memberi penekanan kepada keselamatan dan kesihatan warga sekolah. Ia menekankan beberapa aspek utama seperti kehadiran warga sekolah yang bergejala, kebenaran masuk berdasarkan status MySejahtera, tanggungjawab guru di sekolah, pengurusan bilik guru, pengurusan murid di

sekolah, pengurusan asrama, pengurusan dewan makan asrama dan pengurusan kes positif di sekolah. Selain itu, peranan ketua kelas/pengawas/pembimbing rakan sebaya turut diperkasakan untuk bersama-sama memantau rakan-rakan yang bergejala dari semasa ke semasa dan mengingatkan rakan mereka supaya sentiasa mematuhi SOP. Selain itu, KPM turut melaksanakan ujian saringan bergilir COVID-19 bagi murid sekolah rendah di bawah Strategi Pengujian COVID-19 Kebangsaan.

KPM komited dalam memastikan pengoperasian sekolah berjalan dengan teratur dan selamat serta sentiasa mengambil langkah proaktif bagi mengawal dan mengekang penularan jangkitan wabak COVID-19 dalam kalangan murid di sekolah.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA,
PARLIMEN KEEMPAT BELAS**

**PERTANYAAN : JAWAB LISAN
DARIPADA : YB DATUK MOHD AZIS BIN JAMMAN
[SEPANGGAR]
TARIKH : 09 MAC 2022 (RABU)**

SOALAN

DATUK MOHD AZIS BIN JAMMAN [SEPANGGAR] minta **MENTERI KEWANGAN** menyatakan secara terperinci jenis hasil yang telah dikutip oleh Persekutuan dari Sabah di bawah Jadual 10, Perkara 112C Perlembagaan Persekutuan dan formula pengiraan bagi menentukan jumlah yang harus dipulang semula kepada Sabah.

JAWAPAN

Tan Sri Yang di-Pertua,

Sememangnya di awal pembentukan Malaysia, Perkara 112C Perlembagaan Persekutuan (PP) dibaca bersama subseksyen 2(1), Bahagian IV, Jadual Kesepuluh, Perlembagaan Persekutuan memperuntukkan bahawa negeri Sabah berhak menerima Pemberian Khas bersamaan dengan dua perlima ($\frac{2}{5}$) atau 40% daripada hasil bersih negeri Sabah yang dikutip oleh Kerajaan Persekutuan.

Namun, formula tersebut tidak lagi terpakai oleh kerana kajian semula ke atas Pemberian Khas telah dijalankan dan dipersetujui bersama di bawah Perkara 112D Perlembagaan Persekutuan dalam tempoh 1969 hingga 1973 serta kadar tersebut masih berkuat kuasa. Kini, Kerajaan Persekutuan dan Kerajaan Negeri Sabah dalam proses mengkaji semula dan menambah baik Pemberian Khas selaras dengan Perkara 112D Perlembagaan Persekutuan; dan perkara tersebut akan diumumkan kelak.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA
PARLIMEN KEEMPAT BELAS**

**PERTANYAAN : JAWAB LISAN
DARIPADA : YB TUAN SYED IBRAHIM BIN SYED NOH
[LEDANG]
TARIKH : 09 MAC 2022 (RABU)**

SOALAN

TUAN SYED IBRAHIM BIN SYED NOH [LEDANG] minta **MENTERI KANAN PENDIDIKAN** menyatakan langkah yang telah diambil serta kadar kejayaan usaha yang digerakkan bagi menangani isu beg sekolah berat dalam kalangan murid dan pelajar sekolah.

JAWAPAN

Tuan Yang di-Pertua,

Kementerian Pendidikan Malaysia (KPM) komited untuk mencari jalan penyelesaian yang terbaik dalam menangani isu beg berat murid yang telah berlarutan sekian lama. KPM telah menjalankan tiga kajian utama berkaitan beg berat iaitu Kajian Beban Buku Murid Sekolah Rendah (1994), Kajian Berat Beg Murid Sekolah Rendah (2008) dan Laporan Kajian Berat Beg Murid Sekolah Rendah (2017). Hasil daripada kajian yang dilaksanakan, KPM telah mengambil pelbagai tindakan bagi menangani isu berkenaan. Antaranya, mengeluarkan Surat Pekeliling Ikhtisas Bil. 1/2000: Penggunaan Buku Kerja Di Sekolah Rendah dan Surat Siaran Panduan Menangani Isu Beg Berat Murid di Sekolah pada tahun 2018. Namun demikian, perkara tersebut masih belum dapat ditangani sepenuhnya dan sering menjadi keluhan masyarakat.

KPM telah memperincikan secara mendalam perkara berkaitan isu beg berat dan merangka satu penyelesaian yang holistik bagi menangani isu tersebut secara tuntas. Berdasarkan penelitian ke atas maklum balas yang diperoleh, isu beg berat adalah kritikal dalam kalangan murid sekolah rendah, khususnya murid Tahap 1, iaitu Tahun 1, Tahun 2 dan Tahun 3. Oleh yang demikian, ketetapan KPM yang akan dilaksanakan segera adalah seperti berikut:

1. Penyediaan Lokar

KPM akan menyediakan lokar di sekolah rendah secara berfasa. Fasa 1 akan melibatkan penyediaan lokar untuk murid Tahap 1, iaitu Tahun 1, Tahun 2 dan Tahun 3 di sekolah rendah yang beroperasi secara dua sesi. Pelaksanaan ini akan melibatkan 10,662 kelas dengan 323,186 orang murid. Jumlah anggaran peruntukan tahun 2022 untuk Fasa 1 adalah sebanyak RM37.3 juta.

Bagi Fasa 2 pula, penyediaan lokar akan diperluaskan kepada murid Tahap 2, iaitu Tahun 4, Tahun 5 dan Tahun 6 di sekolah rendah yang beroperasi secara dua sesi. Pelaksanaan dijangka pada tahun 2023. Bagi sekolah satu sesi pula, murid akan menyimpan buku di dalam laci meja di bilik darjah masing-masing

2. Penyusunan Semula Jadual Waktu

Melaksanakan jadual waktu yang mengandungi tiga hingga empat mata pelajaran sehari, mengikut kaedah dan pelaksanaan yang sesuai terutama aspek pemberatan subjek, ketersediaan guru dan sesi persekolahan. Disamping itu, sekolah akan diberi kelonggaran untuk menyediakan jadual waktu mengikut kitaran minggu sebagaimana yang sedang dilaksanakan oleh sebilangan sekolah bawah KPM.

3. Buku Latihan

Bilangan buku latihan hendaklah tidak melebihi dua buah buku bagi setiap mata pelajaran pada satu satu masa. Setiap buku latihan hendaklah tidak melebihi 80 muka surat.

4. Buku Aktiviti dan Buku Kerja

Murid hanya dibenarkan untuk menggunakan buku aktiviti yang disediakan oleh KPM manakala buku kerja hanya boleh digunakan sebagai bahan rujukan atau bahan ulang kaji di luar waktu pengajaran dan pembelajaran (PdP)

5. Buku Teks Digital

Penerbitan baharu buku teks dalam format digital secara berterusan. Sehingga kini, sebanyak 692 judul buku teks digital telah dimuat naik dalam pelantar *Digital Educational Learning Initiative Malaysia* (DELIMa). Murid yang mempunyai peranti boleh mengakses buku teks digital melalui pelantar DELIMa.

6. Pendekatan PdP

Guru digalakkan menggunakan pendekatan PdP berpusatkan murid iaitu pembelajaran bertema, modular, pembelajaran berasaskan projek, simulasi amali (virtual lab) atau pembelajaran terbeza.

7. Kerjasama Dengan JAKIM

Kerjasama dengan pihak Jabatan Kemajuan Agama Islam Malaysia (JAKIM) juga diadakan dari aspek penyelarasan uniform agar murid diberi kelonggaran untuk memakai uniform sekolah masing-masing semasa sesi persekolahan KAFA.

Bagi memastikan setiap pendekatan dilaksanakan sebaiknya bagi mencapai matlamat untuk mengurangkan isu beg berat, KPM akan memantau rapi pelaksanaan semua pendekatan yang ditetapkan oleh KPM. Pemantauan ini akan dilaksanakan oleh sebuah pasukan petugas yang akan melaporkan secara berkala pelaksanaan inisiatif untuk mengurangkan beban beg berat murid.

Selain itu, KPM juga akan terus meningkatkan kerjasama erat dengan ibu bapa/penjaga bagi membantu menangani masalah beg berat murid, khususnya dalam memastikan murid membawa buku mengikut jadual ditetapkan. Di samping itu, sesi libat urus dengan Persatuan Ibu bapa dan Guru (PIBG) akan turut ditingkatkan sebagai satu pendekatan pemantauan.

KPM yakin pendekatan ini dapat dilaksanakan secara menyeluruh demi kesejahteraan murid untuk ke sekolah. KPM komited untuk terus menangani isu beg berat ini dengan lebih berkesan.

Sekian, terima kasih

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA,
PARLIMEN KEEMPAT BELAS**

PERTANYAAN : JAWAB LISAN
PERTANYAAN : YB TUAN OSCAR LING CHAI YEW [SIBU]
TARIKH : 09 MAC 2022 (RABU)

SOALAN

TUAN OSCAR LING CHAI YEW [SIBU] minta **MENTERI KANAN PENDIDIKAN** menyatakan adakah pembelajaran melalui talian hendak dilaksanakan semula kerana bilangan kes-kes COVID-19 telah meningkat. Nyatakan apakah langkah-langkah yang akan diambil untuk memastikan risiko penularan COVID-19 dikurangkan di kalangan pelajar.

JAWAPAN

Tuan Yang di-Pertua,

Kementerian Pendidikan Malaysia (KPM) komited dalam memastikan persekitaran sekolah adalah selamat bagi pelaksanaan pengajaran dan pembelajaran (PdP) secara bersemuka.

Bagi memastikan kelancaran pengoperasian sekolah, KPM telah menyediakan Garis Panduan Pengurusan dan Pengoperasian Sekolah 3.0 (GPPPS) 3.0 sebagai rujukan kepada jabatan pendidikan negeri (JPN), pejabat pendidikan daerah (PPD) dan pentadbir serta guru. Garis Panduan ini mengandungi panduan khusus mengenai prosedur pengurusan murid bergejala, murid disahkan positif COVID-19, murid yang dikenal pasti sebagai kontak rapat pesakit COVID-19 di sekolah dan penutupan sekolah.

Selari dengan situasi semasa berkenaan penularan wabak COVID-19, KPM sentiasa berbincang secara berkala bersama-sama Kementerian Kesihatan Malaysia (KKM) untuk meneliti dan menambah baik prosedur operasi standard (SOP) sedia ada bagi mengekang jangkitan COVID-19 di sekolah. Berdasarkan saranan daripada KKM, pihak KPM telah mengambil tindakan memperketatkan lagi pelaksanaan GPPPS 3.0 dengan menyediakan lampiran tambahan (*annexe*) kepada garis panduan ini yang memberi penekanan kepada keselamatan dan kesihatan warga sekolah. Ia menekankan beberapa aspek utama seperti kehadiran warga sekolah yang bergejala, kebenaran masuk berdasarkan status MySejahtera, tanggungjawab guru di sekolah, pengurusan bilik guru, pengurusan murid di

sekolah, pengurusan asrama, pengurusan dewan makan asrama dan pengurusan kes positif di sekolah. Selain itu, peranan ketua kelas/pengawas/pembimbing rakan sebaya turut diperkasakan untuk bersama-sama memantau rakan-rakan yang bergejala dari semasa ke semasa dan mengingatkan rakan mereka supaya sentiasa mematuhi SOP. Selain itu, KPM turut melaksanakan ujian saringan bergilir COVID-19 bagi murid sekolah rendah di bawah Strategi Pengujian COVID-19 Kebangsaan.

KPM komited dalam memastikan pengoperasian sekolah berjalan dengan teratur dan selamat serta sentiasa mengambil langkah proaktif bagi mengawal dan mengekang penularan jangkitan wabak COVID-19 dalam kalangan murid di sekolah.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA,
PARLIMEN KEEMPAT BELAS**

PERTANYAAN : JAWAB LISAN

**DARIPADA : YB TUAN LUKANISMAN BIN AWANG SAUNI
(SIBUTI)**

TARIKH : 9 MAC 2022 (RABU)

SOALAN

TUAN LUKANISMAN BIN AWANG SAUNI (SIBUTI) minta **MENTERI
PENGAJIAN TINGGI** menyatakan adakah pihak Kementerian
mempunyai rancangan untuk membuka Kolej Komuniti di luar bandar
Parlimen Sibuti dan apakah proses permohonan dibuka.

JAWAPAN

Tan Sri Yang di-Pertua,

Untuk makluman Ahli Yang Berhormat, sebelum sesebuah universiti awam, politeknik atau kolej komuniti dibangunkan, pelbagai aspek seperti pertumbuhan ekonomi, strategi pembangunan negara dan wilayah serta keperluan guna tenaga perlu dipertimbangkan.

Ini selari dengan keputusan Mesyuarat Jemaah Menteri pada 5 Julai 2000 yang bersetuju dengan pandangan bahawa keutamaan penubuhan kolej komuniti hendaklah bertumpu kepada kawasan-kawasan yang tiada institusi-institusi latihan lain seperti Pusat Giat MARA, Institut Kemahiran MARA dan sebagainya. Selain itu, Mesyuarat Jemaah Menteri pada 8 September 2004 juga bersetuju agar penubuhan kolej komuniti baharu adalah berdasarkan keperluan sesebuah kawasan.

Dalam hubungan ini, penubuhan sesebuah kolej komuniti turut bergantung kepada kriteria-kriteria lain seperti peruntukan kewangan, dasar perjawatan kejat yang sedang berkuat kuasa, kehendak industri, unjuran guna tenaga negara serta keperluan-keperluan lain yang relevan.

Sehingga November 2021, terdapat tiga (3) buah politeknik dan tujuh (7) buah kolej komuniti yang sedang beroperasi di Sarawak. Kesemua institut ini menawarkan pelbagai program pengajian dalam bidang Pendidikan dan Latihan Teknikal dan Vokasional (TVET) seperti keusahawanan; kejuruteraan; teknologi; perdagangan; perkhidmatan; dan pendidikan, yang berdaya saing serta menyokong keperluan tenaga kerja mahir dan profesional bagi pembangunan ekonomi setempat dan negara.

Berdasarkan jumlah institut dan bidang-bidang yang ditawarkan tersebut, ia adalah mencukupi bagi menampung keperluan semasa. Walau bagaimanapun, pihak KPT akan sentiasa mengkaji perkara ini dari semasa ke semasa.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA,
PARLIMEN KEEMPAT BELAS**

PERTANYAAN : JAWAB LISAN
DARIPADA : YB DATO' SRI HAJAH ROHANI BINTI HAJI
ABDUL KARIM [BATANG LUPAR]
TARIKH : 09 MAC 2022 (RABU)

SOALAN

DATO' SRI HAJAH ROHANI BINTI HAJI ABDUL KARIM [Batang Lupar] minta **MENTERI PEMBANGUNAN WANITA, KELUARGA DAN MASYARAKAT** menyatakan apakah status laporan Convention on the Elimination of All Forms of Discrimination Against Women (CEDAW) yang akan dibentangkan pada bulan Mac 2022.

JAWAPAN

Tuan Yang di-Pertua,

Sepertimana Yang Berhormat sedia maklum, *Convention On The Elimination of All Forms of Discrimination Against Women* (CEDAW) atau Konvensyen Penghapusan Segala Bentuk Diskriminasi Terhadap Wanita merupakan satu perjanjian antarabangsa yang bertujuan untuk memberikan hak yang sama rata kepada wanita dengan cara menghapuskan diskriminasi jantina, menamatkan keganasan terhadap wanita dan memperkukuh hak wanita.

Malaysia telah mengemukakan Laporan Berkala Ketiga hingga Kelima pada tahun 2016 kepada Jawatankuasa CEDAW. Laporan tersebut telah dibentang pada Sesi ke-69 Jawatankuasa CEDAW pada 20 Februari 2018. Susulan daripada itu, Jawatankuasa CEDAW telah meminta Malaysia menghantar laporan bagi empat Concluding Observations yang merangkumi *Constitutional and Legislative Framework*, *Female Genital Mutilation*, *Refugee and Asylum-Seeking Women* dan *Refugee and Asylum-Seeking Women*. Selanjutnya, Malaysia telah mengemukakan Laporan susulan bagi empat Concluding Observations tersebut pada bulan Disember 2020.

Buat masa ini, Kementerian Pembangunan Wanita, Keluarga dan Masyarakat (KPWKM) sedang giat menyediakan Laporan Berkala CEDAW Keenam Malaysia dan masih menepati garis masa sasaran kerja yang telah dijadualkan.

Laporan yang disediakan ini melalui pelbagai sesi libat urus dengan kementerian dan agensi serta Pertubuhan Bukan Kerajaan sejak tahun 2020. Draf laporan CEDAW ini sedang dalam semakan akhir dan akan dipanjangkan kepada Jabatan Peguam Negara dan seterusnya akan dibentangkan kepada Jemaah Menteri untuk kelulusan dalam masa terdekat.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA,
PARLIMEN KEEMPAT BELAS**

**PERTANYAAN : JAWAB LISAN
DARIPADA : YB TUAN CHOW KON YEOW [TANJONG]
TARIKH : 09 MAC 2022 (RABU)**

SOALAN

TUAN CHOW KON YEOW [TANJONG] minta **MENTERI TENAGA DAN SUMBER ASLI** menyatakan adakah kadar surcaj 3.70 sen/kWj dikenakan kepada semua pengguna elektrik bukan domestik (komersial dan industri) bermula 1 Februari lalu akan ditarik balik. Jika tidak, kenapa. Nyatakan nilai pungutan sebelum dan selepas kenaikan tersebut.

JAWAPAN

Tuan Yang di-Pertua,

1. Kerajaan mempunyai mekanisme khusus bagi penetapan purata tarif asas elektrik yang telah diguna pakai sejak tahun 2014 iaitu berdasarkan mekanisme *Incentive Based Regulation* (IBR). Melalui IBR ini, purata tarif asas di Semenanjung Malaysia untuk Tenaga Nasional Berhad (TNB) akan dikaji tiga (3) tahun sekali berserta dengan penetapan parameter-parameter untuk perniagaan TNB yang dikawal selia oleh Kerajaan melalui Suruhanjaya Tenaga (ST). Selain itu, Kerajaan juga mempunyai mekanisme khusus bagi pelarasan tarif elektrik iaitu melalui *Imbalance Cost Pass-Through* (ICPT) yang disemak setiap enam (6) bulan. Mekanisme ICPT ini adalah penting memandangkan TNB telah membuat bayaran terdahulu (*advance payment*) bagi semua kos penjanaan tenaga elektrik di Semenanjung bagi enam bulan yang terdahulu, maka bagi enam bulan yang berikutnya, mekanisme ICPT membenarkan segala kos yang telah dibuat oleh TNB dilepaskan kepada pengguna sama ada dalam bentuk rebat atau surcaj. Kerajaan pada 26 Januari 2022 telah meluluskan pelaksanaan tempoh regulatori ketiga (RP3) bagi tahun 2022 hingga 2024 di bawah mekanisme IBR.
2. Bagi tempoh 1 Januari hingga 31 Disember 2021, Kerajaan telah memberikan rebat 2 sen/kWj kepada semua kategori pengguna di Semenanjung. Pemberian rebat ini melibatkan kos keseluruhan sebanyak RM2.27 bilion.

3. Bagi tempoh Julai hingga Disember 2021, kos ICPT yang terlibat adalah sebanyak RM1.672 bilion bersamaan surcaj 3.70 sen/kWj yang perlu dilepaskan kepada semua pengguna elektrik di Semenanjung. Pelepasan surcaj ICPT sebanyak 3.70 sen/kWj kepada pengguna bagi tempoh Februari 2022 hingga Jun 2022 perlu dilaksanakan berikutan kenaikan harga arang batu sehingga USD105.09/metrik tan berbanding unjuran harga arang batu yang ditetapkan pada tahun 2021 iaitu sebanyak USD67.45/metrik tan. Peningkatan harga arang batu yang ketara ini telah menyebabkan kos penjanaan berasaskan arang batu meningkat sebanyak 45% bagi tempoh Julai hingga Disember 2021.

4. Sebarang kenaikan dalam harga arang batu memberi impak yang besar kepada tarif elektrik di Semenanjung kerana 59% penjanaan elektrik adalah daripada sumber arang batu. Selain itu, kenaikan pertukaran mata wang asing bagi tempoh Julai hingga Disember 2021 iaitu pada kadar RM4.246 untuk setiap USD1.00 berbanding unjuran iaitu pada kadar RM4.212 bagi setiap USD1.00 turut menjadikan kos penjanaan meningkat.

5. Kerajaan menyedari bahawa sekiranya surcaj dilepaskan kepada semua pengguna seperti yang sepatutnya dilaksanakan berdasarkan mekanisme ICPT, pasti rakyat akan merasa terbeban disebabkan kenaikan tarif elektrik. Oleh itu, Kerajaan telah memutuskan supaya rebat 2 sen/kWj terus diberikan kepada semua pengguna domestik bagi tempoh Februari sehingga Jun 2022 dengan membelanjakan RM715 juta daripada dana Kumpulan Wang Industri Elektrik (KWIE). Dalam masa yang sama, TNB telah menyerap kos ICPT pada bulan Januari 2022 sebanyak RM181 juta walaupun kos tersebut sepatutnya dilepaskan kepada semua pengguna.

6. Kerajaan telah melepaskan surcuj sebanyak 3.70 sen/kWj kepada pengguna bukan domestik bagi tempoh tersebut kerana pihak Tenaga Nasional Berhad (TNB) perlu membayar kos bahan api dan penjanaan tambahan kepada pembekal-pembekal bahan api bagi tempoh Julai hingga Disember 2021.

7. Bagi menghadapi situasi ini, saya ingin menyarankan agar pengguna-pengguna bukan domestik untuk melanggan inisiatif *Green Electricity Tariff* (GET). Ia bukan sahaja dapat mengecualikan pelanggan GET daripada membayar surcuj ICPT untuk tempoh setahun, malah mereka akan turut memiliki *Renewable Energy Certificate* (REC) yang boleh membantu mereka memenuhi komitmen *Environmental, Social and Governance* (ESG), dengan izin, dan menyokong agenda Tenaga Boleh Baharu negara.

8. Selain itu, pengguna-pengguna bukan domestik turut dicadangkan untuk meneroka potensi solar melalui pemasangan sistem solar bagi kegunaan sendiri (*self-consumption* – SelCo) atau menyertai Program *Net Energy Metering 3.0* (NEM 3.0). Kementerian turut menyarankan pemain-pemain industri untuk mengamalkan penggunaan elektrik secara cekap dengan menggunakan peralatan cekap tenaga yang mendapat penarafan 4 atau 5 bintang oleh pihak Suruhanjaya Tenaga. Inisiatif-inisiatif ini dapat membantu pengguna komersial dan industri untuk mengurangkan bil elektrik mereka pada masa akan datang.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA
PARLIMEN KEEMPAT BELAS**

PERTANYAAN : JAWAB LISAN
DARIPADA : YB DATUK SERI PANGLIMA BUNG MOKTAR BIN
RADIN [KINABATANGAN]
TARIKH : 09 MAC 2022 (RABU)

SOALAN

DATUK SERI PANGLIMA BUNG MOKTAR BIN RADIN minta **MENTERI KANAN PENDIDIKAN [KINABATANGAN]** menyatakan apakah usaha Kementerian dalam memastikan murid-murid yang akan menduduki peperiksaan Sijil Pelajaran Malaysia (SPM) dan Sijil Tinggi Pelajaran Malaysia (STPM) mampu menjawab soalan-soalan peperiksaan dengan baik berikutan sesi persekolahan yang sering terganggu sejak bermulanya pandemik COVID-19. Kementerian perlu memikirkan kaedah bagi memastikan calon-calon peperiksaan SPM dan STPM mampu mendapatkan keputusan yang baik memandangkan keputusan peperiksaan di peringkat SPM dan STPM adalah antara penentu masa hadapan.

JAWAPAN

Tuan Yang Dipertua

Kementerian Pendidikan Malaysia (KPM) menyedari bahawa sesi persekolahan secara bersemuka untuk tahun 2020 dan tahun 2021 tidak dapat dilaksanakan seperti mana kebiasaan. Calon peperiksaan mempunyai masa yang terhad untuk melakukan persiapan sebelum menduduki peperiksaan.

Sehubungan dengan itu, KPM telah membuat ketetapan untuk melanjutkan sesi persekolahan tahun 2021 sehingga bulan Februari 2022. Pelanjutan sesi persekolahan ini membolehkan pentadbir sekolah dan guru melaksanakan aktiviti pemulihan, pengukuhan serta pengayaan secara intensif termasuklah kepada calon peperiksaan Sijil Pelajaran Malaysia (SPM) dan Sijil Tinggi Persekolahan Malaysia (STPM) tahun 2021.

Untuk makluman Ahli Yang Berhormat, apabila sekolah dibuka mulai 3 Oktober 2021, calon peperiksaan juga diberi keutamaan mengikuti pengajaran dan pembelajaran (PdP) secara bersemuka tanpa penggiliran di sekolah bagi memberi peluang kepada mereka membuat persediaan rapi sebelum menduduki peperiksaan.

Bagi peperiksaan STPM pula, calon dan guru telah diberikan tempoh waktu PdP yang mencukupi sebelum peperiksaan diadakan, iaitu minimum 20 minggu untuk 120 waktu PdP bagi satu semester seperti yang diperuntukkan dalam Sukatan Pelajaran Peperiksaan STPM.

KPM turut menyediakan rancangan dalam saluran televisyen khusus untuk calon peperiksaan SPM. *Road to Success* dan SUKSES SPM 2021 adalah antara rancangan yang berfokus kepada mata pelajaran SPM bagi membantu calon meningkatkan penguasaan kandungan kurikulum sebelum menduduki peperiksaan. Di samping itu, slot khusus untuk siaran di DidikTV KPM diperuntukkan bagi menjelaskan format baharu peperiksaan SPM mulai tahun 2021. Buku Format Pentaksiran dan contoh-contoh item Peperiksaan SPM telah dimuat naik di portal Lembaga Peperiksaan sebagai panduan dan rujukan kepada guru dan calon-calon peperiksaan.

KPM juga membangunkan pelantar *Digital Educational Learning Initiative Malaysia* (DELIMa) sebagai pusat rujukan sehenti yang mengandungi pelbagai aplikasi, perkhidmatan dan sumber pendidikan digital seperti buku teks digital, video pendidikan, kuiz dan permainan pendidikan bagi tujuan PdP untuk kegunaan calon, guru dan ibu bapa. Pelantar DELIMa dapat membantu murid melaksanakan pembelajaran aktif secara sendiri melalui akses kandungan pembelajaran dalam pelbagai format yang disediakan.

Bagi membantu calon yang tidak mempunyai akses internet atau peranti yang sesuai, guru turut mengambil inisiatif untuk menyediakan modul PdP dan membuat serahan bahan tersebut kepada calon.

KPM turut mengambil kira situasi semasa pandemik COVID-19. Bagi memastikan keselesaan, kesejahteraan dan keselamatan calon semasa menduduki peperiksaan, KPM telah mengeluarkan Garis Panduan Pengurusan Pentaksiran Pusat dan Peperiksaan Awam yang terkandung dalam Garis Panduan Pengurusan dan Pengoperasian Sekolah 3.0. Garis panduan ini merupakan rujukan kepada pegawai bahagian di KPM, jabatan pendidikan negeri, pejabat pendidikan daerah, pentadbir serta guru di sekolah, ibu bapa dan pihak yang terlibat dengan pengoperasian sekolah termasuk pengurusan pengendalian peperiksaan awam.

KPM yakin bahawa usaha ini dapat memberi ruang dan peluang kepada calon SPM dan STPM 2021 untuk melakukan persediaan rapi termasuk aspek emosi sebelum menduduki peperiksaan dalam keadaan yang selesa dan bersedia sepenuhnya.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA,
PARLIMEN KEEMPAT BELAS**

PERTANYAAN : JAWAB LISAN
DARIPADA : YB PUAN NOR AZRINA BINTI SURIP
[MERBOK]
TARIKH : 09 MAC 2022 (RABU)

SOALAN

PUAN NOR AZRINA BINTI SURIP [MERBOK] minta **MENTERI KANAN PENDIDIKAN** menyatakan berkenaan prosedur eGtutar berkaitan perpindahan guru Semenanjung yang bertugas di Sabah atau Sarawak ini apabila tiada lagi guru-guru baharu dari Semenanjung yang ditempatkan di Sabah juga Sarawak. Secara umum telah diketahui keputusan pertukaran bagi sesi Jun 2020 eGtutar bagi para guru telah pun ditangguhkan pada Disember bagi sesi Januari 2021.

JAWAPAN

Tuan Yang di-Pertua,

Kementerian Pendidikan Malaysia (KPM) telah mengeluarkan Surat Pekeliling Ikhtisas (SPI) KPM Bil. 7/2021: Pelaksanaan Permohonan Pertukaran Pegawai Perkhidmatan Pendidikan di Sekolah dan Kolej Vokasional pada 23 September 2021. SPI tersebut turut menyertakan Garis Panduan Permohonan Pertukaran Pegawai Perkhidmatan Pendidikan di Sekolah dan Kolej Vokasional sebagai rujukan kepada Pengetua/Guru Besar dan Pegawai Perkhidmatan Pendidikan (PPP) yang berkhidmat di sekolah dan kolej vokasional bawah KPM untuk memastikan urusan pertukaran PPP dapat dilaksanakan dengan lebih teratur dan berkesan.

Berdasarkan kepada garis panduan tersebut, KPM telah menetapkan tiga prinsip asas pertukaran iaitu kekosongan jawatan, keperluan opsyen di sesebuah negeri serta kepentingan dan keperluan perkhidmatan. Permohonan pertukaran pula boleh dibuat berdasarkan kepada beberapa kategori permohonan iaitu kesihatan, keselamatan, mengikut pasangan dan lain-lain. Oleh yang demikian, pertimbangan permohonan pertukaran guru dibuat berdasarkan kepada prinsip asas dan kategori permohonan yang telah ditetapkan.

Untuk makluman Ahli Yang Berhormat, seramai 25,347 orang guru baharu telah ditempatkan di seluruh negara bagi tempoh Januari 2020 hingga Februari 2022. Daripada jumlah tersebut, seramai 3,866 guru ditempatkan di Sabah dan 3,886 guru ditempatkan di Sarawak. Jumlah guru berasal dari Semenanjung yang ditempatkan di Sabah pula adalah seramai 1,876 orang dan di Sarawak seramai 1,782 orang.

KPM sentiasa komited bagi memastikan penempatan guru dapat dilaksanakan di seluruh negara.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA,
PARLIMEN KEEMPAT BELAS**

PERTANYAAN : LISAN
DARIPADA : YB TUAN MUHAMMAD BAKHTIAR BIN WAN
CHIK [BALIK PULAU]
TARIKH : 09 MAC 2022 (RABU)

SOALAN

TUAN MUHAMMAD BAKHTIAR BIN WAN CHIK [BALIK PULAU]
minta **MENTERI PELANCONGAN, SENI DAN BUDAYA** menyatakan
berkenaan :-

- (a) bacaan permintaan terkini pelancong antarabangsa yang akan tiba di Malaysia memandangkan pintu sempadan yang akan dibuka tidak lama lagi; dan
- (b) bagaimana dengan kapasiti kesihatan swasta dan Kerajaan bagi menghadapi sebarang kemungkinan atau gelombang seterusnya.

JAWAPAN

Tuan Yang di-Pertua,

1. *United Nation World Tourism Organisation* (UNWTO) menerusi penerbitan *World Tourism Barometer*, Januari 2022, melaporkan prestasi pelancongan antarabangsa semakin pulih. Ini berdasarkan ketibaan pelancong antarabangsa meningkat sebanyak 4% pada tahun 2021 berbanding tahun 2020. Walau bagaimanapun, jumlah ini masih rendah iaitu kurang 72% berbanding prestasi tahun 2019.

2. Pemulihan prestasi ketibaan pelancong antarabangsa ini adalah disebabkan beberapa faktor antaranya ialah peningkatan kadar vaksinasi, digabungkan dengan pelonggaran sekatan perjalanan serta koordinasi protokol rentas sempadan yang semakin mudah berbanding sebelum ini.

3. Namun begitu, barometer ini juga melaporkan bahawa kadar pemulihan kekal perlahan dan tidak sekata di seluruh rantau di dunia. Eropah dan Amerika mencatatkan prestasi terbaik pada 2021 berbanding 2020, tetapi kedua-duanya masih 63% di bawah paras pra-pandemik. Rantau Afrika menyaksikan peningkatan 12% ketibaan pelancong pada 2021 berbanding 2020, walaupun jauh lebih rendah berbanding tahun 2019. Sementara itu, di Timur Tengah mengalami kemerosotan ketibaan pelancong sebanyak 24% berbanding 2020, manakala jumlah ketibaan pelancong asing di Rantau Asia dan Pasifik juga merosot 65% berbanding 2020 dan lebih 90% berbanding 2019.

4. Menurut Laporan *Air Passenger Market Analysis, International Air Transport Association* (IATA) untuk sepanjang tahun 2021, permintaan perjalanan antarabangsa mencatatkan aliran peningkatan apabila lebih banyak pasaran mulai dibuka semula. Walaupun ia mencatatkan sedikit peningkatan 7.4% berbanding tahun 2020, namun jumlah permintaan bagi perjalanan udara pada tahun 2021 ini masih jauh lebih rendah berbanding tahun 2019. Bagi Malaysia, Rangkaian lapangan terbang Malaysia Airports Holdings Bhd (MAHB) mencatatkan pergerakan penumpang 4.8 juta pada Januari 2022, lebih baik daripada suku keempat 2021, walaupun menghadapi cabaran tambahan daripada gelombang coronavirus Omicron.

5. Kementerian Pelancongan, Seni dan Budaya (MOTAC) menyasarkan beberapa fasa bagi pemulihan prestasi Pelancongan di Malaysia seperti berikut:

- (i) Fasa 1 : Pembukaan Pelancongan Domestik (Q3 2021) yang dimulakan dengan Gelembung Pelancongan Domestik Langkawi pada 16 September 2021;
- (ii) Fasa 2 : Projek Rintis Gelembung Perjalanan Antarabangsa Langkawi bermula pada 15 November 2021 dan *Vaccinated Travel Lane* Malaysia-Singapura;

- (iii) Fasa 3 : Pembukaan sempadan kepada pasaran antarabangsa mengikut wilayah dan pemeluasan VTL dengan negara-negara lain;

dan

- (iv) Fasa 4 : Pembukaan sempadan kepada semua pasaran antarabangsa.

6. Walau bagaimanapun sasaran ini tertakluk kepada arahan Kerajaan dan arahan/peraturan oleh Kementerian Kesihatan Malaysia (KKM) dan Majlis Keselamatan Negara (MKN) dari semasa ke semasa.

7. Untuk makluman, Kerajaan sememangnya telah bersedia dalam menangani gelombang pandemik yang seterusnya melalui pengalaman yang lalu selama dua tahun penularan COVID-19 ini. Pelbagai inisiatif telah pun dilakukan menerusi KKM bagi meningkatkan kapasiti kesihatan sama ada di peringkat kawalan di pintu-pintu masuk, pengesanan kes, saringan dan rawatan. Daripada segi rawatan, hospital-hospital telah pun bersedia dan jumlah katil ICU dan bukan ICU juga telah ditingkatkan. Selain itu Pusat Kuarantin & Rawatan Covid-19 (PKRC) akan turut dibuka atau ditambah mengikut keperluan semasa.

8. Berdasarkan maklumat daripada KKM juga, kerjasama dengan pelbagai pihak termasuk sektor swasta turut telah diwujudkan bagi menampung keperluan kesihatan negara.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA,
PARLIMEN KEEMPAT BELAS**

PERTANYAAN : JAWAB LISAN

**DARIPADA : YB DATO' MOHD NIZAR BIN HAJI ZAKARIA
[PARIT]**

TARIKH : 09 MAC 2022 (RABU)

SOALAN

DATO' MOHD NIZAR BIN HAJI ZAKARIA [PARIT] minta **MENTERI KEWANGAN** menyatakan apakah kriteria yang diambil kira oleh pihak Kementerian di dalam membuat penilaian bagi menjustifikasikan keperluan sesuatu aset untuk dijual itu adalah tidak strategik dan membebankan kewangan Kerajaan.

JAWAPAN

Tan Sri Yang Di Pertua,

Antara kriteria yang diambil kira dalam membuat penilaian bagi menjustifikasikan keperluan sesuatu aset untuk dijual itu adalah tidak strategik dan membebankan kewangan Kerajaan adalah seperti berikut:

- untuk pelupusan aset alih Kerajaan antaranya ialah aset tersebut tidak ekonomi untuk dibaiki, rosak dan tidak boleh digunakan, luput tempoh penggunaan dan keupayaan aset alih tidak lagi di peringkat optimum;
- Kerajaan dari semasa ke semasa sentiasa mengkaji potensi cadangan untuk merasionalisasikan syarikat Menteri Kewangan (Diperbadankan) [MKD] berdasarkan beberapa faktor termasuklah telah mencapai mandat atau objektif penubuhan, mengurangkan pendedahan risiko perniagaan kepada Kerajaan dan mengurangkan risiko *crowding-out* di pasaran;
- Pelupusan pegangan Kerajaan dalam syarikat-syarikat MKD akan turut mengambil kira beberapa faktor lain termasuk nilai yang telah dicipta dalam syarikat, kepentingan komersial dan strategik kepada pemegang saham (Kerajaan) dan kemampuan pemilik baru untuk membawa syarikat yang akan dilupuskan ke tahap yang lebih baik; dan
- Aset yang dicadang untuk dilupuskan akan dinilai dengan teliti dan komprehensif berasaskan kepada amalan industri terbaik (*best industry practices*) serta kaedah-kaedah lain sebagaimana lazim diguna pakai dalam penilaian aset untuk pengambilalihan dan pelupusan aset korporat.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA,
PARLIMEN KEEMPAT BELAS**

**PERTANYAAN : JAWAB LISAN
DARIPADA : YB DATO' SRI HASAN BIN ARIFIN [ROMPIN]
TARIKH : 09 MAC 2022 (RABU)**

SOALAN

Dato' Sri Hasan bin Arifin [Rompin] minta **MENTERI PEMBANGUNAN WANITA, KELUARGA DAN MASYARAKAT** menyatakan statistik terkini berkaitan kes aduan keganasan rumah tangga dan inisiatif yang dilaksanakan dalam membendung dan membantu individu yang terkesan dalam hal ini.

JAWAPAN

Tuan Yang di-Pertua,

Berdasarkan statistik Polis DiRaja Malaysia (PDRM), jumlah kes keganasan rumahtangga yang telah dilaporkan dan dibuka kertas siasatan **sepanjang tahun 2021 adalah sebanyak 7,468 kes**. Peningkatan sebanyak 42% berbanding 5,260 kes yang dilaporkan pada tahun 2020.

Manakala, sebanyak 3,028 panggilan melibatkan kes keganasan rumahtangga diterima melalui Talian Kasih 15999 bagi tempoh Januari hingga Disember 2021. Daripada jumlah tersebut, sebanyak 974 panggilan dikategorikan sebagai aduan.

Kementerian Pembangunan Wanita, Keluarga dan Masyarakat (KPWKM) amat mengambil berat dan prihatin terhadap mangsa keganasan rumah tangga. Oleh itu menerusi Akta Keganasan Rumah Tangga 1994 [Akta 521], Kerajaan memperuntukkan perlindungan undang-undang dalam situasi keganasan rumah tangga.

Tuan Yang di-Pertua,

Antara inisiatif yang telah dijalankan dan masih diteruskan adalah seperti berikut:

1) Talian Kasih 15999

KPWKM telah memperluaskan usaha mempromosikan perkhidmatan aduan atas talian melalui “Talian Kasih 15999” dan aplikasi WhatsApp 019-26 15999. Perkhidmatan ini beroperasi 24

jam setiap hari sebagai *single point of contact* kepada semua masyarakat bagi mengemukakan aduan, mendapatkan khidmat nasihat serta mengakses bantuan dan sokongan yang disediakan oleh KPWKM termasuk perkhidmatan psiko-sosial dan berperanan sebagai pusat rujukan, tempat untuk mendapatkan *immediate relief* seperti kaunseling dan perlindungan sementara sebelum mereka dirujuk kepada pihak-pihak yang berkaitan.

2) Mesyuarat Jawatankuasa Menangani Keganasan Rumah Tangga

Jawatankuasa Menangani Keganasan Rumah Tangga (JKRT) diwujudkan pada tahun 2019 sebagai platform menyelaraskan usaha menangani keganasan rumah tangga secara bersama oleh agensi kerajaan dan Pertubuhan Bukan Kerajaan (NGO). Pelbagai inisiatif telah dilaksanakan di bawah payung JKRT dalam mendepani isu keganasan rumah tangga terutamanya semasa pelaksanaan Perintah Kawalan Pergerakan (PKP).

3) Program Advokasi dan Psikososial

KPWKM melalui Jabatan Pembangunan Wanita (JPW) menjalankan pelbagai program advokasi sepanjang tahun. Program ini menyediakan perkhidmatan kaunseling secara atas talian dan melaksanakan program psikopendidikan melalui DeStress Clinic, Klinik Undang-Undang, Wanita Anti Jenayah dan program Sukarelawan Skuad Waja (sejak tahun 2021).

Skuad WAJA memberi panduan kepada masyarakat tentang pentingnya usaha menghentikan sebarang bentuk keganasan terhadap wanita serta membantu mangsa untuk merujuk kes kepada

pihak yang berwajib dan mendapatkan pertolongan profesional. Program ini dilihat dapat membantu komuniti dalam memberi kesedaran mengenai kepentingan menangani isu-isu jenayah. Sukarelawan Skuad WAJA melaksanakan pelbagai aktiviti psikososial dalam komuniti meliputi bimbingan, nasihat dan rujukan kepada pihak-pihak berkaitan.

4) Perkhidmatan Kaunseling dan Psikososial

Perkhidmatan kaunseling / tele-kaunseling dan psikososial melalui agensi KPWKM iaitu Lembaga Kaunselor Malaysia (LKM), Jabatan Kebajikan Masyarakat (JKM) dan Jabatan Pembangunan Wanita (JPW) menyediakan perkhidmatan kaunseling motivasi kepada masyarakat, khususnya ibu tunggal, wanita, remaja, mangsa keganasan dan lain-lain. Perkhidmatan ini dikendalikan oleh kaunselor di negeri dan daerah bagi membantu mereka yang memerlukan.

5) Bantuan Sokongan melalui Jabatan Kebajikan Masyarakat

JKM turut menyediakan bantuan sokongan kepada wanita seperti Tabung Bantuan Segera, Bantuan Kanak-Kanak dan Bantuan Bakul Prihatin tertakluk kepada kelayakan dan syarat bantuan tersebut.

6) Pusat Sokongan Sosial Setempat (PSSS)

- a. PSSS ditubuhkan sebagai inisiatif untuk menangani isu keganasan rumah tangga dan masalah sosial.
- b. PSSS ini juga berperanan sebagai pusat rujukan khusus di peringkat komuniti kepada semua lapisan masyarakat.
- c. Perkhidmatan PSSS ini disediakan secara bergerak (mobile) dan tetap di premis.

7) Penyediaan Tempat Selamat / Tempat Berlindung / Rumah Perlindungan

- a. Penempatan sementara di **Tempat Selamat**, sekiranya diperlukan oleh mangsa. Tempat Selamat di bawah kendalian kerajaan beroperasi sepanjang tempoh penularan pandemik COVID-19. Sehingga kini terdapat 42 Tempat Selamat yang telah diluluskan oleh Menteri di bawah Akta Keganasan Rumah Tangga 1994 [Akta 521];
- b. Penempatan sementara di dua (2) buah **Tempat Berlindung** di bawah Jabatan Pembangunan Wanita (JPW), sekiranya diperlukan oleh mangsa;
- c. Jabatan Agama Islam Wilayah Persekutuan (JAWI) dengan kerjasama Jabatan Pembangunan Wanita (JPW), Kementerian Pembangunan Wanita, Keluarga dan Masyarakat (KPWKM) telah mewujudkan **pusat Transit Keganasan Rumah Tangga di masjid**;
- d. **Mengeluarkan Perintah Perlindungan Kecemasan/ *Emergency Protection Order* (EPO)**, Seksyen 3A Akta 521;
- e. **Membantu mendapatkan Perintah Perlindungan Interim / *Interim Protection Order* (IPO)**, Seksyen 4 Akta 521 daripada Mahkamah; dan
- f. Membantu mendapatkan **Perintah Perlindungan *Protection Order* (PO)**, Seksyen 5 Akta 521 daripada Mahkamah.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA,
PARLIMEN KEEMPAT BELAS**

PERTANYAAN : LISAN
DARIPADA : YB TUAN CHANG LIH KANG
[TANJONG MALIM]
TARIKH : 09 MAC 2022 (RABU)

SOALAN

TUAN CHANG LIH KANG [TANJONG MALIM] minta **MENTERI PELANCONGAN, SENI DAN BUDAYA** menyatakan jumlah peruntukan yang diberi kepada Perpustakaan Negara untuk pembelian buku baru dari tahun 2020 hingga 2022. Nyatakan pecahan peratusan buku baru mengikut bahasa pada tahun 2021.

JAWAPAN

Tuan Yang di-Pertua,

1. Perpustakaan Negara Malaysia telah menerima peruntukan dan melaksanakan pembelian buku baru untuk Perpustakaan Negara Malaysia (PNM) dan Perpustakaan Desa Perpustakaan Negara Malaysia (PD PNM) di seluruh negara setiap tahun.

2. Peruntukan bagi tahun 2020 sehingga 2022 adalah seperti berikut:

- Pada tahun 2020, Perpustakaan Negara telah diberi peruntukan sebanyak RM542,000 manakala Perpustakaan Desa PNM pula sebanyak RM2,000,000.
- Manakala bagi tahun 2021, Perpustakaan Negara telah menerima peruntukan sebanyak RM555,300 dan Perpustakaan Desa PNM pula diperuntukkan sebanyak RM2,000,000.
- Sementara itu bagi tahun ini iaitu 2022, sebanyak RM498,000 telah diperuntukkan untuk pembelian buku baru bagi Perpustakaan Negara, manakala RM1,500,000 lagi diperuntukkan untuk perkara yang sama bagi Perpustakaan Desa PNM.

3. Pecahan peratusan buku baru di Perpustakaan Negara pada tahun 2021 ialah 46% untuk Bahasa Melayu, 42% untuk Bahasa Inggeris, 11% untuk Bahasa Cina dan 1% untuk Bahasa Tamil.

NO SOALAN: 43

4. Manakala pecahan peratusan buku baru di Perpustakaan Desa PNM pada tahun ialah 85% untuk Bahasa Melayu, 11% untuk Bahasa Inggeris, 2% untuk Bahasa Cina dan 2% untuk Bahasa Tamil.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA,
PARLIMEN KEEMPAT BELAS**

PERTANYAAN : JAWBA LISAN
DARIPADA : YB DATO' SRI HAJI TAJUDIN BIN ABDUL
RAHMAN [PASIR SALAK]
TARIKH : 09 MAC 2022

SOALAN

DATO' SRI HAJI TAJUDDIN BIN ABDUL RAHMAN [PASIR SALAK] minta **MENTERI PERTANIAN DAN INDUSTRI MAKANAN** menyatakan berkenaan projek pengairan Sungai Manik yang telah tertangguh sekian lama. Penangguhan projek ini menjejaskan periuk nasi petani-petani di kawasan Sungai Manik.

JAWAPAN

Tuan Yang di-Pertua,

Untuk makluman Ahli Yang Berhormat, Skim Pengairan Sungai Manik yang meliputi kawasan padi seluas 6,318 hektar terbahagi kepada dua (2) sub skim iaitu Sub-Skim Sungai Manik dengan keluasan 3,602 hektar dan Sub-Skim Labu Kubong dengan keluasan 2,716 hektar. Pelaksanaan projek pengairan dan saliran di dalam skim ini dipantau oleh IADA Seberang Perak.

Terdapat empat (4) projek pengairan dan saliran dalam pelaksanaan di Skim Pengairan Sungai Manik yang mana satu (1) daripadanya dilaksanakan oleh MAFI dan selebihnya dilaksanakan oleh Jabatan Pengairan dan Saliran (JPS). Status pelaksanaan projek-projek tersebut adalah seperti berikut:

- i. Projek Rancangan Menaiktaraf Tali Air Sekunder di Tali Air 1,2,3,4 Dan 5 di Rancangan Pengairan Sungai Manik (dilaksana oleh MAFI)**

Sehingga 31 Januari 2022 kemajuan kerja kontraktor adalah 84.5% berbanding jadual 100%. Langkah langkah mitigasi telah dilaksanakan oleh MAFI terhadap projek ini.

- ii. Membina Dan Menaiktaraf Infrastruktur Pengairan dan Saliran Serta Kerja-Kerja Berkaitan di Skim Pengairan Sg. Manik, Iada Seberang Perak, Perak (dilaksana oleh JPS)**

Projek sedang giat berjalan di tapak dengan peratus kemajuan sebenar sehingga 7 Februari 2022 adalah 9.44% dan dijangka siap pada September 2023.

iii. Menaiktaraf Taliair Tersier di Skim Pengairan Sungai Manik, Iada Seberang Perak, Perak (dilaksana oleh JPS)

Projek berjalan mengikut jadual dengan kemajuan fizikal sebenar sehingga 7 Februari 2022 adalah 57.41% dan projek dijangka siap pada 6 September 2022.

iv. Projek Menaiktaraf Sistem Saliran Pengairan Sg. Manik, Hilir Perak, Perak (dilaksana oleh JPS)

Peratus kemajuan perlaksanaan sehingga 7 Februari 2022 adalah 53.0% dan projek dijangka siap pada 16 Disember 2022.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA,
PARLIMEN KEEMPAT BELAS**

PERTANYAAN : JAWAB LISAN

**DARIPADA : YB TUAN PANG HOK LIONG
[LABIS]**

TARIKH : 09 MAC 2022 (RABU)

SOALAN

TUAN PANG HOK LIONG [LABIS] minta **MENTERI KEWANGAN** menyatakan peratusan kejatuhan dalam mata wang Ringgit Malaysia berbanding dengan mata wang negara-negara berikut dari 1975 hingga 2021 bagi Dollar Amerika Syarikat, Dollar Singapura, Thailand Baht, Vietnam Dong dan Indonesia Rupiah.

JAWAPAN

Tan Sri Yang Di-Pertua,

Prestasi nilai mata wang ringgit secara lazimnya dipengaruhi oleh faktor-faktor luaran dan domestik. Sejak tahun 1975, ekonomi Malaysia telah melalui perubahan yang ketara dari segi struktur dan peningkatan keterbukaan perdagangan dan kewangan. Justeru, perbandingan perubahan mata wang dalam tempoh masa yang begitu lama adalah kurang sesuai dan tidak dapat memberikan penilaian yang tepat terhadap prestasi ringgit.

Dari tahun 1975 hingga 2021, nilai ringgit telah meningkat sebanyak 35.8% berbanding dong Vietnam dan 437.1% berbanding rupiah Indonesia. Sementara itu, dalam tempoh yang sama, nilai ringgit merosot sebanyak 44.7% berbanding dolar Amerika Syarikat, 67.7% berbanding dolar Singapura dan 22.2% berbanding baht Thailand. Maklumat mengenai mata wang ini adalah berdasarkan data terawal sedia ada bagi kesemua negara iaitu Dolar Amerika dan dolar Singapura dari 1975, baht Thailand dari 1982, dong Vietnam dari 1994 dan rupiah Indonesia dari 1989 sehingga kadar akhir tempoh masing-masing pada 31 Disember 2021.

Trend ini mencerminkan peranan dolar AS sebagai mata wang selamat (*safe haven currency*) semasa tempoh penghindaran risiko. Perkara ini juga didorong oleh lebihan imbalan akaun semasa yang tinggi yang dicatatkan oleh negara Singapura.

Dalam keadaan pasaran kewangan global yang tidak menentu, kadar pertukaran ringgit yang fleksibel telah memainkan peranan yang penting sebagai penyerap kejutan luaran tanpa menjejaskan aktiviti ekonomi domestik. Hal ini juga secara tidak langsung telah meningkatkan daya saing eksport negara yang mana ia telah menjadikan produk keluaran domestik lebih berdaya saing berbanding dengan barangan import. Selain itu, keuntungan yang diperolehi dari pertukaran mata wang asing juga telah membantu mengurangkan kemerosotan hasil kerajaan disebabkan oleh faktor seperti kelemahan harga komoditi dan sumber

pendapatan lain terutamanya pada tahun 2020 dan separuh pertama tahun 2021. Pertukaran mata wang tersebut juga telah menyebabkan aset ringgit lebih menarik, seterusnya menyumbang kepada peningkatan aliran masuk dana asing.

Sungguhpun kadar pertukaran ringgit ditentukan sepenuhnya oleh sentimen dalam pasaran, Kerajaan melalui Bank Negara Malaysia (BNM) mengambil kira keadaan volatiliti ringgit. Sekiranya volatiliti ringgit adalah berlebihan, ia boleh meningkatkan ketidaktentuan seterusnya menjejaskan kestabilan kewangan dan mengganggu aktiviti ekonomi. Dalam hal ini, BNM akan terus berusaha untuk memastikan keadaan pasaran kewangan kekal stabil dan lancar dengan mengambil langkah proaktif bagi memastikan mudah tunai yang mencukupi, pasaran yang berdaya tahan dan mengurangkan aktiviti spekulasi dalam pasaran.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA
PARLIMEN KEEMPAT BELAS**

**PERTANYAAN : JAWAB LISAN
DARIPADA : YB DATUK HAJI SHABUDIN BIN YAHAYA
[TASEK GELUGOR]
TARIKH : 09 MAC 2022 (RABU)**

SOALAN

DATUK HAJI SHABUDIN BIN YAHAYA [TASEK GELUGOR] minta **MENTERI KANAN PENDIDIKAN** menyatakan statistik jangkitan COVID-19 di kalangan murid sekolah yang berusia antara 7 hingga 12 tahun serta apakah langkah yang diambil bagi mengelakkan jangkitan sehingga mengganggu sesi pembelajaran serta peperiksaan awam.

JAWAPAN

Tuan Yang di-Pertua,

Kementerian Pendidikan Malaysia (KPM) komited untuk menyediakan persekitaran sekolah yang selamat bagi pengajaran dan pembelajaran (PdP) secara bersemuka. Dalam hal ini, KPM sentiasa memantau rapi statistik jangkitan COVID-19 dalam kalangan warga sekolah termasuk murid.

Berdasarkan data KPM bagi tempoh 1 Januari hingga 21 Februari 2022, peratus murid berusia antara 7 hingga 12 tahun yang positif COVID-19 adalah 0.97 peratus daripada jumlah keseluruhan enrolmen murid sekolah rendah. Ini turut meliputi kes jangkitan yang berlaku di luar sekolah.

Untuk makluman Ahli Yang Berhormat, KPM komited dalam memastikan persekitaran sekolah adalah selamat bagi pelaksanaan pengajaran dan pembelajaran (PdP) secara bersemuka.

Bagi memastikan kelancaran pengoperasian sekolah, KPM telah menyediakan Garis Panduan Pengurusan dan Pengoperasian Sekolah 3.0 (GPPPS) 3.0 sebagai rujukan kepada jabatan pendidikan negeri (JPN), pejabat pendidikan daerah (PPD) dan pentadbir serta guru. Garis Panduan ini mengandungi panduan khusus mengenai prosedur pengurusan murid bergejala, murid disahkan positif COVID-19, murid yang dikenal pasti sebagai kontak rapat pesakit COVID-19 di sekolah dan penutupan sekolah.

Selari dengan situasi semasa berkenaan penularan wabak COVID-19, KPM sentiasa berbincang secara berkala bersama-sama Kementerian Kesihatan Malaysia (KKM) untuk meneliti dan menambah baik prosedur operasi standard (SOP) sedia ada bagi mengekang jangkitan COVID-19 di sekolah. Berdasarkan saranan daripada KKM, pihak KPM telah mengambil tindakan memperketatkan lagi pelaksanaan GPPPS 3.0 dengan menyediakan lampiran tambahan (*annexe*) kepada garis panduan ini yang memberi penekanan kepada keselamatan dan kesihatan warga sekolah. Ia menekankan beberapa aspek utama seperti kehadiran warga sekolah yang bergejala, kebenaran masuk berdasarkan status MySejahtera, tanggungjawab guru di sekolah, pengurusan bilik guru, pengurusan murid di sekolah, pengurusan asrama, pengurusan dewan makan asrama dan pengurusan kes positif di sekolah. Selain itu, peranan ketua kelas/pengawas/pembimbing rakan sebaya turut diperkasakan untuk bersama-sama memantau rakan-rakan yang bergejala dari semasa ke semasa dan mengingatkan rakan mereka supaya sentiasa mematuhi SOP. Selain itu, KPM turut melaksanakan ujian saringan bergilir COVID-19 bagi murid sekolah rendah di bawah Strategi Pengujian COVID-19 Kebangsaan.

KPM komited dalam memastikan pengoperasian sekolah berjalan dengan teratur dan selamat serta sentiasa mengambil langkah proaktif bagi mengawal dan mengekang penularan jangkitan wabak COVID-19 dalam kalangan murid di sekolah.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA,
PARLIMEN KEEMPAT BELAS**

PERTANYAAN : JAWAB LISAN

**DARIPADA : YB PUAN MARIA CHIN BINTI ABDULLAH
[PETALING JAYA]**

TARIKH : 09 MAC 2022 (RABU)

SOALAN

PUAN MARIA CHIN BINTI ABDULLAH [PETALING JAYA] minta **MENTERI KEWANGAN** menyatakan berapa jumlah wang yang telah dikumpul oleh Kerajaan daripada dana 1MDB yang telah diselewengkan sejak 2018 sehingga kini, dari mana sumbernya dan bagaimanakah dana ini disimpan/digunakan di Malaysia.

JAWAPAN

Tan Sri Yang Di Pertua,

Sehingga 31 Januari 2022, jumlah dana berkaitan 1Malaysia Development Bhd (1MDB) yang telah berjaya didapatkan kembali dan dimasukkan ke dalam Akaun Amanah Mendapatkan Kembali Aset (*Assets Recovery*) [AA MKA] adalah sebanyak kira-kira **RM19.14 bilion**. Sebahagian besar dana tersebut diperoleh daripada 5 sumber utama seperti berikut:

- sebanyak USD1.23 bilion atau kira-kira RM5.17 bilion telah diperoleh daripada Jabatan Keadilan Amerika Syarikat (DOJ);
- sebanyak USD2.5 bilion atau kira-kira RM10.5 bilion diperoleh daripada **Goldman Sachs sebagai sebahagian jumlah** penyelesaian yang telah berjaya dimuktamadkan pada Julai 2020 (dikreditkan pada September 2020);
- sebanyak USD80 juta atau kira-kira RM336 juta diterima daripada Deloitte hasil penyelesaian global yang telah dimeterai pada 24 Mei 2021 (dikreditkan pada Jun 2021);
- sebanyak RM2.315 bilion diterima daripada AmBank hasil penyelesaian global yang telah dimeterai pada 5 Mei 2021 (dikreditkan pada Julai dan Disember 2021); dan
- sebanyak USD80 juta atau kira-kira RM336 juta diterima daripada KPMG hasil penyelesaian global yang telah dimeterai pada 16 Disember 2021 (dikreditkan pada Januari 2022).

Dana AA MKA ini telah/akan digunakan bagi tujuan pembayaran hutang 1MDB. Ini penting bagi mengelak berlakunya *event of default* ke atas hutang-hutang 1MDB yang seterusnya akan memberikan implikasi buruk kepada ekonomi negara kerana hutang-hutang berkenaan dijamin oleh Kerajaan Malaysia melalui Jaminan Kerajaan, Surat Sokongan dan *Settlement Agreement*. Di samping itu, penggunaan dana ini untuk membayar hutang 1MDB juga akan dapat mengurangkan tanggungan beban kewangan Kerajaan.

Pada 31 Januari 2022, sebanyak **RM3.31 bilion** dana AA MKA telah digunakan untuk tujuan pelunasan hutang 1MDB manakala baki dana AA MKA pula adalah sebanyak **RM15.72 bilion** (termasuk hibah dan untung/rugi tukaran mata wang asing).

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA,
PARLIMEN KEEMPAT BELAS**

**PERTANYAAN : JAWAB LISAN
DARIPADA : YB DATO' MASIR KUJAT [SRI AMAN]
TARIKH : 09 MAC 2022**

SOALAN

DATO' MASIR KUJAT [SRI AMAN] minta **MENTERI PERTANIAN DAN INDUSTRI MAKANAN** menyatakan apakah langkah drastik yang akan diambil oleh Kementerian bagi mengatasi masalah harga yang melonjak tinggi seperti racun, baja, makanan ternakan dan lain-lain bagi petani di kawasan luar bandar.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian ini menyedari dan amat peka terhadap isu lonjakan harga input seperti baja, racun dan makanan ternakan. Kenaikan ini disebabkan oleh kenaikan harga import bahan mentah seperti ammonium sulfat, asid fosforus dan urea bagi penghasilan baja dan racun serta kenaikan harga jagung bijirin dan soy *bean meals* (SBM) bagi makanan ternakan yang diimport dari luar negara seperti China, India dan Amerika Latin. Kenaikan harga ini memberi kesan kepada golongan petani dan penternak sektor ini khususnya yang berada di kawasan luar bandar.

Langkah drastik yang diambil oleh Kementerian dalam mengurangkan kesan lonjakan harga adalah:

- i. Menyediakan peruntukan sebanyak RM1.5 bilion bagi subsidi padi iaitu yang merangkumi Skim Baja Padi Kerajaan Persekutuan (SBPKP), Skim Insentif Pengeluaran Padi (SIPP), Insentif Benih Padi Sah (IBPS) dan Skim Baja dan Racun Padi Bukit (SBRPB). Kerajaan juga turut memberikan tambahan peruntukan sebanyak RM62 juta bagi SIPP yang memberi manfaat kepada 322,830 orang pesawah;
- ii. Sebanyak RM200 juta telah diperuntukan di bawah Tabung Ekonomi Kumpulan Usahawan Niaga (TEKUN) dan Agrobank sebagai pinjaman pada kadar faedah sifar peratus dan moratorium bayaran balik pinjaman selama enam bulan.

Peruntukan ini boleh memberikan manfaat kepada seramai 276,621 orang pengusaha tanaman sayur-sayuran serta buah-buahan;

- iii. Kerajaan juga telah memperuntukkan sebanyak RM528.52 juta bagi subsidi ayam dan telur bermula dari 5 Februari hingga 5 Jun 2022. Bantuan yang diberikan adalah sebanyak RM0.60/kg bagi ayam bulat dan RM0.05/biji bagi telur gred A, B dan C. Usaha ini bukan sahaja dapat mengurangkan kenaikan harga ayam dan telur, malah membantu 2,061 penternak ayam pedaging dan 194 penternak ayam penelur mengimbangi kenaikan kos; dan
- iv. Kerajaan juga telah membenarkan sebanyak 36 buah syarikat untuk mengimport ayam bulat dan keratan dari loji luar sehingga 10,000 tan metrik sebulan bermula Disember 2021 hingga Mei 2022 bagi memastikan sumber ayam negara sentiasa mencukupi dengan harga yang terkawal.

Kementerian melalui Jabatan dan agensi turut memperkenalkan alternatif lain bagi mengurangkan masalah kenaikan harga input pertanian yang diimport ini seperti:

- i. Menggalakkan petani mengamalkan Pengurusan Perosak Bersepadu (*Integrated Pest Management*) bagi mengurangkan ketergantungan terhadap racun kimia melalui kawalan secara kultura, kawalan fizikal dan kawalan biologi;
- ii. Menggalakkan penggunaan teknologi-teknologi moden seperti fertigasi dan *control environment farming* yang memastikan

keperluan tanaman seperti air baja, cahaya, air, suhu dan kelembapan bagi tanaman sentiasa terkawal.

- iii. Menggunakan benih-benih berkualiti dan varieti yang rentan penyakit dan perubahan iklim melalui penyelidikan yang berterusan oleh agensi-agensi dan pihak swasta. Benih-benih berkualiti dan varieti yang rentan penyakit dan perubahan iklim akan dapat membantu tumbesaran tanaman tanpa terlalu bergantung kepada baja dan racun.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA,
PARLIMEN KEEMPAT BELAS**

PERTANYAAN : LISAN
DARIPADA : YB TUAN YUSUF BIN ABD. WAHAB
[TANJONG MANIS]
TARIKH : 09 MAC 2022 (RABU)

SOALAN

TUAN YUSUF BIN ABD. WAHAB [TANJONG MANIS] minta **MENTERI PERTANIAN DAN INDUSTRI MAKANAN** menyatakan adakah kerja pembaikan segera untuk membaiki ban-ban pertanian yang termendap serta struktur pintu-pintu air yang rosak dan mengancam tanaman penduduk kampung terutama di Kampung Bruit dan Tekajong di utara Pulau Bruit telah dilakukan.

JAWAPAN

Tuan Yang di-Pertua,

Untuk makluman Yang Berhormat, pihak Kementerian memandang serius terhadap permasalahan yang berlaku dan telah mengenalpasti beberapa kawasan yang terlibat di Skim Pertanian Pulau Buit termasuklah di Kampung Buit dan Tekajong.

Sehubungan dengan itu, pihak Kementerian melalui Bahagian Pengairan dan Saliran Pertanian dan Jabatan Pengairan dan Saliran (JPS) Negeri Sarawak sedang dalam proses untuk mengemukakan permohonan butiran projek baru berjumlah RM24.5 juta di bawah *Rolling Plan* ke-3 tahun 2023, RMKe-12 kepada Unit Perancangan Ekonomi (EPU).

Permohonan butiran projek baru ini adalah menjurus kepada skop membaikpulih dan menaiktaraf infrastruktur sediaada di Pulau Buit termasuk di kawasan Kg. Buit dan Kg. Tekajong bagi menampung keupayaan skim tersebut serta sekaligus dapat mempertingkatkan keberhasilan tanaman.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA,
PARLIMEN KEEMPAT BELAS**

**PERTANYAAN : JAWAB LISAN
DARIPADA : YB PUAN HAJAH NATRAH BINTI ISMAIL
[SEKIJANG]
TARIKH : 09 MAC 2022 (RABU)**

SOALAN

PUAN HAJAH NATRAH BINTI ISMAIL [SEKIJANG] minta **MENTERI KANAN PENDIDIKAN** menyatakan apakah usaha-usaha yang telah dilaksanakan oleh pihak Kementerian untuk melatih ibu bapa membimbing anak-anak mereka sewaktu PdPR kerana ramai ibu bapa tidak tahu akan kaedah pembelajaran yang berkesan.

JAWAPAN

Tuan Yang di-Pertua,

Kementerian Pendidikan Malaysia (KPM) telah menyediakan akses pembelajaran kepada murid melalui kaedah PdPR mengikut kesesuaian guru dan murid. PdPR boleh dilaksanakan melalui tiga pendekatan iaitu secara dalam talian (online), luar talian (off-line) dan *off-site* mengikut kesesuaian guru dan murid.

Bagi membantu ibu bapa membimbing anak mereka di rumah, KPM telah menyediakan panduan dan maklumat berkaitan pelaksanaan PdPR kepada ibu bapa melalui pelantar *Digital Educational Learning Initiative Malaysia* (DELIMa). Ibu bapa boleh menggunakan pelantar DELIMa untuk mendapatkan bahan pembelajaran dan mengetahui kaedah bimbingan yang berkesan bagi membantu pembelajaran anak mereka.

Selain itu, bagi meningkatkan peranan ibu bapa dalam menyokong PdPR, KPM telah bekerjasama dengan Universiti Kebangsaan Malaysia (UKM) untuk mengadakan beberapa siri Webinar Amalan Mesra Kanak-Kanak di Sekolah. Sepanjang Jun hingga September 2021, seramai 4,079 peserta yang terdiri daripada ibu bapa, guru dan murid, telah menghadiri program ini secara dalam talian.

KPM turut memperkukuh inisiatif pelibatan ibu bapa, komuniti dan pihak swasta (PIBKS) bagi meningkatkan pelibatan ibu bapa dalam menyokong pembelajaran murid. Menerusi PIBKS, *Focal Person* di peringkat daerah, negeri dan kebangsaan dilantik. Mereka berperanan sebagai agen penyampai dalam membimbing ibu bapa untuk membantu pembelajaran anak. Pada tahun 2021, seramai 20,000 ibu bapa dan ahli komuniti telah diberi pendedahan berkaitan Pengajaran dan Pembelajaran di Rumah (PdPR), melalui siri webinar.

KPM akan sentiasa meneruskan kerjasama dan pelibatan aktif ibu bapa serta rakan strategik untuk membantu mengoptimumkan pembelajaran murid.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA,
PARLIMEN KEEMPAT BELAS**

**PERTANYAAN : JAWAB LISAN
DARIPADA : YB PUAN TERESA KOK SUH SIM
[SEPUTEH]
TARIKH : 09 MAC 2022 (RABU)**

SOALAN

Puan Teresa Kok Suh Sim [Seputeh] minta **MENTERI PEMBANGUNAN WANITA, KELUARGA DAN MASYARAKAT** menyatakan apakah perkembangan terbaru tentang penggubalan undang-undang yang menghalang perkahwinan bawah umur. Apakah Kementerian akan meneruskan Pelan Strategi Kebangsaan bagi Menangani Punca Perkahwinan Bawah Umur yang dilancarkan dalam Januari 2020.

JAWAPAN

Tuan Yang di-Pertua,

Kerajaan akan menggerakkan usaha menyelaraskan perundangan berkaitan di negara ini dengan menetapkan had umur minimum perkahwinan kepada 18 tahun. Penyelarasan perundangan berkaitan penetapan had umur perkahwinan kepada 18 tahun ini merupakan strategi jangka masa panjang (2020-2025) di bawah Pelan Strategi Kebangsaan Bagi Menangani Punca Perkahwinan Bawah Umur. Suka untuk saya nyatakan juga bahawa Kementerian ini sentiasa mengadakan perbincangan dan kerjasama dengan Jabatan Kemajuan Islam Malaysia (JAKIM) dan Jabatan Kehakiman Syariah Malaysia (JKSM) dalam usaha memastikan penambahbaikan perundangan yang berkaitan dengan penetapan had umur minimum perkahwinan bagi orang Islam.

Manakala, bagi perkahwinan bukan Islam pula, undang-undang sedia ada telah memperuntukkan dengan jelas mengenai had umur minimum pendaftaran perkahwinan bagi kedua-dua lelaki dan perempuan adalah 18 tahun. Namun begitu, Kementerian ini dengan kerjasama Kementerian Dalam Negeri (KDN) akan terus berusaha untuk menambahbaik dan memperketatkan prosedur permohonan perkahwinan bawah umur sedia ada.

Tuan Yang di-Pertua,

Kerajaan komited dalam usaha mengekang perkahwinan bawah umur melalui pelaksanaan program di bawah Pelan Strategi Kebangsaan Bagi Menangani Punca Perkahwinan Bawah Umur. Pelan strategi ini mengambil kira pelbagai sudut pandang termasuklah dari aspek pendidikan, advokasi, kesihatan, pengukuhan institusi keluarga, dan sokongan ke atas sosioekonomi masyarakat. Menaikkan had umur perkahwinan kepada 18 tahun bukan satu-satunya penyelesaian bagi menghalang perkahwinan bawah umur daripada terus berlaku. Ini kerana punca perkahwinan bawah umur bukan sahaja perlu ditangani melalui perundangan, malahan perubahan dasar dan pelaksanaan program serta aktiviti kesedaran. Pada masa yang sama juga, Jawatankuasa Pemandu yang ditubuhkan akan terus memainkan peranan untuk memantau pelaksanaan dan perkembangan program yang dirancang.

Saya berpandangan bahawa Pelan ini seharusnya diusahakan secara kolektif supaya isu perkahwinan bawah umur dapat dikawal daripada terus berlarutan dan seterusnya memberi kehidupan lebih baik demi masa depan kanak-kanak. Justeru itu, saya menyeru sokongan dan komitmen berterusan daripada semua pihak berkepentingan termasuklah di peringkat akar umbi bagi menjayakan pelaksanaan program dan tindakan di bawah Pelan ini.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA,
PARLIMEN KEEMPAT BELAS**

**PERTANYAAN : JAWAB LISAN
DARIPADA : YB DATO' SRI HASAN BIN ARIFIN [ROMPIN]
TARIKH : 09 MAC 2022 (RABU)**

SOALAN

DATO' SRI HASAN BIN ARIFIN [ROMPIN] minta **MENTERI PERTANIAN DAN INDUSTRI MAKANAN** menyatakan sejauh manakah tahap pengukuhan sekuriti makanan negara yang terkini memandangkan sejak kebelakangan ini bekalan makanan dan barang mentah kerap mengalami kenaikan harga yang mendadak kerana kekurangan bekalan oleh pembekal.

JAWAPAN

Tuan Yang di-Pertua,

Untuk makluman Ahli Yang Berhormat, usaha-usaha untuk memperkukuh tahap sekuriti makanan jelas diperlihatkan menerusi strategi-strategi yang dirangka di bawah Pelan Tindakan Mengenai Dasar Sekuriti Makanan Negara (Pelan Tindakan DSMN) 2021-2025 dalam meningkatkan produktiviti sektor agromakanan bagi memenuhi permintaan pasaran tempatan dalam usaha untuk menstabilkan harga makanan. Antaranya:

- (i) pelaksanaan Program *Smart* Sawah Berskala Besar (*Smart* SBB) yang menyasarkan peningkatan purata hasil per hektar daripada 3.5 tan metrik kepada 7.0 tan metrik dalam tempoh Rancangan Malaysia Kedua Belas (RMKe-12) melalui pelbagai kaedah pelaksanaan seperti pertanian kontrak, sewaan dan sebagainya;
- (ii) pembangunan dan pemerksaan platform pemasaran produk agromakanan secara e-dagang bagi mengurangkan peranan orang tengah menerusi FAMA dan LKIM seperti *Agrobazaar Online* dan NEKMATBIZ serta kerjasama strategik dengan platform swasta; dan
- (iii) pembangunan makanan ternakan alternatif dan pemerksaan industri benih tempatan bagi mengurangkan kebergantungan negara kepada import input pertanian selain menyumbang kepada kestabilan harga makanan.

Selain itu, pemberian insentif berteraskan pengeluaran makanan juga dilihat sebagai salah satu usaha yang mampu membantu dalam menangani kesan kenaikan harga bahan mentah global. Antara insentif yang telah ditawarkan merangkumi:

- (i) bantuan subsidi racun untuk pesawah daripada RM200 kepada RM300 sehektar yang merupakan sebahagian daripada usaha Kerajaan di bawah suntikan ekonomi sebanyak RM262 juta untuk mengatasi kenaikan harga input pertanian;
- (ii) subsidi ayam dan telur dengan kos sebanyak RM528.52 juta dalam usaha mengurangkan beban kepada penternak ayam serta menstabilkan bekalan dan harga; dan
- (iii) Skim Harga Bersubsidi Dedak Isi Rong Sawit di bawah Bajet 2022 yang membolehkan penternak kecil ruminan mendapatkan bekalan makanan ternakan dengan harga lebih murah selaras dengan konsep ekonomi kitaran.

Pada masa yang sama, Kementerian Pertanian dan Industri Makanan (MAFI) juga akan meneruskan usaha untuk mengenal pasti negara sumber alternatif import makanan dalam memastikan sumber bekalan import tidak terjejas oleh sebarang gangguan yang berlaku dalam rantaian makanan global.

Kementerian ini yakin strategi dan usaha yang dilaksanakan ini dapat memperkuat sistem makanan negara serta meningkatkan penghasilan bahan mentah secara domestik dalam menangani kekurangan bekalan makanan dan bahan mentah yang kerap memberi impak kepada kenaikan harga.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA
PARLIMEN KEEMPAT BELAS**

**PERTANYAAN : JAWAB LISAN
DARIPADA : YB TUAN LARRY SOON @ LARRY SNG WEI
SHIEN [JULAU]
TARIKH : 09 MAC 2022 (RABU)**

SOALAN

TUAN LARRY SOON @ LARRY SNG WEI SHIEN [JULAU] minta
MENTERI KANAN PENDIDIKAN menyatakan:-

- (a) berapa jumlah sekolah rendah di kawasan Parlimen Julau yang masih belum mendapat sambungan akses elektrik ke grid bekalan elektrik utama; dan
- (b) jangkaan masa yang diperlukan oleh Kementerian untuk menyambungkan kesemua sekolah-sekolah di kawasan Parlimen Julau agar dapat segera disambungkan ke grid bekalan elektrik utama bagi memastikan kejadian yang tidak diingini seperti litar pintas dan kebakaran berlaku seperti sebelum ini.

JAWAPAN

Tuan Yang di-Pertua,

Kementerian Pendidikan Malaysia (KPM) komited untuk memastikan semua sekolah khususnya di kawasan pedalaman, termasuk di Sarawak, mendapat akses kepada bekalan elektrik. Dalam hal ini, KPM sentiasa bekerjasama dengan Kerajaan Negeri Sarawak dan Jabatan Kerja Raya (JKR) bagi mengenal pasti sekolah yang boleh disambungkan ke talian grid untuk mendapatkan bekalan elektrik.

Untuk makluman Ahli Yang Berhormat, terdapat sebanyak 22 buah sekolah di bawah Parlimen Julau telah dikenal pasti untuk penyambungan ke talian grid. Sehingga 31 Januari 2022, sebanyak empat buah sekolah telah siap disambung ke grid bekalan elektrik utama. Baki 18 buah sekolah lagi sedang dibuat sambungan bekalan elektrik dan dijangka selesai pada bulan Disember 2022.

Selain itu, pihak Sarawak Energy Berhad (SEB) dan JKR turut melaksanakan pendawaian semula bangunan sekolah sebelum disambungkan kepada talian grid bekalan elektrik utama. Ini adalah bagi mengelak kejadian yang tidak diingini seperti litar pintas dan kebakaran.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA
PARLIMEN KEEMPAT BELAS**

**PERTANYAAN : JAWAB LISAN
DARIPADA : YB DATO' HAJI AHMAD NAZLAN BIN IDRIS
[JERANTUT]
TARIKH : 09 MAC 2022 (RABU)**

SOALAN

DATO' HAJI AHMAD NAZLAN BIN IDRIS [JERANTUT] minta **MENTERI KANAN PENDIDIKAN** menyatakan sejauh mana kesiapsiagaan sektor pendidikan negara untuk berdepan dengan isu keciciran dalam kalangan murid yang gagal menguasai kemahiran membaca, menulis dan mengira (3M) berikutan penularan pandemik COVID-19 yang mengehadkan pembelajaran bersemuka yang ternyata lebih berkesan.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa berusaha untuk memastikan pendidikan murid, terutamanya dalam aspek literasi dan numerasi diberi keutamaan. Kemahiran membaca, menulis dan mengira (3M) merupakan aspek yang diberi penekanan dalam pendidikan murid di Tahap Satu, iaitu Tahun 1, 2 dan 3.

Untuk makluman Ahli Yang Berhormat, KPM melaksanakan Program Pemulihan Khas untuk murid sekolah rendah yang menghadapi masalah menguasai kemahiran asas 3M. Guru pemulihan dengan kerjasama guru mata pelajaran Bahasa Melayu dan Matematik memberi bimbingan yang bersesuaian kepada murid sehingga mereka dapat menguasai kemahiran asas 3M.

KPM juga memperkenalkan Program Literasi dan Numerasi Sekolah Rendah untuk memastikan murid sekolah rendah menguasai sekurang-kurangnya tahap minimum (Tahap Penguasaan 3) dalam Bahasa Melayu, Bahasa Inggeris dan Matematik. Pelaksanaan program ini adalah sebagai sokongan pengajaran dan pembelajaran (PdP) yang menyeluruh untuk membantu memantapkan tahap penguasaan 3M.

Bermula September 2021, KPM telah memperkenalkan Program Pemerkasaan Pelaksanaan Kurikulum (KPMPerkasaKU). Satu daripada aspek yang diberi penekanan dalam program ini ialah Pemugaran Literasi dan Numerasi. Penekanan juga diberikan kepada penglibatan ibu bapa dalam menyokong pelaksanaan PdP. Program ini dirangka bagi memastikan murid menguasai kemahiran asas literasi dan numerasi melalui PdP secara bersemuka atau pengajaran dan pembelajaran di rumah (PdPR) yang bersesuaian dengan tahap keupayaan murid untuk mengikuti pembelajaran seterusnya. Pada masa ini, murid Tahap Satu yang telah dikenal pasti dibekalkan dengan Modul Asas Literasi dan Modul Asas Numerasi bagi mempertingkatkan penguasaan 3M mereka.

Untuk makluman Ahli Yang Berhormat, KPM menyedari bahawa sesi persekolahan secara bersemuka untuk tahun 2020 dan tahun 2021 tidak dapat dilaksanakan sepertimana kebiasaan. Justeru, KPM telah membuat ketetapan untuk melanjutkan sesi persekolahan tahun 2021 sehingga bulan Februari 2022. Pelanjutan ini bagi membolehkan pihak sekolah merancang dan melaksanakan aktiviti pemulihan, pengukuhan dan pengayaan secara intensif bagi meningkatkan kesediaan murid untuk mengikuti peringkat persekolahan berikutnya.

Berkaitan pemantauan, Pentaksiran Bilik Darjah (PBD) dilaksanakan bagi mengumpul data perkembangan pembelajaran murid yang direkodkan dari semasa ke semasa. Data tersebut dapat digunakan oleh guru untuk mengenal pasti intervensi yang sesuai bagi meningkatkan tahap penguasaan 3M murid.

KPM yakin langkah strategik yang dilaksanakan ini dapat memastikan murid menguasai kemahiran 3M dengan lebih baik.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KE-EMPAT BELAS**

PERTANYAAN : JAWAB LISAN
DARIPADA : YB TUAN NIK NAZMI BIN NIK AHMAD
(SETIAWANGSA)
TARIKH : 9 MAC 2022 (RABU)

SOALAN NO. 55

TUAN NIK NAZMI BIN NIK AHMAD [SETIAWANGSA] minta
MENTERI PENGANGKUTAN menyatakan apakah status penggunaan
aplikasi PULSE MyRapid di Lembah Klang, Pulau Pinang dan Kuantan.

JAWAPAN

Tuan Yang di-Pertua,

1. Aplikasi PULSE by Prasarana telah dilancarkan pada 17 Disember 2020 dengan objektif membantu para pengguna bas dan tren di bawah kendalian Prasarana untuk merancang dan memudahkan perjalanan seharian mereka.
2. Sejak ditawarkan kepada pelanggan Rapid KL di *Apple App Store* (untuk pengguna iOS) dan *Google Play* (untuk pengguna Android); aplikasi ini telah dimuat turun sebanyak 61,773 kali/unit (data sehingga 31 Januari 2022).
3. Pecahan muat turun mengikut sistem operasi adalah seperti berikut:

No.	Sistem Operasi	Jumlah Unit
1.	Versi iOS	20,516
2.	Versi Android+Beta	41,257
		61,773

4. PULSE by Prasarana mula ditawarkan untuk para pengguna di Pulau Pinang (Rapid Penang) dan Kuantan, Pahang (Rapid Kuantan) pada 29 Jun 2021. Sejak mula dilancarkan sehingga 31 Januari 2022, seramai 51,871 telah menjadi pengguna berdaftar aplikasi PULSE.
5. Pecahan pengguna berdaftar dengan agensi terpilih adalah seperti jadual di bawah:

No.	Agensi	Jumlah Pengguna Berdaftar
1.	Rapid KL	30,575
2.	Tidak dinyatakan (tetapan lalai* aplikasi adalah Rapid KL)	18,879

NO. SOALAN: 55

3.	Rapid Penang	2,013
4.	Rapid Kuantan	404
<i>*Default setting</i>		51,871

6. Sejak berada di pasaran, aplikasi PULSE secara purata mempunyai 23,732 pengguna aktif sebulan dengan jumlah carian untuk fungsi “*Journey Planner*” mencecah 10,212 sebulan.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA,
PARLIMEN KEEMPAT BELAS**

**PERTANYAAN : JAWAB LISAN
DARIPADA : YB TUAN BARU BIAN [SELANGAU]
TARIKH : 09 MAC 2022 (RABU)**

SOALAN

Tuan Baru Bian [Selangau] minta **MENTERI KANAN PENDIDIKAN** menyatakan apakah perkembangan terkini di SK Long Sukang, Sarawak. Adakah tender semula telah dilakukan.

JAWAPAN

Tuan Yang di-Pertua,

Kementerian Pendidikan Malaysia (KPM) komited dalam menyediakan infrastruktur pendidikan yang selamat dan kondusif untuk kegunaan murid dan warga sekolah di seluruh negara, termasuk Sarawak.

Untuk makluman Ahli Yang Berhormat, projek penyiapan kerja-kerja terbengkalai, pembaikan cerun dan kemudahan lain untuk Sekolah Kebangsaan Long Sukang, Lawas di Sarawak telah diluluskan dalam Rancangan Malaysia Ke-12 (RMKe-12) *Rolling Plan 2* (RP2) tahun 2022. Pelaksanaan projek ini adalah di bawah Jabatan Kerja Raya Malaysia.

Sehingga 28 Februari 2022, projek berada dalam peringkat prabina dan pelaksanaan projek akan dijalankan secara berfasa. Fasa pertama melibatkan kajian integriti struktur bangunan dan cerun, manakala pelaksanaan fasa kedua pula melibatkan kerja pembaikan bangunan terbengkalai. Tender pelantikan kontraktor bagi projek pembaikan ini akan dilaksanakan setelah kajian integriti struktur bangunan dan cerun selesai.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

DARIPADA : TUAN SU KEONG SIONG [KAMPAR]

TARIKH : 09 MAC 2022 (RABU)

SOALAN

TUAN SU KEONG SIONG [KAMPAR] minta **MENTERI PELANCONGAN, SENI DAN BUDAYA** menyatakan secara terperinci langkah-langkah pemulihan sektor pelancongan yang akan diambil pasca pandemik COVID-19 di negara kita. Nyatakan rancangan-rancangan pemulihan yang akan diambil khusus untuk kawasan Parlimen Kampar, terutamanya Kinta Valley Geopark.

JAWAPAN

Tuan Yang di-Pertua,

1. Seperti Ahli Yang Berhormat sedia maklum, Kementerian Pelancongan, Seni dan Budaya (MOTAC) sentiasa dan terus giat melaksanakan pelbagai inisiatif dalam memulih dan merancakkan kembali industri pelancongan negara.

2. Antara inisiatif yang sedang dilaksanakan adalah merancakkan Pelancongan Domestik menerusi:

- (i) pemberian baucar diskaun/rebat sebanyak RM20 juta bertujuan meningkatkan promosi pelancongan Malaysia dan juga kuasa membeli (*purchasing power*) pengguna ke atas produk-produk pelancongan, seni dan budaya; dan
- (ii) pemberian dana sokongan sebanyak RM5 juta bagi aktiviti promosi dan penggiat pelancongan dalam bentuk bantuan kewangan kepada persatuan/ kelab/ syarikat/ agensi pelancongan.

3. Walaupun sempadan antarabangsa negara belum dibuka sepenuhnya, MOTAC telah berusaha untuk memulakan pelancongan antarabangsa melalui pelaksanaan Projek Rintis Gelembung Pelancongan Antarabangsa Langkawi (LITB) bermula 15 November 2021. Usaha ini merupakan ujian rintis atau *pilot test* ke atas kesediaan keseluruhan ekosistem industri pelancongan terutamanya penggiat-penggiat industri dan agensi-agensi Kerajaan dalam menerapkan norma baharu serta membuka industri pelancongan kepada pelancong antarabangsa secara berperingkat dan selamat.

4. Pada tahun 2020 dan 2021, MOTAC telah memperuntukkan sebanyak RM61 juta bagi penyaluran bantuan kewangan kepada lebih 20,000 pengusaha pelancongan yang berdaftar dengan MOTAC iaitu syarikat/ agensi pelancongan (TOBTAB), ejen Syarikat Malaysia My Second Home (MM2H), pengusaha inap desa, pemandu pelancong dan pengusaha spa serta pusat urut kaki di seluruh negara.

SOALAN NO : 57

5. Untuk tahun 2022 pula, Kerajaan akan terus menyalurkan bantuan-bantuan menerusi Bajet 2022 bagi membantu kelangsungan syarikat-syarikat pelancongan yang terjejas, antaranya:

- (i) RM600juta bagi Skim Pembiayaan Pelancongan PENJANA yang diselaraskan oleh Bank Negara Malaysia dengan kerjasama 12 institusi bank;
- (ii) RM600juta untuk inisiatif pelaksanaan Program Subsidi Upah yang akan memanfaatkan lebih 26,000 majikan dan 330,000 pekerja;
- (iii) RM85juta bagi Bantuan Khas Tunai kepada pengusaha pelancongan yang berdaftar dengan MOTAC. Bantuan ini akan memberi manfaat sehingga 10,000 orang pemandu pelancong, lebih 5,000 TOBTAB, 400 ejen syarikat MM2H, 500 pengusaha Spa dan Pusat Urutan Kaki, 3,100 pengusaha inap desa berdaftar dengan MOTAC, 6,000 usahawan kraf dan komuniti Orang Asli Mah Meri;
- (iv) RM30juta pemberian geran padanan bagi tujuan pembaikan hotel bajet serta geran pembaikan kepada lebih 3,300 pengusaha inap desa yang berdaftar dengan MOTAC;
- (v) pelanjutan beberapa galakan cukai termasuk pengecualian cukai pendapatan kepada penganjur aktiviti kesenian dan kebudayaan serta pertandingan sukan dan rekreasi bertaraf antarabangsa sehingga tahun taksiran 2025; dan
- (vi) pelanjutan pengecualian cukai pelancongan sehingga 31 Disember 2022.

6. Selain itu, MOTAC turut melanjutkan tempoh kelonggaran hal-hal berkaitan fi lesen dan kompaun kepada TOBTAB dan pemandu pelancong berlesen sehingga Jun 2022 bagi membantu penggiat industri pelancongan yang terkesan daripada penularan COVID-19, antaranya:

- (i) kelonggaran berkaitan kompaun;
- (ii) pengecualian fi kepada TOBTAB dan pemandu pelancong; dan
- (iii) kelonggaran syarat lesen kepada TOBTAB.

7. Khusus bagi negeri Perak, MOTAC juga telah memperuntukkan sebanyak RM 31.8 juta bagi enam (6) projek pembangunan, lima (5) projek penyelenggaraan kemudahan/infrastruktur pelancongan dan tujuh (7) projek kerja-kerja pemulihan, pemuliharaan, ubahsuai dan naik taraf pada tahun 2022. Ini termasuklah Projek Penyediaan Papan Tanda Info Pelancongan di Kawasan Pentadbiran Majlis Daerah Kampar yang merangkumi kerja-kerja menaik taraf Menara Jam, menaik taraf paip besar Gopeng dan pengindahan landskap.

8. Untuk makluman Ahli Yang Berhormat, MOTAC telah mengenalpasti beberapa produk ekopelancongan yang berpotensi dibangun dan diketengahkan kepada pelancong di Parlimen Kampar. Antaranya aktiviti berakit di Sungai Kampar seperti aktiviti agro pelancongan di Ladang Teh Gaharu dan aktiviti berakit di Sungai Kampar. Aktiviti berakit di Sungai Kampar akan diintegrasikan dengan Daerah Gopeng dan Daerah Selama bagi mewujudkan satu kawasan berakit yang utama di bahagian tengah Semenanjung Malaysia. Ini membolehkan pelancong boleh merasai keseronokan berakit bukan sahaja di Daerah Gopeng dan Daerah Selama, malah turut melibatkan Sungai Kampar.

9. Di samping itu, MOTAC juga sedang menerokai aktiviti eksplorasi gua yang mempunyai sejarah tersendiri dan keindahan alam semulajadi untuk dibangunkan sebagai pakej pelancongan menarik seperti eksplorasi Gua Kajang (Lenggong) dan Gua Tempurung, yang tersenarai sebagai salah satu kawasan GeoTapak di bawah Geopark Lembah Kinta. Di samping itu, menerusi kerangka pelancongan Segitiga Pertumbuhan Indonesia – Malaysia – Thailand (IMT-GT), Geopark Lembah Kinta, Geopark Langkawi dan Geopark Jerai akan dipromosikan secara bersama dengan geopark di wilayah Thailand dan Indonesia.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA,
PARLIMEN KEEMPAT BELAS**

PERTANYAAN : JAWAB LISAN
DARIPADA : YB TUAN WONG KAH WOH [IPOH TIMUR]
TARIKH : 09 MAC 2022 (RABU)

SOALAN

TUAN WONG KAH WOH [IPOH TIMUR] minta **MENTERI KANAN PENDIDIKAN** menyatakan apakah impak pandemik COVID-19 dan Program PdPR terhadap pelajar-pelajar dan murid-murid, dan apakah kadar keciciran dari sekolah dalam 2 tahun yang lepas.

JAWAPAN

Tuan Yang di-Pertua,

Kementerian Pendidikan Malaysia (KPM) menyedari bahawa pandemik COVID-19 telah memberi kesan kepada sistem persekolahan. Sesi pengajaran dan pembelajaran (PdP) secara bersemuka menjadi lebih singkat apabila sekolah ditutup bagi membendung penularan COVID-19. Dalam tempoh tersebut, KPM telah menyediakan akses pembelajaran kepada murid melalui kaedah pengajaran dan pembelajaran di rumah (PdPR) mengikut kesesuaian guru dan murid. PdPR boleh dilaksanakan melalui tiga pendekatan iaitu secara dalam talian (online), luar talian (off-line) dan *off-site* mengikut kesesuaian guru dan murid.

Pada suku tahun pertama 2021, KPM telah menjalankan Tinjauan Pelaksanaan PdPR yang melibatkan 500 buah sekolah melalui pemerhatian terhadap PdPR yang dilaksanakan atas talian atau gabungan atas serta luar talian. Pemerhatian dilaksanakan melalui kehadiran Nazir Sekolah dalam kelas PdPR secara atas talian.

Sebanyak 1,053 pemerhatian telah dilaksanakan ke atas PdP guru. Tinjauan mendapati bahawa 98.7 peratus guru dapat mengelola isi pelajaran yang diajar mengikut peruntukan masa yang ditetapkan. Sebanyak 97.4 peratus guru berjaya membimbing murid untuk memahami dan menguasai isi, konsep dan fakta berkaitan pelajaran. Sementara itu, 96.7 peratus guru berjaya menarik perhatian murid untuk memberi respons terhadap pembelajaran dan memastikan keterlibatan murid semasa PdPR secara *real-time*.

Hasil tinjauan juga mendapati bahawa murid memberi respons positif terhadap tugas yang diberikan oleh guru dalam 97.5 peratus PdPR yang diperhatikan. Murid juga dapat melengkap dan menghantar tugas dengan pelbagai cara antaranya, melalui rakaman video, slaid pembentangan dan *voice call*.

Rumusan daripada tinjauan ini menunjukkan bahawa guru berupaya merangsang murid berfikir dan berkomunikasi dalam PdPR. Guru juga dapat melaksanakan aktiviti pembelajaran yang menyeronokkan dan menarik minat murid untuk belajar.

Dalam memastikan semua murid mengikuti PdPR, KPM telah membangunkan Sistem Pelaporan Pengajaran dan Pembelajaran di Rumah (SPdPR). Sistem ini membolehkan penyertaan murid dipantau secara *real-time*. Hal ini membolehkan pihak sekolah melaksanakan intervensi yang bersesuaian bagi memastikan keterlibatan murid adalah secara optimum.

Data pelaporan sehingga 31 Oktober 2021 menunjukkan bahawa murid yang mengikuti PdPR adalah melebihi 95 peratus. Pelibatan murid sekolah rendah adalah sebanyak 99.3 peratus manakala pelibatan murid sekolah menengah adalah sebanyak 98.0 peratus.

Untuk makluman Ahli Yang Berhormat, berdasarkan rekod KPM, kadar keciciran murid menunjukkan penurunan bagi tempoh dua tahun. Kadar keciciran peringkat sekolah rendah menurun daripada 0.10 peratus pada tahun 2020 kepada 0.08 peratus pada tahun 2021. Peringkat sekolah menengah pula menurun daripada 1.13 peratus pada tahun 2020 kepada 1.11 peratus pada tahun 2021.

KPM kekal komited dalam memberi perhatian terhadap pendidikan murid dan berusaha memastikan mereka terus mendapat akses kepada pendidikan.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA,
PARLIMEN KEEMPAT BELAS**

PERTANYAAN : JAWAB LISAN
DARIPADA : YB DATUK SERI PANGLIMA MADIUS TANGAU
[TUARAN]
TARIKH : 09 MAC 2022 (RABU)

SOALAN

DATUK SERI PANGLIMA MADIUS TANGAU [TUARAN] minta **MENTERI KANAN PENDIDIKAN** menyatakan adakah Kementerian bercadang untuk meningkatkan kadar peruntukan Rancangan Makanan Tambahan (RMT) daripada RM3 seorang bagi satu sajian kepada yang lebih tinggi dan adakah Kementerian bercadang untuk melibatkan Kerajaan Negeri dan Kerajaan tempatan dalam penyediaan RMT.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa memberi perhatian serius untuk memastikan murid terutama daripada kumpulan berpendapatan rendah mendapat bantuan yang telah diperuntukkan kepada mereka. Program Rancangan Makanan Tambahan (RMT) adalah pemberian makanan tambahan kepada murid sekolah rendah yang layak mengikut garis panduan yang ditetapkan.

Untuk makluman Ahli Yang Berhormat, kadar RMT bagi murid di Semenanjung adalah sebanyak RM2.50 seorang dan bagi murid di Sabah, Sarawak dan Labuan adalah sebanyak RM3.00 seorang. Dari sudut penyediaan makanan, program RMT ini lebih sesuai dilaksanakan oleh pengusaha kantin di sekolah berbanding penglibatan pihak lain. Pengusaha kantin yang terlibat perlu mematuhi menu yang telah ditetapkan oleh KPM.

Pada masa yang sama, KPM telah menambah baik pelaksanaan program RMT dengan pembekalan susu *ultra-high-temperature* (UHT) kepada murid pada setiap hari. Melalui pelaksanaan ini, murid dibekalkan dengan keperluan nutrien lengkap yang diperlukan bagi membantu pertumbuhan yang sihat sebagaimana yang dicadangkan oleh Kementerian Kesihatan Malaysia.

KPM sedang meneliti dan berbincang bersama-sama agensi pusat berhubung pendekatan yang paling sesuai untuk menambah baik program RMT secara keseluruhan termasuk cadangan kenaikan kadar. Walau bagaimanapun, sebarang pelaksanaan tersebut adalah tertakluk kepada kelulusan agensi pusat dan kedudukan kewangan semasa Kerajaan.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA,
PARLIMEN KEEMPAT BELAS**

**PERTANYAAN : JAWAB LISAN
DARIPADA : YB DATUK DR. HASAN BIN BAHROM
TARIKH : 09 MAC 2022 (RABU)**

SOALAN

DATUK DR. HASAN BIN BAHROM [TAMPIN] minta **MENTERI PERTANIAN DAN INDUSTRI MAKANAN** menyatakan sejauh mana kesungguhan Kementerian memastikan industri penternakan berkembang pesat, apakah ada usaha Kementerian menggalakkan pembangunan komuniti terlibat dalam penternakan berskala besar.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian sentiasa komited dalam memastikan industri penternakan terus berkembang pesat bagi menjamin bekalan makanan negara. Melalui Dasar Agromakanan Negara 2021 – 2030 (DAN 2.0), sebanyak lima (5) strategi dan enam belas (16) pelan tindakan telah digariskan di bawah subsektor ternakan dengan meletakkan sasaran tahap sara diri (SSL) pada tahun 2030 seperti berikut:

- (i) 50% bagi daging lembu/kerbau;
- (ii) 30% bagi daging kambing/bebiri;
- (iii) 140% bagi daging ayam/itik;
- (iv) 123% bagi telur ayam/itik; dan
- (v) 100% bagi susu segar.

Bagi menjayakan hasrat tersebut, Kementerian melalui Jabatan Perkhidmatan Veterinar (DVS) menggalakkan pembangunan komuniti dalam skala penternakan yang lebih besar terutamanya dalam industri ruminan melalui inisiatif seperti berikut:

- (i) Program Peningkatan Ruminan (PPR) - Insentif berbentuk geran padanan kepada penternak lembu integrasi komersil menerusi konsep kerjasama pintar 50% kerajaan: 50% penternak. Pada tahun 2022 sebanyak RM5 juta diperuntukkan untuk program ini;
- (ii) Program Peningkatan Pengeluaran Tenusu Negara- Merupakan insentif di bawah program Transformasi Usahawan Tenusu menerusi konsep geran padanan 70% kerajaan: 30% penternak bagi skala kecil. Manakala bagi skala besar, nisbah 30% kerajaan: 70% penternak. Pada tahun 2022 sebanyak RM7 juta diperuntukkan untuk program ini.;
- (iii) Taman Kekal Pengeluaran Makanan (TKPM) dan Taman Kekal Pengeluaran Ruminan (TKPR) - Sejumlah 86 unit kemudahan infrastruktur kandang dan kawasan penanaman pastura disewakan kepada syarikat swasta bagi aktiviti penternakan lembu fidlot dan tenusu. Pada tahun 2022 sebanyak RM7.5 juta diperuntukkan untuk program ini; dan

- (iv) Pengukuhan perkhidmatan Pusat Pengembangan Veterinar (VetEC), Pusat Pengumpulan Industri Tenusu (PPIT) dan Pejabat Veterinar Daerah - Memperkukuhkan penyampaian perkhidmatan pengembangan veterinar di lapangan menerusi Pusat Pengembangan Veterinar (VetEC), Pusat Pengumpulan Industri Tenusu (PPIT) dan Pejabat Veterinar Daerah bagi membantu para penternak untuk meningkatkan produktiviti ternakan dan ladang.

Melalui penglibatan penternak, syarikat semi komersial, syarikat komersial dan penglibatan golongan belia di peringkat komuniti, inisiatif ini dijangka berupaya menaiktaraf penternakan kepada skala yang lebih besar.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA,
PARLIMEN KEEMPAT BELAS**

PERTANYAAN : JAWAB LISAN

**DARIPADA : YB TUAN AHMAD FAHMI BIN MOHAMED
FADZIL [LEMBAH PANTAI]**

TARIKH : 09 MAC 2022 (RABU)

SOALAN

TUAN AHMAD FAHMI BIN MOHAMED FADZIL [LEMBAH PANTAI] minta **MENTERI KEWANGAN** menyatakan insentif atau bantuan Kerajaan yang akan diberi bagi membantu rakyat serta pengusaha Perusahaan Mikro, Kecil dan Sederhana (PMKS) bersedia menghadapi COVID-19 setelah negara memasuki fasa endemik.

JAWAPAN

Tan Sri Yang Di Pertua,

Seperti sedia maklum, tahun 2022 merupakan tahun pemulihan iaitu ekonomi negara diunjur terus berkembang antara 5.5 hingga 6.5 peratus. Sekalipun, trend kes sekarang masih tinggi, buat masa ini Kerajaan tidak bercadang untuk menutup semula sektor ekonomi.

Dalam usaha membangun semula ekonomi rakyat dan memacu pemulihan negara dalam norma yang baharu, Bajet 2022 digarap bagi memastikan semua segmen masyarakat dan perniagaan dibantu. Antaranya, tumpuan diberikan ke arah pemberian bantuan tunai kepada B40, langkah insentif cukai bagi M40, janaan dan pengekatan pekerjaan serta menyemarakkan perniagaan.

Sebagai membantu golongan B40 khususnya, inisiatif Bantuan Keluarga Malaysia atau BKM dengan peruntukan 8.2 bilion ringgit bakal memanfaatkan 9.6 juta penerima Keluarga Malaysia yang memerlukan. Selanjutnya, inisiatif lain seperti Bantuan Awal Persekolahan dengan nilai 150ringgit untuk murid sekolah memerlukan, PerantiSiswa iaitu pemberian tablet untuk mahasiswa B40, serta e-Start dengan nilai 150ringgit untuk belia juga merupakan langkah-langkah memulih semula kehidupan dan meringankan beban kewangan buat manfaat Keluarga Malaysia. Ini termasuklah langkah-langkah memperkukuh dan meluaskan sistem perlindungan sosial yang turut memberi keutamaan buat semua.

Bagi membangun semula ekonomi rakyat, Kerajaan di bawah inisiatif Jamin Kerja Keluarga Malaysia atau JaminKerja akan menjamin penyediaan 600 ribu peluang pekerjaan dengan peruntukan berjumlah 4.8 bilion ringgit. Ini termasuk insentif penggajian JaminKerja di bawah PERKESO dengan sasaran 300 ribu orang pencari kerja. Tawaran 80 ribu peluang pekerjaan secara kontrak di dalam sektor awam dan Syarikat Berkaitan Kerajaan turut disediakan di bawah inisiatif MySTEP. Inisiatif JaminKerja ini juga menyediakan 220 ribu peluang menjalani program peningkatan kemahiran dengan jaminan pekerjaan.

Dalam mengembalikan keupayaan perniagaan kepada para usahawan, Kerajaan sebagai pemudah cara akan memperbanyak akses pembiayaan, terutamanya untuk pengusaha PMKS dan sektor informal. Bagi tahun 2022, pakej pembiayaan dengan nilai keseluruhan berjumlah 40 bilion ringgit disediakan di bawah Program Semarak Niaga Keluarga Malaysia (atau SemarakNiaga). Skim pembiayaan ini merangkumi pinjaman langsung, jaminan pembiayaan dan suntikan ekuiti dengan sasaran untuk memanfaatkan setiap golongan usahawan tidak kira perusahaan mikro ataupun syarikat tersenarai awam.

Pada masa yang sama, akses kepada pembiayaan tanpa faedah disediakan terutamanya bagi membantu para peniaga kecil. Antaranya, Skim Pembiayaan Informal dan Mikro di bawah TEKUN akan menawarkan pinjaman sehingga 10 ribu ringgit pada kadar faedah 0 peratus berserta moratorium selama 12 bulan dengan keutamaan diberi kepada peniaga sektor informal dan mikro. Selain itu, BSN dan Agrobank juga akan menawarkan pinjaman mikro sehingga 75 ribu ringgit pada kadar 0 peratus untuk enam bulan pertama berserta kemudahan moratorium sehingga enam bulan.

Di bawah Bajet 2022 juga, Kerajaan telah menyediakan beberapa kemudahan bagi meringankan beban para peniaga antaranya termasuklah:

- Potongan cukai khas sehingga Jun 2022 kepada pemilik bangunan atau ruang perniagaan yang memberikan pengurangan sewa sekurang-kurangnya 30 peratus;
- Meneruskan pelaksanaan Program Subsidi Upah yang bersasar kepada pemain industri pelancongan yang mengalami penurunan pendapatan sekurang-kurangnya 30 peratus. Dengan peruntukan sebanyak 600 juta ringgit. Inisiatif ini bakal memanfaatkan lebih 26 ribu majikan dan 330 ribu pekerja;
- Penangguhan bayaran ansuran cukai pendapatan bagi PMKS selama enam bulan sehingga 30 Jun 2022;
- Semua perniagaan dibenar membuat pindaan anggaran cukai pendapatan yang kena dibayar dalam bulan ke 11 sebelum 31 Oktober 2022; dan

NO SOALAN :61

- Kerugian terkumpul yang tidak dapat diserap boleh dibawa ke hadapan untuk tempoh daripada maksimum 7 tahun taksiran berturut-turut kepada maksimum 10 tahun taksiran berturut-turut.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA,
PARLIMEN KEEMPAT BELAS**

**PERTANYAAN : JAWAB LISAN
DARIPADA : YB PUAN YEO BEE YIN [BAKRI]
TARIKH : 09 MAC 2022 (RABU)**

SOALAN

PUAN YEO BEE YIN [BAKRI] minta **MENTERI TENAGA DAN SUMBER ASLI** menyatakan status terkini penuntutan semula tunggakan Akaun Amanah Industri Bekalan Elektrik (AAIBE) daripada penjana-penjana kuasa bebas (IPP).

JAWAPAN

Tuan Yang di-Pertua,

1. Jumlah tunggakan Akaun Amanah Industri Bekalan Elektrik (AAIBE) sehingga tahun 2018 yang telah diselesaikan adalah RM163,483,253.10 manakala RM68,224,827.00 dalam proses penyelarasan pembayaran. Bagi tahun 2019 hingga 2020, amaun sebenar yang perlu dibayar oleh setiap syarikat penjana elektrik sedang disemak oleh Kementerian bersama-sama Suruhanjaya Tenaga. Syarikat-syarikat penjana elektrik akan membuat bayaran setelah mendapat pengesahan rasmi Kementerian.

2. Untuk menyelesaikan isu pembayaran tunggakan, pihak Kementerian telah mengadakan beberapa siri perbincangan dengan syarikat penjana elektrik yang terlibat untuk membantu mereka melunaskan tunggakan secara berperingkat mengikut jadual bayaran ansuran yang dipersetujui di antara pihak Kementerian dan syarikat. Setakat ini, semua syarikat penjana elektrik ini telah memberikan kerjasama yang baik dan komitmen untuk menyelesaikan isu tunggakan tersebut dan kini dalam proses membuat penyelarasan pembayaran di peringkat syarikat berdasarkan pelan ansuran bayaran.

3. Pihak Kementerian sentiasa memantau perkara ini secara konsisten melalui Mesyuarat Jawatankuasa AAIBE dan surat peringatan secara berkala akan diberikan kepada kesemua syarikat penjana serta melaksanakan sesi libat urus bersama Suruhanjaya Tenaga untuk memastikan semua syarikat penjana elektrik menjelaskan sumbangan mereka kepada AAIBE.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN
DARIPADA : YB DATUK WIRA HAJI MOHD.ANUAR MOHD
TAHIR [TEMERLOH]
TARIKH : 09 MAC 2022 (RABU)

SOALAN

DATUK WIRA HAJI MOHD.ANUAR MOHD TAHIR [TEMERLOH] minta **MENTERI PERTANIAN DAN INDUSTRI MAKANAN** menyatakan berapa jumlah pengeluaran hasil akuakultur di Temerloh tahun lalu dan berapa jangkaan baharu tahun 2022 setelah musibah banjir kali ini merosakkan ribuan sangkar ternakan air tawar.

JAWAPAN

Tuan Yang di-Pertua,

Untuk makluman Ahli Yang Berhormat, pada tahun 2021, pengeluaran akuakultur air tawar di Temerloh berjumlah 2560.81 metrik tan dengan nilai borong RM 32,918,519.80 dan nilai runcit RM 45,470,468.77 yang melibatkan 572 orang pengusaha. Unjuran pengeluaran air tawar di Temerloh dijangka mampu dikekalkan kepada anggaran 2,500 metrik tan pada tahun 2022 dengan anggaran nilai borong RM32,125,000 dan nilai runcit RM 44,375,000.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DATUK SERI SHAMSUL ISKANDAR @
YUSRE BIN MOHD AKIN
[HANG TUAH JAYA]**

TARIKH : 09 MAC 2022 (RABU)

SOALAN

DATUK SERI SHAMSUL ISKANDAR @ YUSRE BIN MOHD AKIN [HANG TUAH JAYA] minta **MENTERI PELANCONGAN, SENI DAN BUDAYA** menyatakan pencapaian Pakej Perlindungan Rakyat Dan Pemulihan Ekonomi (PEMULIH) kepada sektor pelancongan terutamanya syarikat pelancongan dan penggiat seni di Melaka antara Julai 2021 sehingga Disember 2021 dan apakah telah ada perancangan untuk membangunkan produk-produk pelancongan secara digital dengan usaha sama dengan Kerajaan Negeri Melaka khususnya di dalam kawasan Parlimen Hang Tuah Jaya.

JAWAPAN

Tuan Yang di-Pertua,

1. Menerusi Pakej Perlindungan Rakyat Dan Pemulihan Ekonomi (PEMULIH) yang dilancarkan pada Julai tahun 2021, Kementerian Pelancongan, Seni dan Budaya (MOTAC) telah menyalurkan bantuan khas *one-off* seperti berikut kepada pengusahaan pelancongan yang berlesen dengan MOTAC:

- (i) RM3,000 kepada lebih 3,200 pengusaha pelancongan (TOBTAB) dengan nilai RM9.8juta termasuk lebih 90 pengusaha TOBTAB di Negeri Melaka;
- (ii) RM1,000 kepada 200 pengusaha spa dan pusat urutan kaki berjumlah RM91,000 termasuk lima (5) pengusaha spa dan pusat urutan kaki di Melaka dengan nilai RM5,000;
- (iii) RM3,000 kepada lebih 200 ejen syarikat *Malaysia My Second Home* (MM2H) termasuk enam (6) syarikat di Negeri Melaka; dan
- (iv) RM500 kepada lebih 3,000 pengusaha inap desa berjumlah lebih RM1.8juta termasuk 104 pengusaha di negeri Melaka.

2. Pada tahun 2021 juga, seramai lebih 60 orang penggiat seni telah mendapat manfaat di bawah Tabung Kumpulan Wang Amanah Kebudayaan dan Kebajikan Penggiat Seni (KWAKKPS). Objektif penubuhan tabung ini adalah untuk memastikan kebajikan penggiat seni, antaranya para penghibur, penyanyi, pelakon dan lain-lain bidang seni budaya dan warisan, sentiasa terbela, diberi perhatian sewajarnya dan sebagai tanda penghargaan ke atas jasa dan sumbangan yang diberikan oleh mereka. Daripada jumlah tersebut, seorang penggiat seni negeri Melaka telah menerima bantuan ini.

3. Pasa masa yang sama, Jawatankuasa Panel Penilai Kebudayaan (JPPK) juga telah meluluskan hampir RM2juta bantuan kegiatan kepada 32 buah badan bukan kerajaan bagi tujuan menyemarakkan industri seni, budaya dan warisan di seluruh negara. Daripada jumlah tersebut, tiga (3)

SOALAN NO : 64

BBK Negeri Melaka telah menerima bantuan kewangan kegiatan dengan jumlah RM230,000. Bantuan yang diberikan oleh MOTAC seperti ini sedikit sebanyak membolehkan penggiat industri pelancongan, seni dan budaya dapat meneruskan penjaan pendapatan mereka dan sekaligus memastikan aktiviti pelancongan, seni budaya itu dapat diteruskan.

4. Sementara itu, platform digital merupakan platform yang berkesan bagi menarik minat pelancong ke sesebuah destinasi pelancongan. Sebagai contoh, Tourism Malaysia telah bekerjasama dengan *online travel portal* atau *online travel agents* (OTAs) seperti *Expedia* dan *Tripadvisor* dalam mempromosikan pakej-pakej pelancongan dan kandungan yang menarik bagi mendapatkan pulangan dari segi jumlah penjualan pakej, serta mempergiatkan aktiviti perhubungan awam melalui kerjasama dengan *Key Opinion Leaders* (KOLs) dan juga *influencers* di platform media sosial.

5. Selanjutnya, antara program yang telah dilaksanakan oleh MOTAC dengan kerjasama Kerajaan Negeri Melaka bagi meningkatkan lagi produk-produk pelancongan di negeri Melaka adalah:

- (i) bekerjasama dengan Majlis Perbandaran Jasin dan Jabatan Perhutanan Negeri Melaka dalam menganjurkan Virtual Eco Experience @ Taman Eko-Rimba Bukit Batu Lebah pada 16 September 2021 yang bertujuan berkongsi pengalaman aktiviti Voluntutoring dan Volunsharing, yang secara tidak langsung membantu mempromosikan destinasi ekopelancongan negara. Program ini disertai oleh peserta daripada Persatuan Pemandu Pelancong Melaka Bandaraya Bersejarah (MHCTGA), Kolej Universiti Islam Melaka (KUIM), UiTM Melaka dan Politeknik Merlimau Melaka; dan
- (ii) bekerjasama dengan UiTM Cawangan Melaka dalam menganjurkan Siri Webinar Pelancongan, Seni dan Budaya yang bertujuan merancakkan sektor pelancongan melalui dalam talian seperti *Webinar Terowong Rahsia Bukit Melaka: Di Mana Kebenarannya?*, *Pendigitalan Industri Pelancongan: Bagaimanakah Kita Telah Bersedia?*, Webinar Bengkel Dondang Sayang dan Webinar Rahsia Di Sebalik Kain Cindai

SOALAN NO : 64

dan Kain Limar. Antara yang terlibat ialah Perbadanan Muzium Melaka (PERZIM), Institut Seni dan Warisan Melaka (INSWA), Kolej Universiti Islam Melaka (KUIM), UiTM Melaka, Politeknik Merlimau Melaka, MATTA Melaka Chapter, MAH Melaka Chapter, MyBHA Melaka Chapter, Persatuan Pemandu Pelancong Melaka Bandaraya Bersejarah (MHCTGA) dan *Malacca Tourism Association* (MTA);

6. Di samping itu, dalam usaha menyemarakkan lagi industri kraftangan di Negeri Melaka, Kraftangan Malaysia turut bekerjasama dengan Kerajaan Negeri Melaka merancang dan melaksanakan inisiatif-inisiatif berikut:

- (i) bekerjasama dengan Bahagian Unit Perancangan Ekonomi Negeri (UPEN) dalam mempromosikan produk-produk pelancongan kraf dengan menyertai program pemasaran dalam talian iaitu Melaka Easy Shop dan Shopker; dan
- (ii) bekerjasama dengan Bahagian Promosi Pelancongan (BPP) dalam mempromosikan produk-produk pelancongan kraf Negeri Melaka melalui platform Lazada melalui *page Melaka E-Bazaar*.

7. Pada masa yang sama, usahawan kraftangan di Negeri Melaka turut diberi galakan untuk menyertai MYCRAFTSHOPPE yang dibangunkan oleh Kraftangan Malaysia untuk memasarkan produk kraf dan perkhidmatan secara dalam talian. Menerusi MYCRAFTSHOPPE, pengguna ditawarkan dengan kepelbagaian produk yang terdapat dalam ekosistem industri kraf merangkumi produk, bahan mentah, rekaan produk, perkhidmatan selepas pembelian dan maklumat berkaitan industri kraf negara.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA,
PARLIMEN KEEMPAT BELAS**

PERTANYAAN : JAWAB LISAN

**DARIPADA : YB PUAN RUSNAH BINTI ALUAI
[TANGGA BATU]**

TARIKH : 09 MAC 2022 (RABU)

SOALAN

PUAN RUSNAH BINTI ALUAI [TANGGA BATU] minta **MENTERI KEWANGAN** menyatakan strategi untuk menangani masalah pembayaran menggunakan sistem '*Cashless*' di jabatan-jabatan Kerajaan terutamanya kawasan luar bandar yang mana kebanyakan penduduknya merupakan golongan warga emas yang kurang mahir dalam sistem ini.

JAWAPAN

Tan Sri Yang Di Pertua,

Untuk makluman, sistem '*Cashless*' merupakan salah satu mod bayaran tanpa tunai di mana pembayaran boleh dibuat samada melalui kad pembayaran, telefon pintar atau laman web. Pihak Kerajaan sangat menggalakkan penggunaan sistem '*Cashless*' di Jabatan Kerajaan yang dilihat lebih mudah, menjimatkan masa, selamat dan terjamin transaksinya serta membolehkan pemantauan rekod kewangan Kerajaan boleh dibuat secara lebih sistematik.

Selaras dengan Rangka Tindakan Ekonomi Digital Malaysia yang telah dilancarkan pada Februari 2021 yang menyasarkan Kementerian dan agensi Kerajaan menyediakan pilihan pembayaran tanpa tunai menjelang 2022, sebahagian besar agensi Kerajaan telah menerima pembayaran tanpa tunai melalui pelbagai instrumen seperti kad pembayaran (debit / kredit / prabayar), perbankan internet dan laman web (FPX), JomPay, serta e-dompet. Namun begitu, pembayaran tunai masih kekal diterima.

Kementerian Kewangan mengambil maklum bahawa penerimaan sistem '*Cashless*' di kalangan rakyat Malaysia masih belum mencapai tahap yang tinggi terutamanya penggunaannya di luar bandar yang melibatkan golongan warga emas. Penggunaan kaedah pembayaran secara tunai oleh golongan warga emas di luar bandar didapati masih tinggi adalah disebabkan mereka lebih selesa dengan kaedah konvensional dan juga disebabkan oleh tahap kemahiran teknologi maklumat yang masih rendah berbanding penduduk bandar. Selain itu, kemudahan infrastruktur teknologi maklumat di kawasan luar bandar terus dipertingkatkan untuk menggalakkan penggunaan sistem '*Cashless*'.

Bagi menangani masalah tersebut, kebanyakan Jabatan Kerajaan telah menyediakan kakitangan di kaunter dan kiosk pembayaran bagi membantu dan memberi tunjuk ajar kepada golongan yang kurang mahir menggunakan sistem '*Cashless*'. Kakitangan dan pegawai di Jabatan

Kerajaan yang terlibat dengan kaunter pembayaran ini telah diberi latihan yang diperlukan oleh pihak bank pemeroleh (*acquiring bank*) dalam mengendalikan sistem '*Cashless*' yang disediakan oleh pihak bank.

Bank Negara Malaysia (BNM) dengan kerjasama agensi-agensi kerajaan lain juga turut memberikan khidmat bimbingan dan panduan (*handholding*) kepada pengguna dan juga peniaga dalam menggunakan pembayaran tanpa tunai.

Pada masa yang sama, Kerajaan menerusi pihak Unit Pemodenan Tadbiran dan Perancangan Pengurusan Malaysia (MAMPU) selaku agensi yang mengawal selia laman web Kerajaan sentiasa memastikan pembangunan laman web bagi tujuan pembayaran kepada Kerajaan adalah mesra pengguna, interaktif dan mudah untuk digunakan.

Penambahbaikan penyediaan prasarana, promosi dan inisiatif oleh Kementerian serta Jabatan Kerajaan juga perlu dipertingkatkan dengan kerjasama sektor awam dan swasta. Kerajaan melalui kerjasama agensi di bawah Bank Negara Malaysia iaitu Payments Network Malaysia (PayNet) telah menganjurkan kempen "*Cashless Boleh*" pada tahun 2021 dan kini kempen "*Cashless Boleh 2.0*" sedang dijalankan melibatkan Kementerian/Jabatan Kerajaan tertentu sebagai usaha menggalakkan penggunaan pembayaran tanpa tunai oleh rakyat.

Kerajaan percaya dengan kerjasama semua pihak samada di pihak Kerajaan mahupun swasta, sama-sama berganding bahu bagi menjayakan inisiatif penggunaan sistem '*Cashless*' di kalangan rakyat Malaysia tanpa mengira peringkat umur dan lokaliti dapat dipertingkatkan.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA,
PARLIMEN KEEMPAT BELAS**

PERTANYAAN : JAWAB LISAN

**DARIPADA : YB TUAN CHAN FOONG HIN
[KOTA KINABALU]**

TARIKH : 09 MAC 2022 (RABU)

SOALAN

TUAN CHAN FOONG HIN [KOTA KINABALU] minta **MENTERI KEWANGAN** menyatakan pendirian Kerajaan berkenaan permintaan pengeluaran wang Kumpulan Wang Simpanan Pekerja (KWSP) RM10,000 secara sekali bayar atau *one-off*. Adakah ianya merupakan penyelesaian kepada masalah pengurangan atau kehilangan pendapatan dihadapi pencarumnya.

JAWAPAN

Tan Sri Yang Di Pertua,

KWSP telah memperkenalkan tiga (3) program pengeluaran khas iaitu i-Lestari, i-Sinar dan i-Citra yang terbuka kepada ahli di bawah umur 55 tahun tertakluk kepada syarat-syarat kelayakan yang ditetapkan bagi membantu kelangsungan hidup ahli dalam menempuhi cabaran dan impak Perintah Kawalan Pergerakan (PKP) akibat pandemik COVID-19. Secara keseluruhannya di bawah ketiga-tiga pengeluaran ini, ahli KWSP telah mempunyai akses kepada dana persaraan mereka sehingga RM71,000, tertakluk kepada jumlah baki simpanan mereka.

Secara amnya, ketiga-tiga pengeluaran ini telah dapat membantu ahli yang terjejas dari segi pekerjaan dan pendapatan mereka akibat pelaksanaan PKP untuk meneruskan kelangsungan hidup mereka bagi suatu tempoh yang terhad tertakluk kepada baki simpanan KWSP masing-masing. Kesemua pengeluaran ini melibatkan pembayaran secara berkala bagi membolehkan simpanan yang dikeluarkan tersebut dapat bertahan dalam tempoh yang lebih lama selaras dengan tempoh PKP dan pandemik yang berpanjangan.

Pengeluaran khas ini telah dapat memanfaatkan seramai 7.3 juta ahli atau 58% daripada 12.7 juta ahli yang berumur di bawah 55 tahun yang telah membuat sekurang-kurangnya satu daripada pengeluaran ini yang melibatkan amaun pengeluaran berjumlah RM101 bilion.

Pengeluaran khas oleh KWSP ini adalah pengeluaran pra-persaraan yang belum pernah dilaksanakan sebelum ini dan tidak termaktub di dalam Akta KWSP. Ianya hanya diperkenalkan sebagai langkah jangka masa pendek dan bersifat sementara disebabkan oleh keadaan dan situasi yang tidak pernah berlaku sebelum ini. Hal ini juga telah mendapat kritikan pakar ekonomi, ahli akademik, pertubuhan bukan kerajaan (NGO) yang mewakili pekerja dan majikan dan juga pakar kesejahteraan sosial yang telah menyatakan kebimbangan mereka tentang kemudahan akses awal simpanan persaraan dan sebarang pengeluaran tambahan akan

menjejaskan simpanan hari tua dan bercanggah dengan objektif penubuhan KWSP.

Implikasi pengeluaran khas ini khususnya pengeluaran daripada Akaun 1 telah memberikan kesan jangka panjang iaitu pengurangan jumlah simpanan persaraan yang ketara kepada ahli-ahli yang terlibat. Daripada keseluruhan ahli KWSP di bawah umur 55 tahun, setakat 31 Disember 2021, seramai 6.1 juta ahli atau 48 peratus hanya mempunyai baki simpanan kurang daripada RM10,000 di dalam akaun KWSP setelah majoriti ahli mengeluarkan simpanan melalui i-Lestari, i-Sinar dan i-Citra. Amaun RM10,000 menunjukkan ahli dijangka hanya mempunyai pendapatan persaraan yang kurang daripada RM42 sebulan untuk tempoh 20 tahun.

Selain itu, pengeluaran khas ini telah menyebabkan penurunan yang ketara dalam peratusan ahli yang mencapai Simpanan Asas (RM240,000 pada 55 tahun) daripada 36% pada tahun 2020 kepada 30% pada akhir tahun 2021. Situasi ini secara langsung menunjukkan bahawa 70%, atau lebih dua pertiga daripada ahli berumur 55 tahun dan ke bawah berada dalam situasi yang serius di mana jumlah dana mereka tidak cukup untuk bersara melebihi paras kemiskinan. KWSP menganggarkan ahli perlu bekerja antara 4-6 tahun tambahan untuk membina semula simpanan yang telah dikeluarkan semasa pandemik.

Sehubungan itu, sebarang pengeluaran tambahan i-Citra atau pengeluaran khas baharu akan menjejaskan lagi isu ketidakcukupan simpanan persaraan yang kini telahpun berada dalam tahap yang amat membimbangkan.

Pertimbangan terhadap sebarang pengeluaran sebelum umur persaraan juga perlu mengambilkira keperluan untuk mengimbangkan antara keperluan semasa dan kepentingan simpanan persaraan untuk masa hadapan dengan keadaan negara dijangka akan mengalami penuaan penduduk pada 10 ke 15 tahun akan datang. Ini bermakna, rakyat akan hidup lebih lama sehingga umur 75 ke 80 tahun kerana jangka hayat semakin panjang dan mereka memerlukan simpanan persaraan yang lebih banyak untuk membiayai sara hidup mereka kelak.

Tambahan pula, negara kini sedang berada pada tahap akhir atau Fasa 4 Pelan Pemulihan Negara (PPN) mulai 3 Januari 2022 di mana kesemua sektor ekonomi telah dibuka sepenuhnya dan kadar vaksinasi semua negeri juga tinggi. Pada ketika ini, indikator-indikator ekonomi juga menunjukkan bahawa aktiviti-aktiviti ekonomi semakin rancak dengan perniagaan yang telah beroperasi sepenuhnya dan sebahagian besar pekerja telah kembali bekerja untuk menjana pendapatan.

Ini boleh dilihat kepada statistik KWSP yang menunjukkan peningkatan yang ketara dari segi bilangan ahli dan majikan yang aktif mencarum, pendaftaran ahli dan majikan baharu serta jumlah caruman setakat Disember 2021 seperti berikut:-

- Bilangan Ahli Aktif KWSP menunjukkan peningkatan sebanyak 1.3% kepada 7.7 juta berbanding 7.6 juta pada bulan Disember 2020;
- Bilangan Majikan Aktif juga menunjukkan peningkatan sebanyak 3.3% kepada 553,000 berbanding 536,000 pada tahun sebelumnya;
- Pendaftaran ahli dan majikan baru bagi tahun 2021 pula adalah sebanyak 422,000 dan 73,000 berbanding 402,000 dan 67,000 masing-masing pada tahun 2020; dan
- Jumlah caruman bagi tahun 2021 sebanyak RM71.8 bilion juga menunjukkan peningkatan sebanyak 2.6% berbanding RM70.0 bilion bagi tahun 2020.

Pandangan ini juga disokong oleh pelbagai pihak seperti kesatuan pekerja iaitu Majlis Rangkaian Kesatuan Sekerja Antarabangsa Malaysia (UNI-MLC, Kongres Kesatuan Sekerja Malaysia (MTUC) dan NUBE serta Persekutuan Majikan-majikan Malaysia (MEF) dan Sarawak Business Federation (SBF) yang telah menyatakan pendirian bahawa sebarang pengeluaran tambahan akan menjejaskan kecukupan simpanan hari tua ahli, menambah beban kewangan kerajaan di masa hadapan dan bercanggah dengan objektif penubuhan KWSP.

Sebagai penyelesaian jangka masa panjang, sistem perlindungan sosial perlu diperkukuhkan bagi memastikan rakyat Malaysia mempunyai

perlindungan apabila berlaku perkara yang tidak dijangka seperti kehilangan pekerjaan dan pendapatan. Sebagai salah satu institusi keselamatan sosial yang besar di negara ini, KWSP perlu berkerjasama dengan agensi-agensi Kerajaan yang lain dalam membina dan memperkukuhkan sistem perlindungan sosial yang menyeluruh dan mampan bagi kesejahteraan rakyat Malaysia.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA,
PARLIMEN KEEMPAT BELAS**

PERTANYAAN : JAWAB LISAN
DARIPADA : YB DATIN PADUKA DR. TAN YEE KEW
[WANGSA MAJU]
TARIKH : 09 MAC 2022 (RABU)

SOALAN

DATIN PADUKA DR. TAN YEE KEW [WANGSA MAJU] minta **MENTERI PERTANIAN DAN INDUSTRI MAKANAN** menyatakan tindakan bagi meningkatkan pengeluaran hasil padi negara dan lain-lain tanaman makanan terutama melalui aspek penggunaan teknologi baru.

JAWAPAN

Tuan Yang di-Pertua,

Untuk makluman Ahli Yang Berhormat. industri padi dan beras merupakan subsektor industri agromakanan penting yang mengeluarkan makanan ruji utama untuk rakyat Malaysia dan diberi tumpuan khusus dalam Dasar Agromakanan Negara 2021-2030 (DAN 2.0) serta Pelan Tindakan Dasar Sekuriti Makanan Negara (DSMN) 2021-2025.

Oleh itu, bagi meningkatkan produktiviti pengeluaran padi dan beras negara seterusnya menjamin sekuriti makanan, Kementerian Pertanian dan Industri Makanan (MAFI) memperkenalkan program SMART Sawah Berskala Besar (SMART SBB) yang melibatkan tiga (3) entiti utama sebagai *Special Purpose Vehicle* (SPV) iaitu Pertubuhan Peladang Kawasan (PPK), golongan pesawah dan syarikat peneraju. Program SMART SBB mensasarkan peningkatan purata hasil padi nasional kepada 7.0 tan metrik sehektar dalam tempoh Rancangan Malaysia Ke-12 (RMKe-12) berbanding purata hasil semasa sekitar 3.5 hingga 4.3 tan metrik sehektar.

Melalui program ini, hasil padi dapat ditingkatkan dengan penglibatan pihak swasta menerusi pelaburan modal, kepakaran dan keupayaan teknologi menerusi penggunaan teknologi automasi dan mekanisasi terkini. Ia juga dapat meningkatkan pendapatan pesawah yang mengusahakan tanah yang bersaiz tidak ekonomik iaitu kurang daripada dua hektar serta mempromosikan jalinan usahasama pihak swasta dan pesawah menerusi kaedah pertanian kontrak (*contract farming*) antara syarikat peneraju dan pesawah.

Seterusnya, penggunaan teknologi juga dapat dilihat keberkesanannya bagi meningkatkan produktiviti dalam industri padi dan beras. Sebagai contoh, penggunaan dron oleh syarikat *FGV Integrated Farming Holdings Sdn. Bhd.* (FGVIF) di IADA Barat Laut Selangor untuk tujuan pembajaan di sawah padi telah berjaya meningkatkan kecekapan dan mengurangkan kebergantungan kepada tenaga buruh.

Penggunaan teknologi baharu juga mempunyai potensi yang besar dalam peningkatan produktiviti tanaman makanan dan Institut Penyelidikan Dan Kemajuan Pertanian Malaysia (MARDI) telah membangunkan beberapa teknologi baharu seperti pembangunan atau pembaikbakaan varieti baharu seperti betik varieti Eksotika dan varieti baharu nanas Josapine.

Selain itu, pengeluaran sayur-sayuran seperti kubis bulat dan kubis bunga yang biasanya ditanam di tanah tinggi seperti di Cameron Highlands dan Ranau, Sabah dapat ditanam di tanah rendah melalui saringan varieti terbaik dan pendekatan pembajaan serta jarak tanaman yang baharu. MARDI juga memperkenalkan teknologi kilang tanaman untuk pengeluaran sayuran bernilai tinggi dan sistem penanaman *self watering* bertingkat di bawah struktur hujan yang dapat meningkatkan hasil pengeluaran antara empat hingga enam kali ganda berbanding tanaman secara konvensional serta dapat menjimatkan baja dan input pertanian sehingga 25%.

Di peringkat lepas tuaian, MARDI juga membangunkan beberapa kaedah dan teknologi yang dalam penentuan tahap kematangan buah/sayur yang optimum untuk penuaian, kaedah penuaian yang betul, kaedah pembungkusan serta teknik yang sesuai. Teknologi sejuk beku kriogenik durian untuk pengeksportan dan teknologi salutan permukaan buah berasaskan minyak tumbuhan yang mesra alam 'Eonature' adalah antara teknologi yang telah berjaya dibangunkan dan digunakan oleh industri bagi mengurangkan kerosakan dan memanjangkan hayat simpanan buah-buahan.

Dengan pelaksanaan inisiatif-inisiatif ini, MAFI akan terus komited dalam meningkatkan adaptasi teknologi dalam usaha untuk mentransformasikan sektor agro makanan negara.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA,
PARLIMEN KEEMPAT BELAS**

PERTANYAAN : JAWAB LISAN
DARIPADA : YB TUAN SIM TZE TZIN [BAYAN BARU]
TARIKH : 09 MAC 2022 (RABU)

SOALAN

TUAN SIM TZE TZIN [BAYAN BARU] minta **MENTERI KANAN PENDIDIKAN** menyatakan rasional membuka sesi sekolah baru pada bulan Mac. Bagaimanakah penyelarasan dilakukan antara sekolah Kerajaan dan sekolah persendirian dan sekolah swasta yang menetapkan tarikh sesi baru yang berbeza.

JAWAPAN

Tuan Yang di-Pertua,

Kementerian Pendidikan Malaysia (KPM) menyedari bahawa sesi persekolahan secara bersemuka untuk tahun 2020 dan tahun 2021 tidak dapat dilaksanakan seperti mana kebiasaan. Oleh yang demikian, KPM telah membuat ketetapan untuk melanjutkan sesi persekolahan tahun 2021 sehingga bulan Februari tahun 2022. Pelanjutan sesi ini membolehkan pihak sekolah merancang dan melaksanakan aktiviti pemulihan, pengukuhan dan pengayaan secara intensif bagi meningkatkan kesediaan murid untuk mengikuti tahun persekolahan berikutnya.

KPM telah menetapkan sesi persekolahan bagi kalendar akademik sesi 2022/2023 bermula pada bulan Mac 2022. Ketetapan ini adalah berdasarkan peruntukan dalam Akta Pendidikan 1996 [Akta 550] berhubung dengan bilangan hari persekolahan. Sesi persekolahan ini akan dijadikan sebagai panduan dalam menetapkan sesi persekolahan pada tahun seterusnya.

Untuk makluman Ahli Yang Berhormat, bagi memastikan pembukaan semua jenis sekolah bagi kalendar akademik sesi 2022/2023 berjalan lancar, KPM turut mengadakan beberapa siri sesi libat urus bersama-sama pihak berkepentingan termasuk sekolah swasta yang berdaftar bawah KPM. Sekolah swasta yang melaksanakan kurikulum kebangsaan akan memulakan sesi baharu persekolahan serentak dengan sekolah kerajaan manakala sekolah yang tidak menggunakan kurikulum kebangsaan iaitu

sekolah antarabangsa dan sekolah ekspatriat beroperasi mengikut kalendar akademik masing-masing.

KPM turut menyarankan agar ketetapan kalendar akademik sesi 2022/2023 ini turut terpakai di semua sekolah yang tidak berdaftar bawah KPM. Namun, tarikh pengoperasian sekolah tersebut adalah tertakluk pada institusi masing-masing.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA,
PARLIMEN KEEMPAT BELAS**

**PERTANYAAN : JAWAB LISAN
DARIPADA : YB TUAN AHMAD BIN HASSAN [PAPAR]
TARIKH : 09 MAC 2022 (RABU)**

SOALAN

Tuan Ahmad bin Hassan [Papar] minta **MENTERI KOMUNIKASI DAN MULTIMEDIA** menyatakan langkah Kementerian bagi mengawal penggunaan teknologi secara berlebihan yang boleh memberikan kesan negatif ke atas interaksi manusia serta melemahkan sifat kemanusiaan seseorang.

JAWAPAN

Tuan Yang di-Pertua,

Kerajaan melalui Kementerian Komunikasi dan Multimedia Malaysia (KKMM) dan agensinya iaitu Suruhanjaya Komunikasi dan Multimedia Malaysia (SKMM) dan CyberSecurity Malaysia (CSM) sentiasa menjalankan inisiatif berterusan bagi meningkatkan kesedaran kepada semua lapisan masyarakat.

SKMM telah melaksanakan pelbagai program kesedaran bagi memberi panduan bagaimana internet boleh digunakan secara positif dan beretika melalui Program Klik Dengan Bijak atau KDB. Melalui program ini, pengguna internet diberi panduan bagi menangani penggunaan Internet yang berlebihan ataupun bermasalah.

Sejak dilancarkan pada tahun 2012 hingga 2021, inisiatif KDB telah mencapai lebih daripada tujuh juta jangkauan audiens melalui program-program keterlibatan di lapangan dan meraih lebih 86,000 pengikut di platform sosial media. Inisiatif KDB juga telah melatih seramai 1,730 pengurus di 873 buah PEDi di seluruh negara termasuk Sabah dan Sarawak supaya mereka berkeupayaan untuk melatih komuniti setempat mengenai keselamatan dan budaya bertanggungjawab dalam talian. Pelaksanaan usaha kesedaran dan pendidikan ini dijalankan dengan kerjasama rakan strategik termasuklah agensi kerajaan, sekolah, institusi pengajian tinggi, dan pertubuhan bukan kerajaan.

Selain itu, modul pendidikan KDB juga diajar kepada ahli komuniti melalui sebuah lagi inisiatif advokasi SKMM iaitu Sukarelawan ICT Malaysia ataupun MIV. Sejak pelancaran Program MIV pada tahun 2016 sehingga tahun 2021, program MIV telah melatih seramai 8,627 sukarelawan dari seluruh negara dengan capaian lebih daripada 13 juta audiens melalui 177 buah program yang telah dianjurkan.

Mesej advokasi keselamatan dalam talian juga dipromosikan dengan menggunakan platform media sosial popular seperti Facebook dan Instagram.

Manakala Kerajaan melalui CyberSecurity Malaysia sentiasa mengambil langkah tanpa henti bagi memperkasakan ekosistem keselamatan siber negara dengan mengadakan asas yang kukuh dari semua sudut. Kerjasama antara organisasi kerajaan dan agensi penguatkuasaan terus dipupuk dalam menangani ancaman dan jenayah siber. Antara inisiatif pro-aktif yang dilaksanakan adalah:

- (i) Keibubapaan Siber (*Cyber Parenting*);
- (ii) Program Kesedaran CyberSAFE;
- (iii) Modul Kesedaran Keselamatan Siber Nasional (MKKSN);
- (iv) Kajian Tanda Aras Tahap Kesedaran Keselamatan Siber Nilai Status Penggunaan Teknologi dan Internet dalam Keluarga Malaysia;
- (v) Kempen kesedaran keselamatan siber melalui '*Safer Internet Day*' (SID);
- (vi) Inisiatif Etika Siber Kebangsaan;
- (vii) Pertandingan Wacana ICT Kebangsaan (NICTSeD);
- (viii) Kursus Pensijilan; dan
- (ix) Penerbitan Infografik Amalan Terbaik

Sekian, terima kasih

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA,
PARLIMEN KEEMPAT BELAS**

**PERTANYAAN : JAWAB LISAN
DARIPADA : YB TUAN SIM TZE TZIN [BAYAN BARU]
TARIKH : 09 MAC 2022 (RABU)**

SOALAN

TUAN SIM TZE TZIN (BAYAN BARU) minta **MENTERI PERTANIAN DAN INDUSTRI MAKANAN** menyatakan cara-cara Kementerian mengatasi kenaikan kos input pertanian iaitu kenaikan dedak, racun serangga dan kekurangan pekerja dalam sektor pertanian, perikanan dan penternakan.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian ini amat prihatin terhadap isu kenaikan input pertanian seperti baja, racun dan dedak. Selain daripada itu, Kementerian juga sedar akan kekurangan pekerja yang sedang dihadapi oleh sektor pertanian.

Kenaikan harga input pertanian adalah didorong oleh kenaikan harga import bahan mentah bagi penghasilan produk input pertanian tersebut seperti ammonium sulfat, asid fosforus dan urea (bagi penghasilan baja dan racun) serta jagung dan kacang soya (bagi penghasilan dedak) yang diimport dari China, India, Amerika Latin dan lain-lain negara.

Bagi mengatasi kenaikan harga ini, Kementerian telah melaksanakan inisiatif berikut:

- i. Menambah peruntukan sebanyak RM62 juta bagi Skim Insentif Pengeluaran Padi (SIPP) yang sedia ada berjumlah RM1.5 billion;
- ii. Menawarkan pinjaman pada kadar faedah sifar peratus dan moratorium bayaran balik pinjaman selama enam bulan dengan peruntukan berjumlah RM200 juta di bawah Tabung Ekonomi Kumpulan Usahawan Niaga (TEKUN) dan Agrobank;

- iii. Mengimbangi kos yang ditanggung oleh pengusaha melalui penawaran subsidi sebanyak RM0.60/kg bagi ayam bulat dan RM0.05/biji bagi telur gred A, B dan C bermula dari 5 Februari hingga 5 Jun 2022; dan
- iv. Mengimport ayam bulat dan keratan dari loji luar negara yang diiktiraf sehingga 10,000 tan metrik sebulan bermula Disember 2021 hingga Mei 2022.

Kementerian melalui Jabatan dan agensi turut memperkenalkan alternatif lain bagi mengurangkan kebergantungan input pertanian yang diimport ini seperti:

- i. Menggalakkan petani mengamalkan Pengurusan Perosak Bersepadu (*Integrated Pest Management*) bagi mengurangkan kebergantungan terhadap racun kimia melalui kawalan secara kultura, kawalan fizikal dan kawalan biologi;
- ii. Menggalakkan dan mempromosikan penggunaan input pertanian berasaskan mikroorganisma berfaedah (*Effective Microorganism*) seperti '*Plant Booster*', '*Growth Enhancer*' dan '*Bokashi*' dan penggunaan baja kompos daripada bahan sisa tanaman;
- iii. Pelaksanaan projek rintis penanaman jagung bijian secara berfasa dengan keluasan tanaman sehingga 80,000 hektar yang dijangka dapat mengurangkan kebergantungan kepada sumber makanan import sebanyak 30% pada tahun 2032; dan

- iv. Menjalankan aktiviti penyelidikan bagi menghasilkan bahan mentah gantian yang bersesuaian dalam penghasilan makanan ternakan khususnya untuk rumusan makanan unggas berasaskan isirung sawit.

Kekurangan pekerja asing dalam pelbagai sektor termasuk sektor pertanian adalah susulan daripada penutupan sempadan negara serta penangguhan sementara penggajian pekerja asing baharu oleh Kerajaan bermula tahun 2020 . Isu ini dijangka dapat diatasi susulan keputusan Kerajaan telah membenarkan pengambilan pekerja warga asing bagi sektor yang dibenarkan. Pembukaan permohonan pekerja warga asing sektor perladangan secara pengecualian khas seramai 32,000 orang bermula 28 Januari 2022 manakala permohonan pekerja warga asing untuk sektor-sektor lain yang dibenarkan bagi penggajian pekerja asing termasuk sektor perladangan tanpa pengecualian khas telah dibuka pada 15 Februari 2022.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA,
PARLIMEN KEEMPAT BELAS**

**PERTANYAAN : JAWAB LISAN
DARIPADA : YB DR. LEE BOON CHYE [GOPENG]
TARIKH : 09 MAC 2022 (RABU)**

SOALAN

DR. LEE BOON CHYE [GOPENG] minta **MENTERI PERTANIAN DAN INDUSTRI MAKANAN** menyatakan langkah-langkah yang sedang diambil untuk menangani usaha Syarikat Sime Darby (sebuah GLC) mengusir pekerja dan bekas pekerja ladang yang sedang menternak lembu di kawasan ladang, memandangkan jaminan makanan negara akan terjejas jika industri penternakan lembu dihancurkan.

JAWAPAN

Tuan Yang di-Pertua,

Untuk makluman Ahli Yang Berhormat, bermula bulan Jun 2019, Syarikat Sime Darby Bhd telah menetapkan bahawa aktiviti penternakan lembu di bawah tanaman kelapa sawit tidak lagi dibenarkan kerana sebab-sebab berikut:

- (i) konflik di antara pihak pengurusan ladang dan penternak;
- (ii) berlaku ketirisan di antara pemilik ternakan, pengurus ladang dan pekerja ladang;
- (iii) kos pengurusan dan penyelenggaraan yang meningkat akibat kerosakan pagar dan bayaran kerja lebih masa pekerja sehingga RM3 juta setahun; dan
- (iv) isu sosial dan pembinaan infrastruktur tanpa kebenaran.

Bagi membantu penternak yang terjejas, MAFI melalui Jabatan Perkhidmatan Veterinar (DVS) telah dan sedang mengambil inisiatif-inisiatif berikut:

- (i) memindahkan ternakan ke kawasan-kawasan padang ragut dan Taman Kekal Pengeluaran Makanan (TKPM) bagi penternak yang bersetuju; dan

- (ii) membangunkan Prosedur Operasi Standard (SOP) penternakan lembu secara integrasi di ladang sawit sebagai panduan kepada penternak untuk menguruskan ternakan secara sistematik.

Di samping itu, MAFI turut menyediakan pelbagai inisiatif bagi membela dan membantu penternak meliputi:

- (i) Projek Rezeki Ternak;
- (ii) Program Pembangunan Industri Ruminan (PROPER);
- (iii) Program Peningkatan Pengeluaran Tenusu Negara;
- (iv) Perkhidmatan nasihat teknikal veterinar; dan
- (v) Memperluaskan kebolehpasaran melalui platform pemasaran *online*.

Pendekatan ini selari dengan Dasar Agromakanan Negara 2021 – 2030 (DAN 2.0) iaitu untuk mencapai sasaran tahap sara diri (*self-sufficiency level*– SSL) bagi daging lembu/kerbau sebanyak 50%.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA,
PARLIMEN KEEMPAT BELAS**

PERTANYAAN : JAWAB LISAN
DARIPADA : YB DATUK SERI MOHD REDZUAN MD YUSOF
[ALOR GAJAH]
TARIKH : 09 MAC 2022 (KHAMIS)

SOALAN

DATUK SERI MOHD REDZUAN MD YUSOF [ALOR GAJAH] minta **MENTERI PERTANIAN DAN INDUSTRI MAKANAN** menyatakan secara terperinci perancangan Kerajaan di dalam memperkasakan *smart farming* sebagai cara meningkatkan kualiti hasil pertanian.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian ini melalui Dasar Agromakanan Negara 2021-2030 (DAN 2.0), telah mengenal pasti pertanian pintar atau smart farming sebagai antara inisiatif yang diberi tumpuan dalam menjamin sekuriti makanan negara.

Oleh itu, bagi sektor tanaman, Jabatan Pertanian telah diluluskan peruntukan RM232 juta di bawah Rancangan Malaysia Ke-12 (RMKe-12) yang melibatkan tujuh projek bagi menaik taraf sistem pengairan sedia ada di ladang kepada pengairan pintar menggunakan Internet of Things (IoT), pembangunan sistem pertanian dalam persekitaran terkawal serta perolehan jentera, mesin dan aplikasi pertanian pintar yang akan dilaksanakan secara berfasa dalam tempoh lima tahun.

Seterusnya, inisiatif ke arah pertanian pintar turut dilaksanakan oleh Jabatan Perkhidmatan Veterinar (DVS) dengan memperkenalkan sistem pengurusan lembu tenusu secara masa sebenar (*Real-Time Artificial Intelligence Assisted Cattle management System*) kepada penternak bagi membolehkan ternakan dipantau secara langsung di ladang melalui peranti mudah alih. Sistem blok rantai (*blockchain*) dan pelek keselamatan dengan kod QR juga diperkenalkan untuk mengukuhkan sistem daya jejak sarang burung walit (SWB) bagi menjamin kualiti dan keselamatan produk SWB hasilan Malaysia.

Bagi sektor perikanan pula, Jabatan Perikanan Malaysia (DOF) memberi tumpuan kepada industri ternakan udang dan ikan sangkar yang berskala komersial menggunakan teknologi seperti auto feeder, penggunaan bucket rail untuk mengangkut hasil, automatic sensor untuk menguji suhu air dan perubahan angin serta smart phone alert system untuk mengesan tahap oksigen di dalam air. Di bawah RMKe-12, sebanyak RM20 juta telah diperuntukkan dari segi R&D bagi melaksanakan penyelidikan untuk meningkatkan hasil pengeluaran sektor akuakultur.

Kementerian juga mengambil perhatian bahawa antara isu dalam adaptasi teknologi termasuk pertanian pintar adalah kekangan dari segi pembiayaan. Oleh itu, sebanyak RM60 juta telah diperuntukkan di bawah Dana Jaminan Makanan bagi Program Modenisasi Rantaian Nilai Agromakanan oleh Agrobank. Program ini menawarkan pinjaman berjumlah sehingga RM1 juta pada kadar 3.5 peratus setahun bagi tempoh sehingga 10 tahun kepada usahawan di sepanjang rantai nilai agromakanan untuk perolehan peralatan dan perkhidmatan teknologi berteraskan Revolusi Perindustrian Keempat (4IR) seperti sistem fertigasi pintar, robotik dan dron.

Bagi mewujudkan ekosistem yang kondusif untuk pertanian pintar, MAFI sedang giat mengadakan kerjasama dengan agensi-agensi lain seperti Malaysian Digital Economy Corporation (MDEC), Suruhanjaya Komunikasi dan Multimedia (SKMM) dan Agensi Angkasa Malaysia (MYSA) terutama dalam meningkatkan infrastruktur asas untuk penggunaan teknologi di kawasan pertanian di seluruh negara serta menggiatkan penerimgunaan teknologi dalam pertanian. Sesi libat urus diadakan secara berterusan dengan syarikat penyedia teknologi yang berminat untuk menawarkan teknologi terkini dalam pertanian.

Seterusnya, tumpuan juga diberi penyelidikan dan pembangunan (R&D) di mana MARDI telah memperuntukkan RM8.2 juta untuk menjalankan penyelidikan berkenaan sistem pertanian moden dan pintar yang merangkumi tanaman dalam bangunan dan lapangan.

Dengan pelaksanaan inisiatif-inisiatif ini, Kementerian akan terus komited untuk memperkasakan penggunaan pertanian pintar dalam mentransformasikan sektor agromakanan negara.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA,
PARLIMEN KEEMPAT BELAS**

PERTANYAAN : JAWAB LISAN

DARIPADA : YB DATO SRI TIONG KING SING (BINTULU)

TARIKH : 9 MAC 2022 (RABU)

SOALAN

DATO SRI TIONG KING SING (BINTULU) minta **MENTERI PENGAJIAN
TINGGI** menyatakan:

- (a) Statistik pelajar asing dari Republik Rakyat China yang belajar di institusi pengajian tinggi Malaysia bagi tahun 2021.
- (b) Apakah perancangan Kementerian dalam meningkatkan bilangan pelajar asing dari Republik Rakyat China untuk belajar di institusi pengajian tinggi Malaysia di bawah norma baharu?

JAWAPAN

Tan Sri Yang di-Pertua,

- (a) Berdasarkan Sistem MyMoheS dan e-IPTS yang dikeluarkan oleh Kementerian Pengajian Tinggi (KPT) pada tahun 2021, jumlah pelajar asing (antarabangsa) yang sedang melanjutkan pendidikan tinggi di Malaysia adalah seramai 97,235 orang. Jumlah ini merangkumi 39,172 orang pelajar di Institusi Pendidikan Tinggi Awam (IPTA) dan 58,063 orang pelajar di Institusi Pendidikan Tinggi Swasta (IPTS).

Daripada jumlah tersebut, jumlah pelajar asing dari Republik Rakyat China (China, Hong Kong, Macau, Taiwan) yang belajar di IPT di Malaysia adalah **seramai 28,816 orang pelajar, iaitu 29.6 peratus** daripada jumlah keseluruhan pelajar asing di Malaysia.

- (b) Dalam usaha untuk meningkatkan bilangan pelajar antarabangsa yang menyambung pengajian di Institusi Pendidikan Tinggi (IPT) di Malaysia, termasuk dari Republik Rakyat China, KPT telah mengadakan beberapa siri perbincangan bersama-sama pihak-pihak berkepentingan seperti:

- i. Kementerian Dalam Negeri (KDN);
- ii. Jabatan Imigresen Malaysia (JIM);
- iii. *Education Malaysia Global Services* (EMGS);
- iv. Kementerian Kesihatan Malaysia (KKM);
- v. Majlis Keselamatan Negara (MKN);
- vi. Agensi Pengurusan Bencana Negara (NADMA); dan
- vii. pihak IPT

Siri perbincangan ini adalah bertujuan untuk memudah cara urusan kemasukan pelajar antarabangsa selaras dengan Prosedur Operasi Standard (SOP) yang ditetapkan. SOP bagi urusan kemasukan pelajar antarabangsa ke Malaysia yang lengkap telah disediakan sejak Oktober 2020 dan sentiasa dikemas kini mengambil kira peraturan dan arahan daripada pihak Kerajaan.

Dalam hal yang berkaitan, KPT juga telah mengadakan sesi libat urus dan perbincangan bersama Kementerian Pelancongan (MOTAC), MATRADE, Kementerian Luar Negeri (KLN) dan *Tourism Malaysia* untuk menyelaraskan dan mempergiat program promosi dan eksport pendidikan tinggi negara melalui inisiatif di bawah Pasukan Petugas Kebangsaan Pemudahcara IPTS (PEMUDAH IPTS) – *Technical Working Group* (TWG) 4: Pengantarabangsaan dan Promosi, dan Jawatankuasa Koordinasi Eksport (JK-X) yang diterajui oleh MATRADE di bawah *National Trade Blueprint* (NTBp).

KPT melalui pejabat *Education Malaysia* Beijing dengan kerjasama EMGS selaku agensi yang bertanggungjawab mempromosikan pendidikan tinggi negara di negara China telah melaksanakan pelbagai program dan aktiviti. Ini bertujuan untuk meneroka pasaran baharu serta menambah baik hubungan diplomasi melalui kerjasama strategik antara IPT Malaysia dan IPT atau pihak syarikat di luar negara yang seterusnya meningkatkan keterlihatan jenama pendidikan tinggi negara. Antara inisiatif utama yang turut dibangunkan ialah *flagship MyAlumni@EducationMalaysia4U*, *EducationMalaysia4U*, dan *i-EducationMalaysia4U*.

Promosi pendidikan tinggi Malaysia ini dijalankan secara strategik dan berterusan melalui kempen secara fizikal dan virtual seperti penyertaan dalam acara-acara pameran, mesyuarat-mesyuarat perniagaan, seminar dan lawatan, libat urus bersama persatuan-persatuan pelajar antarabangsa dan program bersama alumni antarabangsa.

Kerjasama strategik dengan Malaysia China Business Council (MCBC) turut dimeterai bagi menarik lebih ramai pelajar antarabangsa dari negara China untuk menyambung pengajian di Malaysia di samping penganjuran *Malaysia-China Higher Education Dialogue*.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA,
PARLIMEN KEEMPAT BELAS**

PERTANYAAN : JAWAB LISAN

**DARIPADA : YB TUAN SABRI BIN AZIT
[JERAI]**

TARIKH : 09 MAC 2022 (RABU)

SOALAN

TUAN SABRI BIN AZIT [JERAI] minta **MENTERI KEWANGAN** menyatakan apakah jenis cukai yang dikenakan terhadap broker pelaburan atas talian seperti mata wang krypto, saham, atau *forex* bagi mengekang masalah pelaburan haram yang telah banyak merugikan masyarakat dan seterusnya menambah pendapatan negara.

JAWAPAN

Tan Sri Yang Di Pertua,

Secara umumnya, broker pelaburan yang memperoleh pendapatan bagi urusan mata wang krypto, saham atau *forex* di atas talian atau pun bukan di atas talian adalah tertakluk kepada cukai pendapatan. Perundangan percukaian sedia ada tidak membezakan sektor ini secara berasingan dan pendapatan mereka tertakluk kepada cukai mengikut kategori broker berkenaan sama ada individu ataupun syarikat.

Sekiranya sebuah syarikat yang menawarkan perkhidmatan broker, maka ianya tertakluk kepada cukai pendapatan korporat sama ada 17 peratus bagi Perusahaan Mikro, Kecil dan Sederhana (PMKS) atau 24 peratus bagi syarikat selain PMKS. Bagi broker individu pula, cukai dikenakan mengikut skala cukai individu berdasarkan jumlah pendapatan yang diterima.

Seksyen 3 Akta Cukai Pendapatan 1967 memperuntukkan pengenaan cukai pendapatan ke atas pendapatan yang diperoleh di dalam negara dan dari sumber luar negara. Seksyen 77 dan 77A akta yang sama pula memperuntukkan setiap individu atau syarikat perlu melaporkan pendapatan yang diterima dalam borang nyata cukai pendapatan. Kegagalan individu atau syarikat mematuhi peruntukan semasa boleh menyebabkan tindakan pematuhan seperti audit dan siasatan dijalankan ke atas mereka.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA,
PARLIMEN KEEMPAT BELAS**

PERTANYAAN : JAWAB LISAN

**DARIPADA : YB DATUK ROZMAN BIN ISLI
[LABUAN]**

TARIKH : 09 MAC 2022 (RABU)

SOALAN

DATUK ROZMAN BIN ISLI [LABUAN] minta **MENTERI KEWANGAN** menyatakan senarai terperinci projek (mengikut jenis projek) yang telah dilulus dan dilaksanakan di bawah Pakej Program Strategik Memperkasa Rakyat dan Ekonomi (PEMERKASA) bagi Parlimen Labuan.

JAWAPAN

Tan Sri Yang Di Pertua,

Untuk makluman Yang Berhormat, semua projek-projek yang diumumkan di bawah PEMERKASA diagihkan kepada kementerian/jabatan/agensi di mana agihan dibuat oleh kementerian/jabatan/agensi berdasarkan keperluan dan tidak menumpukan kepada pengagihan mengikut negeri. Walau bagaimana pun, terdapat lapan (8) projek utama yang dilaksanakan di Wilayah Persekutuan Labuan dengan jumlah peruntukan sebanyak RM15.3 juta seperti berikut:

- Penyelenggaraan Perumahan Strata Kos Rendah dan Sederhana Rendah melalui Perbadanan Labuan dengan peruntukan sebanyak RM11.4 juta ringgit di bawah Kementerian Wilayah Persekutuan;
- Pemuliharaan Sungai Untuk Mengurangkan Risiko Banjir WP Labuan dengan peruntukan sebanyak RM2.1 juta di bawah Kementerian Alam Sekitar dan Air;
- Kerja Membaikpulih Dan Menaiktaraf Pejabat-Pejabat Jabatan Pengangkutan Jalan Labuan dengan peruntukan sebanyak RM740,000 di bawah Kementerian Pengangkutan;
- Kerja-Kerja Pemuliharaan Sungai dan Tebatan Banjir WP Labuan dengan peruntukan sebanyak RM700,000 di bawah Kementerian Alam Sekitar dan Air;
- Kerja-kerja Membaikpulih dan Menaiktaraf Pejabat-Pejabat Jabatan Laut Malaysia WP Labuan dengan peruntukan sebanyak RM300,000 di bawah Kementerian Pegangkutan; dan
- Pembaikan/Naiktaraf Premis Perpaduan akibat bencana di WP Labuan sebanyak RM18,000.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA,
PARLIMEN KEEMPAT BELAS 2022**

PERTANYAAN : JAWAB LISAN

**DARIPADA : YB PUAN ALICE LAU KIONG YIENG
[LANANG]**

TARIKH : 09 MAC 2022 (RABU)

SOALAN

PUAN ALICE LAU KIONG YIENG [LANANG] minta **MENTERI KEWANGAN** menyatakan apakah langkah-langkah Kerajaan untuk mengatasi masalah skimskim yang bersifat seperti '*money game*' tetapi bertopengkan perniagaan atau pelaburan berlesen seperti skim emas, mata wang digital, e-dompet dan saham yang semakin melanda dalam negara kita dan apakah tindakan yang akan diambil oleh Kerajaan sekiranya pelaburan haram tersebut diwujudkan di luar negara yang menyebabkan rakyat kita tertipu.

JAWAPAN

Tan Sri Yang di-Pertua,

Untuk makluman Ahli Yang Berhormat, Suruhanjaya Sekuriti Malaysia (SC) amat memandang berat tentang skim-skim penipuan pelaburan atau scam dan aktiviti-aktiviti tanpa lesen/pendaftaran yang kini berleluasa terutamanya ketika pandemik Covid-19. Skim-skim ini kebanyakannya dipromosi dan ditawarkan melalui platform-platform media sosial dan platform komunikasi dalam talian seperti *Whatsapp* dan *Telegram*.

Langkah-langkah membendung skim-skim penipuan pelaburan atau scam dan aktiviti-aktiviti tanpa lesen/pendaftaran

SC telah mengambil pelbagai tindakan untuk membendung skim-skim sebegini dengan objektif utama untuk melindungi pelabur dari menjadi mangsa. Dalam hal ini, sasaran utama SC adalah untuk membanteras aktiviti skim-skim yang dikenali, termasuklah yang berpangkalan di luar negeri dengan menyekat platform-platform dalam talian yang mereka gunakan dari terus melakukan promosi atau membuat tawaran haram kepada masyarakat Malaysia. Langkah ini dilakukan dengan kerjasama Suruhanjaya Komunikasi dan Multimedia Malaysia (MCMC) dan Facebook Malaysia. SC juga giat mengemaskini Senarai Peringatan Pelabur SC dan mengeluarkan siaran akhbar untuk memberi amaran kepada orang ramai agar tidak berurusan atau melabur dengan syarikat atau individu yang telah disenaraikan.

Sehubungan dengan ini, pada tahun 2021, SC telah menyekat 133 laman web, menyenaraikan 275 nama syarikat dan individu di Senarai Peringatan Pelabur dan menyekat 35 laman Facebook.

Sebagai tindak balas terhadap peningkatan insiden skim-skim penipuan pelaburan atau scam dan aktiviti-aktiviti tanpa lesen/pendaftaran, SC telah pada tahun 2020 menubuhkan suatu pasukan petugas dalaman (*internal task force*) untuk menyiasat dan mengambil tindakan penguatkuasaan terhadap pelaku penipuan firma

klon (*clone firm scam*). Pasukan ini secara khususnya telah menyiasat skim yang telah menyalahgunakan nama syarikat sah yang dilesenkan atau didaftarkan oleh SC untuk tujuan melakukan kegiatan pelaburan tidak sah.

Sepanjang tahun 2021 hingga kini, SC telah mengambil tindakan penguatkuasaan termasuk satu pertuduhan jenayah terhadap pedagang niaga hadapan tidak berlesen kerana menipu pelabur berkaitan aktiviti tidak berlesen dan menipu wang sembilan pelabur sebanyak hampir RM1.45 juta. Selain dari itu pihak SC juga telah mengambil tindakan administratif terhadap beberapa entiti yang menjalankan aktiviti tanpa lesen/pendaftaran.

Sebelum 2021, SC juga telah mengambil tindakan penguatkuasaan jenayah dan administratif terhadap 7 individu bagi kesalahan menjalankan skim penipuan pelaburan atau scam dan aktiviti tanpa lesen/pendaftaran.

Senarai Peringatan Pelabur SC boleh didapati di <https://www.sc.com.my/regulation/enforcement/investor-alerts/sc-investor-alerts/investor-alert-list> .

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA,
PARLIMEN KEEMPAT BELAS**

PERTANYAAN : JAWAB LISAN
DARIPADA : YB DATO' SERI HAJI IDRIS BIN JUSOH
[BESUT]
TARIKH : 09 MAC 2022 (RABU)

SOALAN

DATO' SERI HAJI IDRIS BIN JUSOH [BESUT] minta **MENTERI TENAGA DAN SUMBER ASLI** menyatakan status cadangan pembinaan Pusat Santuari Gajah (JES) di Kota Tinggi melalui Jabatan Perlindungan Hidupan Liar dan Taman Negara (PERHILITAN) dalam menangani aktiviti pencerobohan gajah liar, yang mengakibatkan kemusnahan pertanian serta mendatangkan risiko keselamatan kepada penduduk setempat.

JAWAPAN

Tuan Yang di-Pertua,

1. Untuk makluman Ahli Yang Berhormat, pelaksanaan projek Santuari Gajah Negeri Johor (*Johor Elephant Sanctuary* – JES) bertujuan untuk menempatkan gajah-gajah yang menimbulkan gangguan kepada penduduk setempat dan seterusnya mengurangkan masalah konflik manusia-gajah di negeri Johor.
2. Negeri Johor dianggarkan mempunyai populasi gajah sebanyak 120 hingga 160 ekor meliputi daerah Kluang, Kota Tinggi, Mersing dan Segamat. Secara purata, Jabatan PERHILITAN Negeri Johor menerima lebih kurang 100 aduan gangguan gajah setiap tahun dengan kos kerugian yang ditanggung oleh orang ramai sebanyak RM6,630,464 dalam tempoh 2014-2019 atau lebih kurang RM1.1 juta setahun.
3. Projek pembangunan Santuari Gajah Johor seluas 72.993 hektar dibangunkan dalam dua (2) fasa di mana Fasa Pertama projek bermula pada tahun 2016 dan telah selesai pada tahun 2020 melibatkan pembinaan fizikal seperti bangunan pejabat, bangunan kuarantin dan berek kakitangan.
4. Fasa Kedua projek pula telah bermula pada tahun 2019 melibatkan projek-projek pembangunan sumber di JES antaranya seperti pembinaan halangan fizikal yang dianggarkan sepanjang 15 kilometer menyusuri sempadan Hutan Simpan Panti bagi menghalang gajah memasuki kawasan pertanian dan penempatan penduduk berhampiran. Projek dijangka siap sepenuhnya pada tahun 2025.

5. Projek ini merupakan kaedah penyelesaian jangka masa panjang masalah ancaman gajah-gajah liar di kawasan penduduk, pertanian dan komersial dengan kaedah menangkap pindah dan penempatan secara *in-situ* ke satu kawasan santuari gajah di kawasan jajaran habitatnya.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA,
PARLIMEN KEEMPAT BELAS**

PERTANYAAN : JAWAB LISAN

**DARIPADA : YB DATUK SERI HAJI SALAHUDDIN BIN AYUB
[PULAI]**

TARIKH : 9 MAC 2022 (RABU)

SOALAN

DATUK SERI HAJI SALAHUDDIN BIN AYUB (PULAI) minta **MENTERI
PENGAJIAN TINGGI** menyatakan apakah status sebenar pembayaran
elaun latihan praktikal kepada mahasiswa, kerana dalam RMKe-12 hanya
dinyatakan Kerajaan akan menyeru majikan berbuat demikian tetapi
belum diwartakan sepenuhnya menyebabkan masih banyak industri tidak
memperuntukkan elaun.

JAWAPAN

Tan Sri Yang di-Pertua,

Berdasarkan Surat Edaran Jabatan Perkhidmatan Awam Bilangan 10 Tahun 2011 mengenai Elaun Latihan Amali Pelajar Institusi Pengajian Tinggi di Agensi Kerajaan, pelajar yang sedang menjalani latihan praktikal di agensi kerajaan dibenarkan menerima bayaran elaun sebanyak RM15 sehari untuk tempoh maksimum tiga bulan. Atas dasar cakna terhadap kelangsungan hidup pelajar yang sedang menjalani latihan industri (LI), selain sebagai langkah penambahbaikan, Kerajaan telah mula membayar elaun sebanyak RM900 sebulan kepada pelajar yang menjalani LI di sektor awam sejak tahun 2019.

Kementerian sentiasa menyokong dan menggalakkan penyertaan syarikat serta industri untuk menerima pelajar menjalani LI. Ini bagi memberikan peluang kepada pelajar menimba pengalaman pekerjaan, selain membantu syarikat mengenal pasti bakat-bakat baharu yang boleh diambil bekerja selepas mereka tamat LI.

Kerajaan melalui Belanjawan 2022 yang dibentang pada 29 Oktober 2021 juga telah menyeru pihak swasta untuk turut membayar elaun kepada pelajar yang menjalani LI di syarikat atau pun organisasi mereka. Berdasarkan rekod, terdapat seramai 55,897 orang pelajar yang dikenal pasti menjalani LI di syarikat swasta. Daripada jumlah tersebut, sebanyak 68.5 peratus (atau 38,277 orang pelajar) menerima purata bayaran elaun LI antara RM300 hingga RM500 sebulan.

Untuk makluman, terdapat juga pendekatan LI secara berstruktur yang dilaksanakan oleh KPT bagi menangani masalah elaun pelajar semasa tempoh LI. Contohnya program 2u2i, *Work Based Learning* (WBL) dan *Structured Internship Programme* (SIP). Memorandum persetujuan dibuat antara pihak IPT dan syarikat, yang menyatakan dengan jelas peranan, fungsi dan tanggungjawab bersama yang dipersetujui, termasuk penetapan elaun pelajar.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA,
PARLIMEN KEEMPAT BELAS**

PERTANYAAN : JAWAB LISAN
DARIPADA : YB PUAN KASTHURIRAANI A/P PATTO
[BATU KAWAN]
TARIKH : 09 MAC 2022 (RABU)

SOALAN

Puan Kasthuriraani A/P Patto [Batu Kawan] minta **MENTERI PEMBANGUNAN WANITA, KELUARGA DAN MASYARAKAT** menyatakan:

- a) bilangan perkahwinan bawah umur 18 dari tahun 2015 sehingga kini mengikut pecahan umur pasangan lelaki dan perempuan, negeri, kaum dan agama dan permohonan mahkamah sivil, Syariah dan mahkamah adat di Sabah dan Sarawak; dan
- b) sejauh manakah perkembangan Pelan Strategi Kebangsaan Bagi Menangani Punca Perkahwinan Bawah Umur setakat ini.

JAWAPAN

Tuan Yang di-Pertua,

Berdasarkan statistik perkahwinan bawah umur yang direkodkan oleh Jabatan Perangkaan Malaysia (DOSM) pada tahun 2016, sebanyak 2,288 kes telah direkodkan dengan tiga (3) negeri mencatatkan jumlah tertinggi iaitu Sabah sebanyak 444 kes, dengan pecahan 56 kes lelaki dan 388 kes perempuan, diikuti oleh negeri Pahang dengan 391 kes, dengan pecahan 56 kes lelaki dan 335 kes bagi perempuan serta negeri Johor dengan 252 kes, dengan pecahan sebanyak 20 kes bagi lelaki dan 232 kes perempuan.

Manakala pada tahun 2017, sebanyak 2,107 kes telah direkodkan dengan tiga (3) negeri mencatatkan jumlah tertinggi iaitu negeri Pahang 318 kes, dengan pecahan 45 kes lelaki dan 273 kes bagi perempuan, diikuti dengan negeri Sabah sebanyak 300 kes, dengan pecahan 39 kes lelaki dan 261 kes perempuan serta diikuti dengan negeri Johor sebanyak 235 kes, dengan pecahan sebanyak 17 kes lelaki dan 218 kes perempuan.

Bagi tahun 2018 pula, sebanyak 1,856 kes direkodkan dengan tiga (3) negeri mencatatkan jumlah tertinggi iaitu negeri Sabah sebanyak 344 kes dengan pecahan sebanyak 40 kes lelaki dan perempuan sebanyak 304 kes. Diikuti dengan negeri Pahang sebanyak 279 kes dengan pecahan sebanyak 39 kes bagi lelaki dan 240 kes bagi perempuan serta yang ketiga adalah negeri Johor dengan 202 kes dengan pecahan sebanyak 16 kes lelaki dan perempuan sebanyak 186 kes direkodkan.

Seterusnya bagi tahun 2019, sebanyak 1,466 kes telah direkodkan dengan tiga (3) negeri mencatatkan jumlah yang tertinggi iaitu Sabah sebanyak 255 kes, dengan pecahan sebanyak 35 kes lelaki dan 220 kes bagi perempuan, diikuti oleh Pahang 224 kes dengan pecahan sebanyak 24 kes lelaki dan 200 kes bagi perempuan serta negeri Perak sebanyak 185 kes dengan pecahan sebanyak 28 kes lelaki dan 157 kes perempuan telah direkodkan.

Manakala, statistik perkahwinan bawah umur pada tahun 2020 pula mencatatkan jumlah sebanyak 1,123 kes dengan tiga (3) negeri yang mencatatkan jumlah yang tertinggi iaitu Sabah sebanyak 193 kes, dengan pecahan sebanyak 21 kes lelaki dan 172 kes bagi perempuan, diikuti oleh Pahang sebanyak 165 kes, dengan pecahan sebanyak 17 kes lelaki dan 148 kes bagi perempuan seterusnya Perak dengan 151 kes, dengan pecahan sebanyak 13 kes lelaki dan 138 kes bagi perempuan.

Berdasarkan jumlah kes yang direkodkan bagi perkahwinan bawah umur dari tahun 2016 hingga tahun 2020 menunjukkan berlakunya trend penurunan bilangan perkahwinan bawah umur di Malaysia.

Manakala jumlah kelulusan kes permohonan kahwin bawah umur orang Islam yang direkodkan di Mahkamah Syariah bagi tiga tahun sebelum penguatkuasaan SOP Permohonan Kahwin Bawah Umur, iaitu antara 1 September 2015 hingga 31 Ogos 2018, jumlah kelulusan bagi seluruh negara adalah sebanyak 2,885 kes. Jumlah kelulusan kes permohonan kahwin bawah umur orang Islam tiga tahun selepas penguatkuasaan SOP Permohonan Kahwin Bawah Umur, iaitu antara 1 September 2018 hingga 31 Oktober 2021 adalah sebanyak 2,098 kes iaitu penurunan sebanyak 787 kes atau 27 peratus.

Tuan Yang di-Pertua,

Kerajaan juga komited meneruskan usaha bagi menangani perkahwinan bawah umur melalui pelaksanaan Pelan Strategi Kebangsaan Bagi Menangani Punca Perkahwinan Bawah Umur. Terkini, mesyuarat Jawatankuasa Pemandu telah diadakan pada 3 September 2021 bagi memantau serta melaporkan status pelaksanaan program di bawah Pelan yang dilaksanakan ini. Berdasarkan maklum balas yang telah diterima, daripada 58 program yang telah dirancang, sebanyak 41 program telah bermula, dan 17 lagi program belum bermula. Pelaksanaan yang telah bermula adalah dibuat sama ada melalui program sedia ada ataupun menambah baik program yang sedia ada.

Mesyuarat ini turut dijadikan sebagai *platform* bagi agensi yang terlibat untuk membincangkan isu dan cabaran, serta memberi cadangan penambahbaikan terhadap setiap program. Menyedari bahawa Pelan ini merupakan satu dokumen yang dinamik, maka saranan dan pandangan semua pihak amat dialu-alukan supaya pelan strategi ini sentiasa ditambahbaik dan relevan untuk menangani punca perkahwinan bawah umur dengan lebih berkesan.

Sekian, terima kasih.

NO SOALAN: 79

PERKAHWINAN BAWAH UMUR MENGIKUT KUMPULAN UMUR, NEGERI DAN JANTINA BAGI TAHUN 2016

ISLAM

Kump. Umur \ Negeri	17			16			15			14			13			12			11			10 dan kebawah			MALAYSIA		
	L	P	J	L	P	J	L	P	J	L	P	J	L	P	J	L	P	J	L	P	J	L	P	J	L	P	J
Johor	14	96	110	3	57	60	1	17	18		8	8			0			0			0			0	18	178	196
Kedah	8	48	56	1	24	25	1	11	12		4	4			0			0			0			0	10	87	97
Kelantan			0		2	2						0			0			0			0			0	0	2	2
Melaka	3	26	29		9	9		4	4		1	1			0			0			0			0	3	40	43
Negeri Sembilan	1	37	38	4	14	18		4	4		2	2			0			0			0			0	5	57	62
Pahang	34	127	161	9	83	92	1	36	37		15	15		2	2			0			0			0	44	263	307
Pulau Pinang	2	19	21	5	9	14		7	7		3	3			0			0			0			0	7	38	45
Perak	13	92	105	2	45	47	1	21	22		2	2		1	1			0			0			0	16	161	177
Perlis	7	28	35	1	16	17		9	9			0			0			0			0			0	8	53	61
Selangor		106	106		56	56	1	7	8		3	3			0			0			0			0	1	172	173
Terengganu	10	83	93	3	43	46		13	13		6	6		2	2			0			0			0	13	147	160
Sabah	35	206	241	17	121	138	3	40	43	1	6	7			0			0			0			0	56	373	429
Sarawak	2		2		1	1			0			0			0			0			0			0	2	1	3
WP Kuala Lumpur		21	21	3	18	10		1	1			0			0			0			0			0	3	40	43
WP Labuan	3	12	15		10	10		2	2			0			0			0			0			0	3	24	27
WP Putrajaya	2	2			0				0			0			0			0			0			0	0	2	2
Malaysia	132	903	1035	48	508	545	8	172	180	1	50	51	0	5	5	0	0	0	0	0	0	0	0	0	189	1638	1827

BUKAN ISLAM

Kump. Umur \ Negeri	17			16			15			14			13			12			11			10 dan kebawah			MALAYSIA		
	L	P	J	L	P	J	L	P	J	L	P	J	L	P	J	L	P	J	L	P	J	L	P	J	L	P	J
Johor	1	36	37		16	16	1	2	3			0			0			0			0			0	2	54	56
Kedah		5	5		3	3			0			0			0			0			0			0	0	8	8
Kelantan	1	4	5		5	5		4	4			0			0			0			0			0	1	13	14
Melaka		5	5	1	2	3			0			0			0			0			0			0	1	7	8
Negeri Sembilan	2	6	8		6	6	1	1	2		1	1			0			0			0			0	3	14	17
Pahang	9	32	41	2	24	26		11	11	1	5	6			0			0			0			0	12	72	84
Pulau Pinang		9	9		4	4			0			0			0			0			0			0	0	13	13
Perak	5	30	35	4	19	23		8	8			0			0			0			0			0	9	57	66
Perlis		1	1			0			0			0			0			0			0			0	0	1	1
Selangor		18	18		7	7			0			0			0			0			0			0	0	25	25
Terengganu			0			0			0			0			0			0			0			0	0	0	0
Sabah		14	14		1	1			0			0			0			0			0			0	0	15	15
Sarawak		105	105		39	39			0			0			0			0			0			0	0	144	144
WP Kuala Lumpur		8	8		2	10			0			0			0			0			0			0	0	10	10
WP Labuan			0			0			0			0			0			0			0			0	0	0	0
WP Putrajaya			0			0			0			0			0			0			0			0	0	0	0
Malaysia	18	273	291	7	128	143	2	26	28	1	6	7	0	0	0	0	0	0	0	0	0	0	0	0	28	433	461

KESELURUHAN (ISLAM + BUKAN ISLAM)

Kump. Umur \ Negeri	17			16			15			14			13			12			11			10 dan kebawah			MALAYSIA		
	L	P	J	L	P	J	L	P	J	L	P	J	L	P	J	L	P	J	L	P	J	L	P	J	L	P	J
Johor	15	132	147	3	73	76	2	19	21	0	8	8	0	0	0	0	0	0	0	0	0	0	0	0	20	232	252
Kedah	8	53	61	1	27	28	1	11	12	0	4	4	0	0	0	0	0	0	0	0	0	0	0	0	10	95	105
Kelantan	1	4	5	0	7	7	0	4	4	0	0	0	0	0	0	0	0	0	0	0	0	0	0	0	1	15	16
Melaka	3	31	34	1	11	12	0	4	4	0	1	1	0	0	0	0	0	0	0	0	0	0	0	0	4	47	51
Negeri Sembilan	3	43	46	4	20	24	1	5	6	0	3	3	0	0	0	0	0	0	0	0	0	0	0	0	8	71	79
Pahang	43	159	202	11	107	118	1	47	48	1	20	21	0	2	2	0	0	0	0	0	0	0	0	0	56	335	391
Pulau Pinang	2	28	30	5	13	18	0	7	7	0	3	3	0	0	0	0	0	0	0	0	0	0	0	0	7	51	58
Perak	18	122	140	6	64	70	1	29	30	0	2	2	0	1	1	0	0	0	0	0	0	0	0	0	25	218	243
Perlis	7	29	36	1	16	17	0	9	9	0	0	0	0	0	0	0	0	0	0	0	0	0	0	0	8	54	62
Selangor	0	124	124	0	63	63	1	7	8	0	3	3	0	0	0	0	0	0	0	0	0	0	0	0	1	197	198
Terengganu	10	83	93	3	43	46	0	13	13	0	6	6	0	2	2	0	0	0	0	0	0	0	0	0	13	147	160
Sabah	35	220	255	17	122	139	3	40	43	1	6	7	0	0	0	0	0	0	0	0	0	0	0	0	56	388	444
Sarawak	2	105	107	0	40	40	0	0	0	0	0	0	0	0	0	0	0	0	0	0	0	0	0	0	2	145	147
WP Kuala Lumpur	0	29	29	3	20	10	0	1	1	0	0	0	0	0	0	0	0	0	0	0	0	0	0	0	3	50	53
WP Labuan	3	12	15	0	10	10	0	2	2	0	0	0	0	0	0	0	0	0	0	0	0	0	0	0	3	24	27
WP Putrajaya	0	2	2	0	0	0	0	0	0	0	0	0	0	0	0	0	0	0	0	0	0	0	0	0	0	2	2
Malaysia	150	1176	1326	55	636	678	10	198	208	2	56	58	0	5	5	0	0	0	0	0	0	0	0	0	217	2071	2288

Petunjuk: L = Lelaki P = Perempuan J = Jumlah

Sumber : DOSM

NO SOALAN: 79

PERKAHWINAN BAWAH UMUR MENGIKUT KUMPULAN UMUR, NEGERI DAN JANTINA BAGI TAHUN 2017

ISLAM

Kump. Umur \ Negeri	17			16			15			14			13			12			11			10 dan kebawah			MALAYSIA		
	L	P	J	L	P	J	L	P	J	L	P	J	L	P	J	L	P	J	L	P	J	L	P	J	L	P	J
Johor	16	117	133	1	58	59		13	13			0			0			0			0			0	17	188	205
Kedah	9	78	87	6	37	43		13	13			0		1	1			0			0			0	15	129	144
Kelantan			0		1	1			0			0			0			0			0			0	0	1	1
Melaka	5	21	26		9	9		2	2			0			0			0			0			0	5	32	37
Negeri Sembilan	9	35	44	5	12	17		6	6		2	2		1	1			0			0			0	14	56	70
Pahang	19	112	131	5	51	56	2	14	16		4	4		3	3			0			0			0	26	184	210
Pulau Pinang	8	22	30	3	14	17		8	8			0			0			0			0			0	11	44	55
Perak	16	86	102	1	48	49		14	14		4	4			0			0			0			0	17	152	169
Perlis	2	17	19	1	17	18		2	2		2	2			0			0			0			0	3	38	41
Selangor	22	128	150	2	61	63		17	17		1	1			0			0			0			0	24	207	231
Terengganu	7	85	92	6	41	47		11	11			0			0			0			0			0	13	137	150
Sabah	28	160	188	8	72	80	3	20	23		3	3			0			0			0			0	39	255	294
Sarawak		1	1		1	1			0			0			0			0			0			0	0	2	2
WP Kuala Lumpur	6	34	40	3	16	10		3	3			0			0			0			0			0	9	53	62
WP Labuan	1	6	7		11	11		2	2			0			0			0			0			0	1	19	20
WP Putrajaya			0			0			0			0			0			0			0			0	0	0	0
Malaysia	148	902	1050	41	449	481	5	125	130	0	16	16	0	5	5	0	0	0	0	0	0	0	0	0	194	1497	1691

BUKAN ISLAM

Kump. Umur \ Negeri	17			16			15			14			13			12			11			10 dan kebawah			MALAYSIA		
	L	P	J	L	P	J	L	P	J	L	P	J	L	P	J	L	P	J	L	P	J	L	P	J	L	P	J
Johor		19	19		11	11			0			0			0			0			0			0	0	30	30
Kedah		6	6		4	4			0			0			0			0			0			0	0	10	10
Kelantan		4	4		6	6		1	1			0			0			0			0			0	0	11	11
Melaka		5	5		1	1		1	1		1	1			0			0			0			0	0	8	8
Negeri Sembilan	1	7	8		4	4		4	4		5	5			0			0			0			0	1	20	21
Pahang	13	43	56	5	17	22	1	20	21		5	5		4	4			0			0			0	19	89	108
Pulau Pinang		10	10		3	3			0			0			0			0			0			0	0	13	13
Perak	9	25	34	3	15	18		7	7	1	4	5			0			0			0			0	13	51	64
Perlis			0			0			0			0			0			0			0			0	0	0	0
Selangor		18	18		5	5			0			0			0			0			0			0	0	23	23
Terengganu		0			1	1			0			0			0			0			0			0	0	1	1
Sabah		2	2		4	4			0			0			0			0			0			0	0	6	6
Sarawak		82	82		28	28			0			0			0			0			0			0	0	110	110
WP Kuala Lumpur		10	10		1	10			0			0			0			0			0			0	0	11	11
WP Labuan			0			0			0			0			0			0			0			0	0	0	0
WP Putrajaya			0			0			0			0			0			0			0			0	0	0	0
Malaysia	23	231	254	8	100	117	1	33	34	1	15	16	0	4	4	0	0	0	0	0	0	0	0	0	33	383	416

KESELURUHAN (ISLAM + BUKAN ISLAM)

Kump. Umur \ Negeri	17			16			15			14			13			12			11			10 dan kebawah			MALAYSIA		
	L	P	J	L	P	J	L	P	J	L	P	J	L	P	J	L	P	J	L	P	J	L	P	J	L	P	J
Johor	0	19	19	0	11	11	0	0	0	0	0	0	0	0	0	0	0	0	0	0	0	0	0	0	0	30	30
Kedah	16	123	139	1	62	63	0	13	13	0	0	0	0	0	0	0	0	0	0	0	0	0	0	0	17	198	215
Kelantan	9	82	91	6	43	49	0	14	14	0	0	0	0	1	1	0	0	0	0	0	0	0	0	0	15	140	155
Melaka	0	5	5	0	2	2	0	1	1	0	1	1	0	0	0	0	0	0	0	0	0	0	0	0	0	9	9
Negeri Sembilan	6	28	34	0	13	13	0	6	6	0	5	5	0	0	0	0	0	0	0	0	0	0	0	0	6	52	58
Pahang	22	78	100	10	29	39	1	26	27	0	7	7	0	5	5	0	0	0	0	0	0	0	0	0	33	145	178
Pulau Pinang	19	122	141	5	54	59	2	14	16	0	4	4	0	3	3	0	0	0	0	0	0	0	0	0	26	197	223
Perak	17	47	64	6	29	35	0	15	15	1	4	5	0	0	0	0	0	0	0	0	0	0	0	0	24	95	119
Perlis	16	86	102	1	48	49	0	14	14	0	4	4	0	0	0	0	0	0	0	0	0	0	0	0	17	152	169
Selangor	2	35	37	1	22	23	0	2	2	0	2	2	0	0	0	0	0	0	0	0	0	0	0	0	3	61	64
Terengganu	22	128	150	2	62	64	0	17	17	0	1	1	0	0	0	0	0	0	0	0	0	0	0	0	24	208	232
Sabah	7	87	94	6	45	51	0	11	11	0	0	0	0	0	0	0	0	0	0	0	0	0	0	0	13	143	156
Sarawak	28	242	270	8	100	108	3	20	23	0	3	3	0	0	0	0	0	0	0	0	0	0	0	0	39	365	404
WP Kuala Lumpur	0	11	11	0	2	10	0	0	0	0	0	0	0	0	0	0	0	0	0	0	0	0	0	0	0	13	13
WP Labuan	6	34	40	3	16	19	0	3	3	0	0	0	0	0	0	0	0	0	0	0	0	0	0	0	9	53	62
WP Putrajaya	1	6	7	0	11	11	0	2	2	0	0	0	0	0	0	0	0	0	0	0	0	0	0	0	1	19	20
Malaysia	171	1133	1304	49	549	606	6	158	164	1	31	32	0	9	9	0	0	0	0	0	0	0	0	0	227	1880	2107

Petunjuk: L = Lelaki P = Perempuan J = Jumlah

Sumber : DOSM

NO SOALAN: 79

PERKAHWINAN BAWAH UMUR MENGIKUT KUMPULAN UMUR, NEGERI DAN JANTINA BAGI TAHUN 2018

ISLAM

Kump. Umur \ Negeri	17			16			15			14			13			12			11			10 dan kebawah			MALAYSIA		
	L	P	J	L	P	J	L	P	J	L	P	J	L	P	J	L	P	J	L	P	J	L	P	J	L	P	J
Johor	11	94	105	3	45	48		11	11		3	3			0			0			0			0	14	153	167
Kedah	12	68	80	2	44	46	2	16	18		2	2			0		1	1			0			0	16	131	147
Kelantan			0		1	1			0			0			0			0			0			0	0	1	1
Melaka	4	21	25	1	9	10		4	4			0			0			0			0			0	5	34	39
Negeri Sembilan	3	33	36	2	17	19			0		2	2			0			0			0			0	5	52	57
Pahang	21	82	103	4	51	55		14	14		4	4			0		1	1			0			0	25	152	177
Pulau Pinang	3	21	24	1	13	14		3	3			0			0			0			0			0	4	37	41
Perak	15	84	99	5	31	36	1	10	11		3	3		1	1			0			0			0	21	129	150
Perlis	1	28	29	1	12	13		2	2		1	1			0			0			0			0	2	43	45
Selangor	10	105	115	1	41	42		6	6			0			0			0			0			0	11	152	163
Terengganu	13	81	94	4	38	42		12	12		6	6			0			0			0			0	17	137	154
Sabah	29	179	208	7	86	93	4	22	26		7	7			0			0			0			0	40	294	334
Sarawak	1		1			0			0			0			0			0			0			0	1	0	1
WP Kuala Lumpur	2	28	30	2	17	10		1	1		1	1			0			0			0			0	4	47	51
WP Labuan	4	7	11	1	3	4			0			0			0			0			0			0	5	10	15
WP Putrajaya			0			0			0			0			0			0			0			0	0	0	0
Malaysia	129	831	960	34	408	433	7	101	108	0	29	29	0	1	1	0	2	2	0	0	0	0	0	0	170	1372	1542

BUKAN ISLAM

Kump. Umur \ Negeri	17			16			15			14			13			12			11			10 dan kebawah			MALAYSIA		
	L	P	J	L	P	J	L	P	J	L	P	J	L	P	J	L	P	J	L	P	J	L	P	J	L	P	J
Johor	2	20	22		13	13			0			0			0			0			0			0	2	33	35
Kedah		1	1			0			0			0			0			0			0			0	0	1	1
Kelantan		5	5		3	3		2	2			0			0			0			0			0	0	10	10
Melaka		3	3		3	3			0			0			0			0			0			0	0	6	6
Negeri Sembilan	2	7	9	1	9	10		1	1			0			0			0			0			0	3	17	20
Pahang	11	38	49	2	24	26	1	18	19		7	7		1	1			0			0			0	14	88	102
Pulau Pinang		7	7		3	3			0			0			0			0			0			0	0	10	10
Perak		19	19	1	13	14		2	2			0			0			0			0			0	1	34	35
Perlis		2	2			0			0			0			0			0			0			0	0	2	2
Selangor		12	12		8	8			0			0			0			0			0			0	0	20	20
Terengganu			0			0			0			0			0			0			0			0	0	0	0
Sabah		9	9		1	1			0			0			0			0			0			0	0	10	10
Sarawak	1	37	38		17	17			0			0			0			0			0			0	1	54	55
WP Kuala Lumpur		7	7		1	10			0			0			0			0			0			0	0	8	8
WP Labuan			0			0			0			0			0			0			0			0	0	0	0
WP Putrajaya			0			0			0			0			0			0			0			0	0	0	0
Malaysia	16	167	183	4	95	108	1	23	24	0	7	7	0	1	1	0	0	0	0	0	0	0	0	0	21	293	314

KESELURUHAN (ISLAM + BUKAN ISLAM)

Kump. Umur \ Negeri	17			16			15			14			13			12			11			10 dan kebawah			MALAYSIA		
	L	P	J	L	P	J	L	P	J	L	P	J	L	P	J	L	P	J	L	P	J	L	P	J	L	P	J
Johor	13	114	127	3	58	61	0	11	11	0	3	3	0	0	0	0	0	0	0	0	0	0	0	0	16	186	202
Kedah	12	69	81	2	44	46	2	16	18	0	2	2	0	0	0	0	1	1	0	0	0	0	0	0	16	132	148
Kelantan	0	5	5	0	4	4	0	2	2	0	0	0	0	0	0	0	0	0	0	0	0	0	0	0	0	11	11
Melaka	4	24	28	1	12	13	0	4	4	0	0	0	0	0	0	0	0	0	0	0	0	0	0	0	5	40	45
Negeri Sembilan	5	40	45	3	26	29	0	1	1	0	2	2	0	0	0	0	0	0	0	0	0	0	0	0	8	69	77
Pahang	32	120	152	6	75	81	1	32	33	0	11	11	0	1	1	0	1	1	0	0	0	0	0	0	39	240	279
Pulau Pinang	3	28	31	1	16	17	0	3	3	0	0	0	0	0	0	0	0	0	0	0	0	0	0	0	4	47	51
Perak	15	103	118	6	44	50	1	12	13	0	3	3	0	1	1	0	0	0	0	0	0	0	0	0	22	163	185
Perlis	1	30	31	1	12	13	0	2	2	0	1	1	0	0	0	0	0	0	0	0	0	0	0	0	2	45	47
Selangor	10	117	127	1	49	50	0	6	6	0	0	0	0	0	0	0	0	0	0	0	0	0	0	0	11	172	183
Terengganu	13	81	94	4	38	42	0	12	12	0	6	6	0	0	0	0	0	0	0	0	0	0	0	0	17	137	154
Sabah	29	188	217	7	87	94	4	22	26	0	7	7	0	0	0	0	0	0	0	0	0	0	0	0	40	304	344
Sarawak	2	37	39	0	17	17	0	0	0	0	0	0	0	0	0	0	0	0	0	0	0	0	0	0	2	54	56
WP Kuala Lumpur	2	35	37	2	18	10	0	1	1	0	1	1	0	0	0	0	0	0	0	0	0	0	0	0	4	55	59
WP Labuan	4	7	11	1	3	4	0	0	0	0	0	0	0	0	0	0	0	0	0	0	0	0	0	0	5	10	15
WP Putrajaya	0	0	0	0	0	0	0	0	0	0	0	0	0	0	0	0	0	0	0	0	0	0	0	0	0	0	0
Malaysia	145	998	1143	38	503	531	8	124	132	0	36	36	0	2	2	0	2	2	0	0	0	0	0	0	191	1665	1856

Petunjuk: L = Lelaki P = Perempuan J = Jumlah
Sumber : DOSM

NO SOALAN: 79

PERKAHWINAN BAWAH UMUR MENGIKUT KUMPULAN UMUR, NEGERI DAN JANTINA BAGI TAHUN 2019

ISLAM

Kump. Umur \ Negeri	17			16			15			14			13			12			11			10 dan kebawah			MALAYSIA		
	L	P	J	L	P	J	L	P	J	L	P	J	L	P	J	L	P	J	L	P	J	L	P	J	L	P	J
Johor	11	91	102	4	35	39	2	8	10		1	1			0			0			0			0	17	135	152
Kedah	10	86	96		24	24	1	8	9			0			0			0			0			0	11	118	129
Kelantan	1	1	2			0		1	1			0			0			0			0			0	1	2	3
Melaka	8	15	23		15	15		5	5	1	3	4			0			0			0			0	9	38	47
Negeri Sembilan	4	29	33	1	10	11	3	4	7		1	1			0			0			0			0	8	44	52
Pahang	11	71	82	2	47	49		12	12		4	4		1	1			0			0			0	13	135	148
Pulau Pinang	2	8	10		8	8	2	3	5			0			0			0			0			0	4	19	23
Perak	18	91	109	4	32	36		14	14	1	1	2			0			0			0			0	23	138	161
Perlis	2	20	22	1	7	8		1	1			0			0			0			0			0	3	28	31
Selangor	3	31	34	1	18	19	1	4	5		4	4			0			0			0			0	5	57	62
Terengganu	10	57	67	4	31	35	2	17	19		1	1		1	1			0			0			0	16	107	123
Sabah	25	133	158	7	67	74	3	14	17		3	3			0			0			0			0	35	217	252
Sarawak	0		0	1	1	2			0			0			0			0			0			0	1	1	2
WP Kuala Lumpur	3	19	22	1	1	10		1	1			0			0			0			0			0	4	21	25
WP Labuan	1	5	6		2	2			0			0			0			0			0			0	1	7	8
WP Putrajaya	1	1	2			0			0			0			0			0			0			0	1	1	2
Malaysia	110	658	768	26	298	332	14	92	106	2	18	20	0	2	2	0	0	0	0	0	0	0	0	0	152	1068	1220

BUKAN ISLAM

Kump. Umur \ Negeri	17			16			15			14			13			12			11			10 dan kebawah			MALAYSIA		
	L	P	J	L	P	J	L	P	J	L	P	J	L	P	J	L	P	J	L	P	J	L	P	J	L	P	J
Johor		20	20		4	4		1	1		1	1			0			0			0			0	0	26	26
Kedah		10	10		1	1			0			0			0			0			0			0	0	11	11
Kelantan	1	2	3		3	3			0			0			0			0			0			0	1	5	6
Melaka		2	2		2	2			0			0			0			0			0			0	0	4	4
Negeri Sembilan	2	3	5		7	7		3	3		2	2			0			0			0			0	2	15	17
Pahang	6	30	36	1	22	23	1	12	13		2	2			0			0			0			0	8	66	74
Pulau Pinang		5	5		3	3			0			0			0			0			0			0	0	8	8
Perak	1	13	14	2	6	8			0			0			0			0			0			0	3	19	22
Perlis			0			0			0			0			0			0			0			0	0	0	0
Selangor	1	12	13	1	1	2			0			0			0			0			0			0	2	13	15
Terengganu			0			0			0			0			0			0			0			0	0	0	0
Sabah		2	2			0			0			0			0			0			0			0	0	2	2
Sarawak		42	42		10	10			0			0			0			0			0			0	0	52	52
WP Kuala Lumpur		2	2			10			0			0			0			0			0			0	0	2	2
WP Labuan			0			0			0			0			0			0			0			0	0	0	0
WP Putrajaya			0			0			0			0			0			0			0			0	0	0	0
Malaysia	11	143	154	4	59	73	1	16	17	0	5	5	0	0	0	0	0	0	0	0	0	0	0	0	16	223	239

KESELURUHAN (ISLAM + BUKAN ISLAM)

Kump. Umur \ Negeri	17			16			15			14			13			12			11			10 dan kebawah			MALAYSIA		
	L	P	J	L	P	J	L	P	J	L	P	J	L	P	J	L	P	J	L	P	J	L	P	J	L	P	J
Johor	11	111	122	4	39	43	2	9	11	0	2	2	0	0	0	0	0	0	0	0	0	0	0	0	17	161	178
Kedah	10	96	106	0	25	25	1	8	9	0	0	0	0	0	0	0	0	0	0	0	0	0	0	0	11	129	140
Kelantan	2	3	5	0	3	3	0	1	1	0	0	0	0	0	0	0	0	0	0	0	0	0	0	0	2	7	9
Melaka	8	17	25	0	17	17	0	5	5	1	3	4	0	0	0	0	0	0	0	0	0	0	0	0	9	42	51
Negeri Sembilan	6	32	38	1	17	18	3	7	10	0	3	3	0	0	0	0	0	0	0	0	0	0	0	0	10	59	69
Pahang	17	101	118	3	69	72	1	24	25	0	6	6	0	1	1	0	0	0	0	0	0	0	0	0	21	201	222
Pulau Pinang	2	13	15	0	11	11	2	3	5	0	0	0	0	0	0	0	0	0	0	0	0	0	0	0	4	27	31
Perak	19	104	123	6	38	44	0	14	14	1	1	2	0	0	0	0	0	0	0	0	0	0	0	0	26	157	183
Perlis	2	20	22	1	7	8	0	1	1	0	0	0	0	0	0	0	0	0	0	0	0	0	0	0	3	28	31
Selangor	4	43	47	2	19	21	1	4	5	0	4	4	0	0	0	0	0	0	0	0	0	0	0	0	7	70	77
Terengganu	10	57	67	4	31	35	2	17	19	0	1	1	0	0	1	1	0	0	0	0	0	0	0	0	16	107	123
Sabah	25	135	160	7	67	74	3	14	17	0	3	3	0	0	0	0	0	0	0	0	0	0	0	0	35	219	254
Sarawak	0	42	42	1	11	12	0	0	0	0	0	0	0	0	0	0	0	0	0	0	0	0	0	0	1	53	54
WP Kuala Lumpur	3	21	24	1	1	10	0	1	1	0	0	0	0	0	0	0	0	0	0	0	0	0	0	0	4	23	27
WP Labuan	1	5	6	0	2	2	0	0	0	0	0	0	0	0	0	0	0	0	0	0	0	0	0	0	1	7	8
WP Putrajaya	1	1	2	0	0	0	0	0	0	0	0	0	0	0	0	0	0	0	0	0	0	0	0	0	1	1	2
Malaysia	121	801	922	30	357	395	15	108	123	2	23	25	0	2	2	0	0	0	0	0	0	0	0	0	168	1291	1459

Petunjuk: L = Lelaki P = Perempuan J = Jumlah

Sumber : DOSM

NO SOALAN: 79

PERKAHWINAN BAWAH UMUR MENGIKUT KUMPULAN UMUR, NEGERI DAN JANTINA BAGI TAHUN 2020

ISLAM

Kump. Umur \ Negeri	17			16			15			14			13			12			11			10 dan kebawah			MALAYSIA		
	L	P	J	L	P	J	L	P	J	L	P	J	L	P	J	L	P	J	L	P	J	L	P	J	L	P	J
Johor	9	74	83	1	35	36		5	5		1	1			0			0			0			0	10	115	125
Kedah	9	63	72	3	35	38	1	2	3		1	1			0			0			0			0	13	101	114
Kelantan			0			0			0			0			0			0			0			0	0	0	0
Melaka		11	11	1	2	3			0			0			0			0			0			0	1	13	14
Negeri Sembilan	5	18	23		12	12		4	4			0			0			0			0			0	5	34	39
Pahang	13	88	101	1	36	37	1	19	20		2	2			0			0			0			0	15	145	160
Pulau Pinang	2	26	28	2	7	9			0			0			0			0			0			0	4	33	37
Perak	8	71	79	3	40	43	2	18	20		1	1			0			0			0			0	13	130	143
Perlis	4	20	24		7	7		1	1		1	1			0			0			0			0	4	29	33
Selangor	3	7	10		6	6		1	1			0			0			0			0			0	3	14	17
Terengganu	10	72	82	2	32	34		8	8		4	4			0			0			0			0	12	116	128
Sabah	12	107	119	8	48	56		12	12	1	2	3			0			0			0			0	21	169	190
Sarawak			0			0			0			0			0			0			0			0	0	0	0
WP Kuala Lumpur	3	16	19	1	10	10		1	1			0			0			0			0			0	4	27	31
WP Labuan		6	6		1	1			0			0			0			0			0			0	0	7	7
WP Putrajaya			0			0			0			0			0			0			0			0	0	0	0
Malaysia	78	579	657	22	271	292	4	71	75	1	12	13	0	0	0	0	0	0	0	0	0	0	0	0	105	933	1038

BUKAN ISLAM

Kump. Umur \ Negeri	17			16			15			14			13			12			11			10 dan kebawah			MALAYSIA		
	L	P	J	L	P	J	L	P	J	L	P	J	L	P	J	L	P	J	L	P	J	L	P	J	L	P	J
Johor		14	14		2	2			0			0			0			0			0			0	0	16	16
Kedah		1	1		1	1			0			0			0			0			0			0	0	2	2
Kelantan			0			0		1	1			0			0			0			0			0	0	1	1
Melaka		2	2		1	1			0			0			0			0			0			0	0	3	3
Negeri Sembilan		5	5		4	4			0			0			0			0			0			0	0	9	9
Pahang		3	3	1		1			0			0			0			0			0			0	1	3	4
Pulau Pinang		4	4			0			0			0			0			0			0			0	0	4	4
Perak		6	6		2	2			0			0			0			0			0			0	0	8	8
Perlis			0			0			0			0			0			0			0			0	0	0	0
Selangor		6	6		6	6			0			0			0			0			0			0	0	12	12
Terengganu			0			0			0			0			0			0			0			0	0	0	0
Sabah		2	2		1	1			0			0			0			0			0			0	0	3	3
Sarawak		15	15		4	4			0			0			0			0			0			0	0	19	19
WP Kuala Lumpur		5	5			10			0			0			0			0			0			0	0	5	5
WP Labuan			0			0			0			0			0			0			0			0	0	0	0
WP Putrajaya			0			0			0			0			0			0			0			0	0	0	0
Malaysia	0	63	63	1	21	32	0	1	1	0	0	0	0	0	0	0	0	0	0	0	0	0	0	0	1	85	86

KESELURUHAN (ISLAM + BUKAN ISLAM)

Kump. Umur \ Negeri	17			16			15			14			13			12			11			10 dan kebawah			MALAYSIA		
	L	P	J	L	P	J	L	P	J	L	P	J	L	P	J	L	P	J	L	P	J	L	P	J	L	P	J
Johor	9	88	97	1	37	38	0	5	5	0	1	1	0	0	0	0	0	0	0	0	0	0	0	0	10	131	141
Kedah	9	64	73	3	36	39	1	2	3	0	1	1	0	0	0	0	0	0	0	0	0	0	0	0	13	103	116
Kelantan	0	0	0	0	0	0	0	1	1	0	0	0	0	0	0	0	0	0	0	0	0	0	0	0	0	1	1
Melaka	0	13	13	1	3	4	0	0	0	0	0	0	0	0	0	0	0	0	0	0	0	0	0	0	1	16	17
Negeri Sembilan	5	23	28	0	16	16	0	4	4	0	0	0	0	0	0	0	0	0	0	0	0	0	0	0	5	43	48
Pahang	13	91	104	2	36	38	1	19	20	0	2	2	0	0	0	0	0	0	0	0	0	0	0	0	16	148	164
Pulau Pinang	2	30	32	2	7	9	0	0	0	0	0	0	0	0	0	0	0	0	0	0	0	0	0	0	4	37	41
Perak	8	77	85	3	42	45	2	18	20	0	1	1	0	0	0	0	0	0	0	0	0	0	0	0	13	138	151
Perlis	4	20	24	0	7	7	0	1	1	0	1	1	0	0	0	0	0	0	0	0	0	0	0	0	4	29	33
Selangor	3	13	16	0	12	12	0	1	1	0	0	0	0	0	0	0	0	0	0	0	0	0	0	0	3	26	29
Terengganu	10	72	82	2	32	34	0	8	8	0	4	4	0	0	0	0	0	0	0	0	0	0	0	0	12	116	128
Sabah	12	109	121	8	49	57	0	12	12	1	2	3	0	0	0	0	0	0	0	0	0	0	0	0	21	172	193
Sarawak	0	15	15	0	4	4	0	0	0	0	0	0	0	0	0	0	0	0	0	0	0	0	0	0	0	19	19
WP Kuala Lumpur	3	21	24	1	10	10	0	1	1	0	0	0	0	0	0	0	0	0	0	0	0	0	0	0	4	32	36
WP Labuan	0	6	6	0	1	1	0	0	0	0	0	0	0	0	0	0	0	0	0	0	0	0	0	0	0	7	7
WP Putrajaya	0	0	0	0	0	0	0	0	0	0	0	0	0	0	0	0	0	0	0	0	0	0	0	0	0	0	0
Malaysia	78	642	720	23	292	314	4	72	76	1	12	13	0	0	0	0	0	0	0	0	0	0	0	0	106	1018	1124

Petunjuk: L = Lelaki P = Perempuan J = Jumlah

Sumber : DOSM

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA,
PARLIMEN KEEMPAT BELAS**

PERTANYAAN : JAWAB LISAN
DARIPADA : YB PUAN KASTHURIRAANI A/P PATTO
[BATU KAWAN]
TARIKH : 09 MAC 2022 (RABU)

SOALAN

PUAN KASTHURIRAANI A/P PATTO [BATU KAWAN] minta **MENTERI KOMUNIKASI DAN MULTIMEDIA** menyatakan apakah tahap perlindungan bagi kanak-kanak di alam maya (online) daripada sindiket pemangsa seksual kanak-kanak dan setakat manakah pelaburan Kerajaan dari segi kepakaran, sumber manusia serta teknologi yang digunakan oleh Queensland Police Services di Australia di atas ‘tip-off’ mereka sebelum ini dalam penangkapan Richard Huckle dan Alladin Lanim. Nyatakan peruntukan Kerajaan yang dilaburkan dalam sektor ini dan apakah langkah jangka masa pendek dan panjang dalam membendung jenayah seksual kanak-kanak di alam maya.

JAWAPAN

Tuan Yang di-Pertua,

Dalam usaha mewujudkan persekitaran digital selamat untuk kanak-kanak dalam talian, Kementerian ini menyokong Dasar Perlindungan Kanak-kanak Negara yang dibangunkan oleh Kementerian Pembangunan Wanita Keluarga dan Masyarakat (KPWKM) berdasarkan falsafah Konvensyen Mengenai Hak Kanak-kanak (CRC) dan Akta Kanak-Kanak 2001 yang juga menekankan prinsip perlindungan kepada kanak-kanak demi kepentingan terbaik mereka.

Dari sudut perlindungan undang-undang, perbuatan berkomunikasi secara seksual dengan kanak-kanak, pengantunan kanak-kanak dan amang seksual bukan fizikal merupakan kesalahan jenayah di bawah Akta Kesalahan-Kesalahan Seksual terhadap Kanak-Kanak 2017 yang dikawal selia oleh Polis Diraja Malaysia (PDRM). Jika disabit kesalahan, pelaku boleh dipenjarakan selama tempoh tidak lebih 10 tahun, denda tidak melebihi RM20,000 dan juga boleh dikenakan hukuman sebat. Dalam masa yang sama, Seksyen 233 Akta Komunikasi dan Multimedia 1998 (AKM 1998) adalah peruntukan sampingan apabila melibatkan medium dalam talian termasuk media sosial.

Dari aspek kawalselia bersama penyedia platform media sosial, syarikat teknologi seperti *Facebook*, *Twitter*, dan *Google* juga tidak bertolak ansur dengan eksploitasi seksual kanak-kanak di platform yang dihoskan pihak mereka, yang berpangkalan di luar negara. Apabila kandungan sedemikian dikenalpasti, kandungan tersebut akan dikeluarkan kadar segera dan terus dilaporkan ke *The National Center*

for Missing & Exploited Children (NCMEC) untuk koordinasi lanjut bersama agensi penguatkuasaan di negara-negara terlibat.

Dari sudut kepakaran, pihak Suruhanjaya Komunikasi dan Multimedia Malaysia (MCMC) juga menjalinkan kerjasama dengan pihak PDRM serta Interpol di peringkat antarabangsa dalam operasi penguatkuasaan secara bersama termasuklah dari segi bantuan teknikal merangkumi perkara-perkara berikut:

- (i) Risikan, pengenalpastian dan pemerolehan maklumat suspek (*profiling*);
- (ii) Bantuan daripada aspek pembuktian kes seperti pemeliharaan data (*data preservation*) dan analisa forensik digital (*digital forensics*) terhadap eksibit-eksibit kes; dan
- (iii) Menyekat akses kepada laman-laman sesawang melalui punca kuasa di bawah Seksyen 263 AKM 1998, dalam mencegah perlakuan atau perlakuan kesalahan di bawah peruntukan undang-undang yang berkenaan.

Bagi maksud peruntukan Kerajaan secara khusus untuk perlindungan kanak-kanak samada di luar talian atau di dalam talian, perkara tersebut adalah di bawah peruntukan yang diterima oleh KPWKMM yang merupakan pemegang strategi bagi Dasar Perlindungan Kanak-kanak Negara. Pelaburan dari sudut teknologi seperti yang digunakan oleh Queensland Police Services di Australia pula adalah di bawah bidang kuasa pihak PDRM.

Walau bagaimanapun, Kementerian ini melalui agensi seperti SKMM dan CyberSecurity Malaysia (CSM) giat melaksanakan pelbagai program yang menyokong pelaksanaan Dasar tersebut seperti program Klik Dengan Bijak (KDB), program Sukarelawan ICT Malaysia (Malaysia ICT Volunteers – MIV), program CyberSAFE (*Cyber Security Awareness for Everyone*) dan Modul Kesedaran Keselamatan Siber Nasional (MKKSN) yang dibangunkan bersama Kementerian Pendidikan Malaysia (KPM). MCMC dan CSM juga turut bekerjasama dengan pelbagai rakan strategik dalam usaha membina daya tahan kanak-kanak dalam talian seperti agensi kerajaan, penyedia perkhidmatan, dan organisasi antarabangsa seperti UNICEF.

Langkah mengawal selia akses terhadap sesuatu kandungan di Internet bukan menjadi tanggungjawab pihak kerajaan semata-mata tetapi juga melibatkan semua pihak termasuk ibu bapa. Oleh itu, penggunaan *parental control tools* di kalangan ibu bapa dan penjaga juga perlu dijadikan budaya dalam usaha untuk menyediakan persekitaran dalam talian yang selamat untuk anak-anak.

Sekian, terima kasih

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA,
PARLIMEN KEEMPAT BELAS**

PERTANYAAN : JAWAB LISAN
DARIPADA : YB DATO' WIRA HAJI AMIRUDDIN BIN HAJI
HAMZAH [KUBANG PASU]
TARIKH : 09 MAC 2022 (RABU)

SOALAN

DATO' WIRA HAJI AMIRUDDIN BIN HAJI HAMZAH [KUBANG PASU] minta **MENTERI KEWANGAN** menyatakan pencapaian-pencapaian utama setelah YB Pagoh menjadi Pengerusi Majlis Pemulihan Negara. Apakah perkara baru yang beliau lakukan sekarang yang tidak dapat dibuat semasa beliau menjadi Perdana Menteri. Berapa kos operasi sekretariat Majlis Pemulihan Negara.

JAWAPAN

Tan Sri Yang di-Pertua,

Untuk makluman Ahli Yang Berhormat, Majlis Pemulihan Negara telah melaksanakan pelbagai usaha untuk Bersama-sama membantu Kerajaan dalam sehingga kini pelbagai kejayaan telah dicapai oleh Majlis Pemulihan Negara. Kejayaan ini adalah sejajar dengan pelaksanaan Pelan Pemulihan Negara 1.0 yang telah dilancarkan pada Julai 2021 yang lalu. Antara pencapaian utama tersebut adalah:

- Semua negeri dalam Negara telah berjaya **beralih ke Fasa-4 dengan hampir semua sektor ekonomi telah beroperasi** sepenuhnya. Pembukaan pelbagai sektor ekonomi ini telah melihat perdagangan luar mencecah lebih RM2 trilion dengan nilai kemasukan bersih FDI melebihi RM50 bilion. Ini turut menyumbangkan kepada penguncupan kadar pengangguran kepada 4.2%;
- **Hampir 98% orang dewasa di Negara ini divaksinasi** dengan menerima dua kali suntikan vaksin lengkap. Kejayaan ini telah dicapai dengan keberkesanan dalam memberi perlindungan daripada jangkitan yang lebih teruk melalui Program Imunisasi COVID-19 Kebangsaan (PICK);
- Kejayaan **Program Gelembung Pelancongan Antarabangsa Langkawi**. Program rintis ini telah dilaksanakan bermula 15 November 2021 yang lalu untuk tempoh 3 bulan. Dengan kejayaan program ini, ianya akan terus dilanjutkan sehingga sempadan negara dibuka sepenuhnya kelak;

- **Pakej Pemulihan Rakyat dan Pemulihan Ekonomi (PEMULIH)**
 - bagi Pakej PEMULIH iaitu Pakej Rangsangan Ekonomi kelapan yang diumumkan pada 28 Jun 2021, sejumlah RM111.37 bilion atau daripada RM150 bilion yang diperuntukkan telah disalurkan setakat 31 Disember 2021. Pecahan inisiatif utama yang telah disalurkan adalah seperti berikut:
 - RM80 bilion telah diperuntukkan bagi Program Bantuan Pembayaran Balik Pinjaman dan Moratorium;
 - RM4.6 bilion telah disalurkan bagi Program Bantuan Khas COVID-19 (BKC) yang memanfaatkan 9,950,000 penerima; dan
 - RM2.15 bilion telah disalurkan bagi Lanjutan Program Subsidi Upah 4.0.

Selain itu juga, Sekretariat MPN sedang merangka Pelan Pemulihan Negara 2.0. Pelan ini adalah merupakan satu pelan yang akan dirangka secara lebih komprehensif dan inklusif bagi memastikan pemulihan seterusnya yang lebih bersifat menyeluruh.

Untuk makluman Ahli Yang Berhormat juga, Pengerusi Majlis Pemulihan Negara menerima pelantikan sebagai Pengerusi MPN ini adalah secara sukarela tanpa menerima sebarang imbuhan. Manakala, seramai 6 perjawatan yang telah diluluskan mengikut waran perjawatan dengan pembayaran gaji mengikut pembayaran emolumen Pegawai Awam Persekutuan.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA
PARLIMEN KEEMPAT BELAS**

PERTANYAAN : JAWAB LISAN

**DARIPADA : YB DR. MASZLEE BIN MALEK
[SIMPANG RENGAM]**

TARIKH : 9 MAC 2022 (RABU)

SOALAN

DR. MASZLEE BIN MALIK [SIMPANG RENGAM] minta **MENTERI
PENGAJIAN TINGGI** menyatakan H-index, G-index dan i10- Index setiap
Naib Canselor di Universiti Awam (UA) yang telah dilantik bermula April
2020, dan bandingkannya dengan Naib Canselor sebelum mereka.

JAWAPAN

Tan Sri Yang di-Pertua,

Dalam proses pemilihan seorang Naib Canselor, kriteria utama pemilihan adalah berdasarkan kepada kemampuan, daya kepimpinan serta pengalaman pentadbiran institusi yang menjadi kayu ukur dan indikasi ketokohan calon dalam memimpin universiti.

Bersesuaian dengan waran perjawatan Naib Canselor yang terbuka kepada semua skim perkhidmatan termasuk dari kalangan industri, maka kurang sesuai H-Index dijadikan sebagai kriteria utama pelantikan Naib Canselor. Namun begitu, tidak dapat dinafikan sekiranya Naib Canselor mempunyai H-Index yang tinggi, maka ia merupakan satu nilai tambah kepada kesarjanaan Naib Canselor tersebut sebagai seorang ahli akademik dan boleh dijadikan sebagai tempat rujukan *peers* dalam bidang kepakaran.

Berdasarkan perbandingan H-Index antara Naib Canselor terkini dan sebelumnya, boleh disimpulkan bahawa terdapat sembilan (9) orang Naib Canselor yang mempunyai prestasi H-Index lebih baik berbanding Naib Canselor sebelumnya. Manakala, bagi tiga (3) orang Naib Canselor lagi, tiada maklumat perbandingan kerana ada antara mereka merupakan Naib Canselor dari industri dan Angkatan Tentera Malaysia.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA 2022, PENGGAL KELIMA,
PARLIMEN KEEMPAT BELAS**

PERTANYAAN : JAWAB LISAN
DARIPADA : YB TUAN MA'MUN BIN SULAIMAN
[KALABAKAN]
TARIKH : 09 MAC 2022 (RABU)

SOALAN

TUAN MA'MUN BIN SULAIMAN [KALABAKAN] minta **MENTERI KANAN PENDIDIKAN** menyatakan status pengambilan guru secara *one-off* seramai 18,000 guru yang telah dinyatakan oleh Kementerian sebelum ini. Adakah masalah kekurangan guru Pendidikan Agama Islam yang telah lama tidak diisi di kebanyakan sekolah-sekolah di seluruh Sabah telah diselesaikan. Elaun guru-guru ganti bagi mengatasi kekosongan seharusnya ditanggung oleh Kementerian Pendidikan dan bukannya dengan menggunakan dana tabung PIBG.

JAWAPAN

Tuan Yang di-Pertua,

Kementerian Pendidikan Malaysia (KPM) telah mengumumkan Pengambilan Khas seramai 18,702 orang Pegawai Perkhidmatan Pendidikan (PPP) Gred DG41 secara *one-off* bagi mengisi kekosongan guru di sekolah bawah KPM. Urusan pengambilan PPP ini adalah di bawah bidang kuasa Suruhanjaya Perkhidmatan Pendidikan (SPP) selaku Pihak Berkuasa Melantik.

SPP telah mengumumkan tawaran lantikan tetap sebagai PPP DG41 kepada 13,760 orang calon yang berjaya dalam temu duga. Pengumuman tawaran tersebut telah dibuat secara berperingkat bermula 1 November 2021 hingga 1 Mac 2022. Daripada jumlah tersebut, seramai 2,349 orang calon yang berjaya adalah untuk mengisi kekosongan Opsyen Pendidikan Islam. Bagi memenuhi keperluan pengisian guru Pendidikan Islam di Sabah, KPM telah menempatkan seramai 417 guru Pendidikan Islam baharu. Pengisian kekosongan guru Pendidikan Islam seterusnya akan dilaksanakan secara berperingkat termasuk melalui lantikan secara *Contract of Service (CoS)* setelah mendapat kelulusan SPP.

Untuk makluman Ahli Yang Berhormat, Kerajaan menyediakan peruntukan setiap tahun bagi menampung elaun guru ganti di sekolah KPM. Bagi tahun 2022, KPM menyediakan peruntukan sebanyak RM42.1 juta bagi tujuan tersebut. Elaun guru ganti ini disediakan sewajarnya mengikut keperluan selaras dengan peruntukan yang telah diluluskan. Sebarang ketidakcukupan peruntukan elaun guru ganti akan ditampung melalui penyelarasan semula peruntukan sedia ada tanpa menggunakan dana tabung PIBG.

Sekian, terima kasih.